

loted. Hamping of

## RELATION

DE CE

### QVI S'EST PASSE'

en la Mission des Peres de la Compagnie de I Es vs, aux Huros, & aux pais plus bas de la Nouuelle France, depuis l'Esté de l'année 1649, jusques à l'Esté de l'année 1650.

Enuoyée

AV R. P. CLAVDE DE LINGENDES, Prouincial de la Compagnie de I E S V S en la Prouince de France.

Par le R. P. PAVL RAGVENEAV, Superieur des Missions de la Compagnie de Iesys en la Nouuelle France.



### A. PARIS,

SEBASTIEN CRAMOISY, Imprimeur ordinaire du Roy, & de la Reyne Regente.

GARRIEL CRAMOISY,

ruë faince facques, aux Cicognes.

M. DC. LI. AVECPRIVILEGE DV ROY.

TO THE COURT OF THE PARTY OF TH and the second of the second of the Property of the Company of the tent good Windson Francisco de Alberta The second of th Committee of the contraction of The state of the s The state of the s 

# DES CHAPITRES CONTENVS EN CETTE Relation.

RELATION de ce qui s'est passé en la Mission des Peres de la Compagnie de IES VS, aux Hurons, pays de la Nouvelle France, depuis l'Este de l'année 1649. iusqu'à l'Esté de l'année 1650. pag. 1.

CHAP. I. Du transport de la Maison de sainte Marie dans l'Isle de saint Ioseph.

11. De la Mission de sainct Ioseph. 9
111. De la prise & desolation de la Mission de S. Iean, par les Iroquois, & de la mort du P. Charles Garnier, qui y estoit en mission.

v. De la mort du P. Noël Chabanel. 55 v. De la mission de sainct Matthias. 66

ä ij

Table des Chapitres.	
v 1. De la mission de sainct Charles.	73
vii. Dela Mission du sainct Espri	t.78
VIII. De la desolation du pays des Hu	42
au Printemps de l'année 1650.	-
1 x. De l'establissement de la Colonie	
ronne à Kebec.	
x. De l'Eglise de S. Ioseph à Sillery.	
x 1. Des Sauuages des Trois rinieres	
des Atticamegues.	120
XII. De la Mission de saincte Cre Tadoussac.	oix a
XIII. De la venue d'un Hiroque	
France, & de sa mort. Lettre du P. Hierosme Lallemant a	
P.Claude de Lingendes, Prouinc	
la Compagnie de l'Esys en la Pro	*,
de France.	172



## RELATION

DE CE QVI S'EST PASSE' EN LA MISSION DES PERES DE LA COMPAGNIE de l'esvs, aux Hurons, pais de la Nouvelle France, depuis l'Esté de l'année 1649, jusqu'à l'Esté de l'année 1650.

Au R. P. CLAVDE DE LINGENDES, Prouincial de la Compagnie de Issus en la Prouince de France.

ON R. PERE,

PAX CHRISTI.

Ce n'est plus du pais des Hurons, que j'addresse à vostre Reuerence la Relation de ce qui s'y est passé. Cette pauure Eslise naissante

Relation de la Nouvelle France, qui parut il y a vn an, toute connerte de son sang, opprimée sous la cruauté des Iroquois, ennemis du nom de Dieu & de la Foy; a du depuis continué plus que jamais dans ses souffrances: La plus grande part de nos bons Neophytes, & quelques-vns de leurs Pasteurs ont suiuy le chemin des premiers, au milieu des feux & des flammes, & maintenant sont dans le Ciel de compagnie. Vne famine espouuentable qui a regné partout, y a mis la desolation. Nous comptons plus de trois mille baptizez cette derniere année: mais le nombre des morts est plus grand que de ceux qui ont suruescu à la ruine de leur Patrie. Les choses estant reduites à l'extremité, nous nous sommes veus obligez de quitter enfin vne place qui n'estoit plus tenable, pour en sauuer au moins les restes. Ce fut le dixiesme iour du mois de Iuin dernier, que nous sortismes de ces terres de Promission, qui estoient nostre Paradis, & ou la mort nous eust esté mille fois plus douce, que ne sera la vie en quelque lieu que nous puissions estre. Mais il faut suiure Dieu, & il faut aimer ses conduites, quelques opposées qu'elles paroissent à nos desirs, à nos plus saintes esperances, & aux plus tendres amours de nostre cœur. En vn

mot nous sommes descendus à Kebec, auec

es années 1649. Co 1650. 3
quelques familles Chrestiennes de ces pauvres
Sauvages, qui ont suiuy nostre retraite; auec
lesquels nous tascherons de former, à l'abry du
fort de nos François, vne Colonie Huronne,
s'il plaist à Nostre Seigneur de benir leurs
desseins co les nostres. Vostre Reuerence verrale tout en detail, dans cette Relation, que
ie luy addresse, la suppliant de nous procurer
les prieres de tous ceux qui ont quelque amour
pour ces peuples. Nous en auons ver plus
grand besoin que iamais.

Mon Reverend Peres

De Kebec, ce premier de Septembre 1650.

> Vostre tres-humble & obeissant Seruiteur & sujet en N. S. PAVL RAGVENEAV.

> > A ij.

Du transport de la maison de saincte Marie dans l'Isle de S.Ioseph.

N suite des victoires sanglantes ; que remporterent les Iroquois sur nos Hurons, au commécement du Printemps de l'an passé 1649. & en suite des barbaries plus qu'inhumaines qu'ils exercerent à l'endroit de leurs captifs de guerre, & des cruels tourmens qu'ils firent souffrir impitoyablement au Pere Iean de Brebeuf, & au Pere Gabriel Lallemant, Pasteurs de cette Eglise vrayement souffrante; la terreur s'estant iettée sur les bourgades voisines, qui redoutoient vn semblable malheur; tout le païs se dissipa: Ces pauures peuples desolez ayans quitté leurs terres, leurs maisons, & leurs bourgades, & tout ce qu'ils auoient de plus cher en ce monde, pour fuyr la cruauté d'vn ennemy qu'ils craignoient plus que mille morts, & que tout ce qui restoit deuant leurs yeux, capable d'espouuanter des personnes desia miserables. Plusieurs

es années 1649 & 1650. n'esperans plus d'humanité parmy les hommes, se ietterent dans l'espaisseur des bois, pour y trouuer la paix, quoy qu'auec les bestes feroces. Les autres se retirerent sur des rochers affreux, au milieu d'vn grand Lac, qui a prez de quatre cent lieuës de circuit ; aymans mieux mourir dans les eaux, & dans les precipices, que dans le feu des Iroquois. Vn bon nombre, ayans pris party parmy les peuples de la Nation-Neutre, & dans le sommet des Montagnes que nous nommons la Nation du Petun; ceux quirestoient les plus considerables nous inuiterent à nous ioindre aueceux, & de ne pas fuyr siloin; esperans que Dieu prendroit leur cause en main, lors qu'elle seroit deuenuë la nostre, & qu'il auroit soin de leur deffense s'ils auoient soin de le seruir: Nous promettans pour cet effet, de se-faire tous Chrestiens, & d'estre sideles à la foy iusqu'à la mort, qu'ils voyoient armée de tous costez pour les exterminer.

C'estoit iustement ce que Dieu demãdoit de nous, en des temps de desolation, de fuyr auec les suyans, de les suiure par tout où leur soy les suivoit, & de

A iij

Relation de la Nouvelle France, ne pas negliger aucun de ces Chrestiens: quoy qu'il fust conuenable d'arrester le gros de nos forces, où le gros de ces sugitifs prendroient dessein de s'arrester. C'est la conclusion que nous prismes ayans recommandé l'affaire à Dieu.

Nous détachasmes quelques vins de nos Peres, pour faire quelques Missions volantes; les vns dans vn petit canot d'escorce, pour voquer sur les costes, & visiter les isles les plus esloignées de ce grand Lac; à soixante, quatre vingts, & cent lieues de nous. Les autres prirent leur chemin par terre, trauersans la profondeur des bois, & grauissans la cime des montagnes. En quelque endroit que nous marchions, Dieu estant nostre conducteur, nostre dessense, nos esperances, & nostre tout; qui a t'il a craindre pour nous?

Mais il fallut, à tous tant que nous estions, quitter cette ancienne demeure de saincte Marie; ces edisices, qui quoy que pauures, paroissoient des chef-d'œu-ures de l'art, aux yeux de nos pauures Sauuages; ces terres cultiuées qui nous promettoient vne riche moisson. Il nous fallut abandonner ce lieu, que ie puis

es années 1649. & 1650. 7
appeller nostre seconde Patrie, & nos delices innocentes ; puis qu'il auoit esté le berceau de ce Christianisme, qu'il estoit le temple de Dieu. & la maison des

estoit le temple de Dieu, & la maison des seruiteurs de Iesus-Christ, & crainte que nos ennemis trop impies, ne profanas.

sent ce lieu de saincteté, & n'en prissent leur auantage; nous y mismes le seu nous

mesmes, & nous vismes brusser à nos

yeux, en moins d'vne heure, nos tra-

uaux de neuf & de dix ans.

C'estoit sur les cinq a six heures du soir, le quatorziesme iour du mois de luin, qu'vne partie de nous monta sur vn petit vaisseau que nous auions basty: le me iettay auec la plus grande part des autres, sur des arbres de cinquante à soixante pieds de longueur, que nous auions abatus dans les bois, & que nous traisnasmes dans l'eau, les lians tous ensemble, pour nous faire vn plancher flottant sur cet element infidelle, comme autrefois nous auions veu qu'en France on conduisoit le bois flotté dessus les eaux. Nous voguasmes toute la nuict sur nostre grand Lac, à force de bras & de rames; & le temps nous estant fauorable, nous abordasmes heureusement au bout A iiij

Relation de la Nouvelle France, de que sque siours, dans vne isse où ses Hurons nous attendoient, & qui estoit le lieu où nous auions pris le dessein de nous reunir tous ensemble, pour en faire vne isse Chrestienne.

Dieu sans doute nous conduisoit en ce voyage: car lors mesme que nous co-stoyons ces terres abandonnées, l'ennemy estoit en campagne, & sit son coup le lendemain, sur quelques familles Chrestiennes, qu'il surprist durant leur sommeil, sur le chemin que nous auions tenu; massacrant les vns sur la place; les

autres furent emmenez captifs.

Les Hurons qui nous attendoient das cette Isle, appellée l'Isle de Saint Ioseph, y auoient semé leur bled d'Inde: mais les secheresses de l'Esté estoient si excessiues, qu'ils perdoient l'esperance de leur moisson, si le Cielne leur donnoit quelque pluye sauorable. Ils nous prierent à nostre abord d'obtenir cette saueur pour eux. Nos prieres surent exaucées le mesme iour, quoy qu'il n'y eust auparauant aucune apparence de pluye.

Ces grans bois, qui depuis la Creation du monde, n'auoient point esté abbatus de la main d'aucun homme, nous

ès années 1649. & 1650. receurent pour hostes; & la terre nous fournit, sans la creuser, la pierre & le ciment qu'il nous falloit, pour nous fortifier contre nos ennemis. En sorte que Dieu mercy nous nous vismes en estat de tres bonne deffense, ayant basty vn petit fort, si regulierement qu'il se deffendoit facilement soy-mesme, & qui ne craignoit point, ny le feu, ny la fappe, ny l'escalade des Iroquois.

De plus, nous mismes la main pour fortifier le bourg des Hurons, qui ioignoit à nostre habitation; nous leur dressames des bastions, qui en desfendoient les approches; estans dans le dessein de prester & les forces, & les armes, & le courage de nos François, qui eussent exposé tres-volontiers leur vie, pour vne deffense si raisonnable, & si Chrestienne: ce bourg estant vrayement Chrestien, & le fondement du Christianisme respandu en toutes ces contrées.

> II. CHAPITRE De la Mission de sainct Ioseph.

Ette Isle dans laquelle nous auions transporté la maison de Sainte Marie, ayant le nom de Saint Ioseph Patron de ces Païs; les Sauuages qui s'y estoient retirez, composoient la Mission qui portoit le mesme nom. Le bourg Huron auoit plus de cent cabanes, dont vne seule contenoit les huit & dix familles, qui font soixante & quatre vingt personnes. Outre cela, il y auoit çà & là dans la Campagne, quelques cabanes plus essoignées; qui toutes ont donné de l'employ aux Peres qui ont eu le soin de cette Mission: sur laquelle Dieu a versé ses benedictions, à proportion des Croix qu'il y a enuoyé.

La famine y a esté extreme. Non pas que les terres qu'on y auoit ensemencées, n'eussent rendu auec l'usure que l'on desiroit, & bien au dela du centuple, ce qu'on leur auoit consié: mais à cause que de dix familles, à peine y en auoit il une seule qui eust pû vacquer aux trauaux, qui sont necessaires, pour se faire un champ de bled d'Inde, en un lieu, qui lors que l'on y aborda n'estoit qu'une espaisse forest, qui n'auoit rien de disposé pour le labour. La pluspart de ces pauures exilez dans leur propres païs, auoient passé tout l'Esté, & une partie de

l'Automne, a viure dans les bois, de racines & de fruits sauuages; & à pescher ça & là, sur les Lacs & sur les Riuieres, quelques petits poissons, qui servoient plus pour reculer vn peu leur mort, que pour contenter leur vie L'hyuer estat venu, qui a couuert la terre de trois & quatre pieds de neige, & qui a glacé tous les Lacs & toutes les Riuieres; tout ce ramas de monde s'estant rangé proche de nous, se vit incontinent dans la necessité, & dans l'extremité de la misere; n'ayans fait, ny pû faire aucune prouision.

Ce fut alors que nous fusmes contrains de voir des squeletes mourantes, qui soustenoient vne vie miserable, mangeant iusqu'aux ordures, & les rebuts de la nature. Le gland estoit à la plus-part, ce que seroient en Frace les mets les plus exquis. Les charognes mesme deterrées, les restes des Renards & des Chiens, ne faisoient point d'horreur, & se mangeoient, quoy qu'en cachete: Car quoy que les Hurons, auant que la foy leur eust donné plus de lumiere, qu'ils n'en auoient dans l'insidelité, ne creussent pas commettre aucun peché de mager leurs ennemis, aussi peu qu'il y en a de les tuer;

12 Relation de la Nouvelle France,

Toutefois ie puis dire auec verité, qu'ils n'ont pas moins d'horreur de manger de leurs compatriotes, qu'on peut auoir en France de manger de la chair humaine. Mais la necessité n'a plus de loy, & des dents fameliques ne discernent plus ce qu'elles mangent. Les meres se sont repeuës de leurs enfans, des freres de leurs freres, & des enfans ne reconnoissoient plus en vn cadavre mort, celuy lequel lors qu'il viuoit, ils appelloient leur Pere-

Mous auons tasché de soulager vne partie de ces miseres : mais quoy qu'en ces aumosnes, nous ayons esté peut estre au delà de ce que la Prudence eust demandé de nous, toutefois le mal estant si public, & tout le monde ne pouuant pas estre secouru esgalement de nous; nous auons esté contraints de voir de nos yeux vne partie de ces spectacles, qui

nous faisoient horreur.

· Ceux qui auoient dequoy parer aucunement à la famine, se virent attaquez d'vne maladie contagieuse, qui en emporta vn grand nombre; mais particu-

lierement des enfans.

La Guerre auoit desia fait ses rauages: non seulement dans la desolation arri-

es années 1649. & 1650. uée l'Hyuer precedent; mais en quantité de massacres, qui estoient suruenus tout le long de l'Esté, en terre ferme, aux enuirons de ceste Isle; où la pauureté contraignoit quantité de familles d'aller chercher aussi tost la mort, que la vie, dans des campagnes abandonnées à la fureur des ennemis. Mais afin que rien ne manquast aux miseres d'vn peuple affligé; tous les iours, & toutes les nuits de l'Hyuer, ce n'estoient que des nuits d horreur, das les craintes & dans les attétes où ilsestoiét sans cesse d'vne armée ennemie d'Iroquois, dont ils auoient eu aduis; qui (disoit-on,) deuoit venir nous, enleuer cette Isle, & exterminer auec nous les restes d'vn païs tirant à sa fin. Voila vne face d'affaire bien deplorable: mais ce fut au milieu de ces desolations, que Dieu prit plaisir de tirer le bien de ces peuples, de leur plus grand malheur. Leur cœur setrouuoit si docile à la foy, que nous faissons dans leurs esprits plus en vne parole, que iamais nous n'auions pû faire en des années toutes entieres. Ces pauures gens mourans de faim, venoient eux-mesmes nous trouuer, & nous demander le Baptesme; se

14 Relation de la Nouvelle France, cosolans des esperances du Paradis, qui ils voyoiet aussi proche d'eux, qu'estoit la mort, qu'ils portoient dans leur sein.

Vne mere s'est veuë, n'ayant que deux mammelles, mais sans suc & sans laict, qui toutefois estoit l'vnique chose qu'elle eut peu presenter à trois ou quatre enfans, qui pleuroient y estans attachez: Elle les voyoit mourir entre ses bras, les vns apres les autres, & n'auoit pas mesme les forces de les pousser dans le tombeau. Elle mouroit sous cette charge,& en mourant elle disoit, Ouy, Mon Dieu, vous estes le maistre de nos vies: nous mourrons puisque vous le voulez; voila qui est bien que nous mourrions Chrestiens. l'estois damnée, & mes enfans auec moy, si nous ne fussions morts miserables, ils ont receu le sainct Baptesme, & ie croy fermement que mourans tous de compagnie, nous resusciterons tous ensemble.

Vne autre mere se voyant mourir la premiere, auec autant de paix que si elle eût entré dans vn doux sommeil, laissoit dessus son sein deux pauures orphelins, qui continuoient de la succer après sa mort, & qui mouroient dessus leur me-

re, aussi paisiblement, qu'ils s'y estoient autrefois endormis, lors qu'ils en tiroiet & le laict, & la vie.

Plusieurs en expirant recommandoient leur ame à Dieu, d'autres disoient à leurs enfans, qu'ils ne songeassent rien qu'à luy, puisque luy seul seroit leur Pere dedans l'eternité. Quelques-vns ayant vendu pour vn repas de gland bouilly dans l'eau, l'vnique chose qui leur restoit de tous leurs biens, & laquelle ils s'estoient reservée, pour ne pas mourir aussi nuds, qu'ils estoient sortis du ventre de leur mere; se voyans ainsi despoüillez dans les attentes de la mort, qui estoit prochaine, disoient à Dieu; Ouy mon Dieu, ie n'ay plus rien en terre, & mon cœur n'y peut estre attaché: i'attens auec joyela mort, qu'autrefois i'ay tant redoutée: mais c'est dans l'esperance que vostre foy me donne que ie seray d'autant plus heureux dans le Ciel, que ie meurs maintenant miserable.

Ces pauures moribonds nous beniffoient en mesme temps qu'ils enuisageoient leurs miseres, n'y en ayant aucun qui n'ait trouué en nous, & plus d'amour, & vne charité plus secourante,

16 Relation de la Nouvelle France, qu'ils n'en esprouuoient mesme de leurs plus proches. Aussine nous regardoient ils, qu'auec des yeux d'amour, comme leurs Peres, & receuans nos charitez durant leur vie, ils sçauoient bien qu'elles continueroient sur eux; mesme iusqu'apres la mort, quelques-vns de nos Peres, & des François qui estoient auec nous, s'estans chargez du soin, qu'aucun autre ne vouloit prendre, non pas mesme les plus proches parens des defunts, d'enseuelir & d'enterrer ces pauures abandonnez des hommes mais que nous pouuons appeller les cheris de Dieu, puis qu'ils sont maintenant ses enfans, quelques barbares & miserables qu'ils ayent esté. Ecce quomodo computati sunt inter filios Dei, & inter sanctos sors illorum est.

Il s'est trouvé de ces pauures Chrestiens, qui se voyans mourir dans ces miseres, nous enuoyoient querir. Hé! ie te
prie, mon frere, nous disoient-ils, enterre moy dés maintenant; car c'est fait
de ma vie, & tu vois bien que tu me dois
compter entre les morts. Ce que ie
crains, si ie mourois auant que d'estre
enterrée, c'est que de pauures gens aussi
miserables que moy, ne me despouillent
de ce

de ce haillon, dont ma nudité est couuerte, pour se couurir eux-mesmes. Ce mesera vne consolation, entrant dans le tombeau, de sçauoir que mon corps n'aura pas cette consusion apres la mort, dont i'ay eu horreur toute ma vie. Ces spectacles nous tiroient les larmes,

Il faut confesser que sans nous cette mortalité eût esté encore bien plus grande : car plusieurs n'ont vescu que de l'assistance que nous leur auons donné. La main de Dieu ayant esté vrayement paternelle sur nous, voulant nous conseruer, pour mettre dans le Cielles restes de ce peuple mourant. Car c'est cette diuine Prouidence, qui par des voyes toutes pleines d'amour, (ieles pourrois appeller miraculeuses, ) nous fournissoit les moyens, non seulement de subsister nous mesmes, dans cette misere publique: mais nous donoit encor les moyens de faire du bien à tout le monde, de nous rendre les maistres des cœurs, & de gagner leur affection, pour les gagner tous tant qu'ils sont à Iesus-Christ. C'est ce qu'ils admiroient eux-mesmes; adorans en mesme temps la toute puissance de Dieu, & son amour sur nous, & en suite

18 Relation de la Nouvelle France, fur eux, voyans bien que nous ne viuions

que pour eux.

Tout l'Hyuer, ayans employé la iournée, les vns pour le salut des ames, les autres dans les œuures de charité; La nuit donnoit quelque treue à nostre trauail: autant qu'il en falloit pour ne pas succomber aux fatiques de la iournée; mais non pas tant que la nature en cust pris d'elle-mesme, auec vn plaisir innocent. Carà vray dire, nous ne dormions que d'vn demy sommeil. Quelques froids, quelques neiges, quelques vents qui soussasse ; toute la nuit il y auoit des sentinelles exposées aux rigueurs du temps, & des rondes continuelles qui faisoient leur deuoir: Les autres, qui durant ce temps là, prenoient vne partie de leur repos, estoient tousiours dessous les armes, & comme attendans le combat.

Cegrand soin rauissoit le cœur de ces pauures Sauuages, qui tous les iours, matin & soir remplissoient nostre Eglise pour y rendre à Dieu leurs hommages. Les Sacremés y estoient frequêtez auec deuotion. Les Festes & les Dimanches estoient sanctifiez par la Pieté du peuple, & par les predications publiques. Les enfans y auoient leur iour sur la semaine, & les filles le leur separé, pour ap-

prendre le Catechisme.

Mais le plus fort de nostre trauail, estoit de visiter les cabanes, pour y consoler les assigez, y secourir les pauures, pour y assister les malades, pour y disposer à la mort, ceux qui en estoient les plus proches, pour y consirmer dans l'esprit de la foy les Chrestiens & les catechumenes, & pour y gaigner les insidelles à Iesus-Christ.

Nos Peres, en faisant ces visites, auoient l'œil à la pauureté d'vn chaeun; & selon qu'ils iugeoient plus à propos de subuenir aux necessitez plus pressantes, ils se seruoient d'vne espece de monoye, qu'ils alloient distribuant à ces pauures. C'estoit vn petit morceau de cuiure, marqué pour cét esset. Tous ceux qui en auoient receu par aumosne, se trouuoient à nostre porte sur le Midy, & presentoient leur petite monoye. On donnoit aux vns vne certaine mesure de gland, qu'ils faisoient bouillir dans vne laixiue de cendres, pour vn premier bouillon, asin d'en oster la plus grande

20 Relation de la Nouvelle France. amertume. On distribuoit aux autres quelque morceau de poisson enfumé, qu'ils cuisoient en l'eau, dont par apres ils soustenoient leur vie. Ceux qui estoient les mieux partagez, receuoient vn peu de farine de bled d'Inde, bouillie and was me and a good of front of

dans l'eau.

Nous aujons achepté auant que les neiges eussent couvert la terre, cinq ou six cents boisseaux de gland. Nous auios enuoié quelques canots, pour aller chercher parmy les Nations Algonquines, cette prouision de poisson, à soixante, quatre-vingt, & cent lieuës de là. Ce peu que nous auios de bled, venoit du trauail des Hurons, au temps de l'abondance. Vnde exeunt flumina reuertuntur. C'estoit pour eux, aussi bien que pour nous, que Dieu nous auoit fourny en son temps cette manne du Ciel: car c'est ainsi que i'appelle les plus grandes richesses que nous eussions, lesquelles estant en France, l'eusse appellé de grandes pauuretez, & de grandes miseres. La nature se contente de peu, & d'où on bannit les delices, on bannit de grands soins, & on s'exempte de beaucoup d'empressemens, peu necessaires à vne vie, qui apres tout

ne peut estre immortelle.

Quantité de personnes m'ont prié de leur faire sçauoir l'ordre que nous tenions, pour l'instruction de nos Sauuages, & la suite de nos employs le long de la iournée. Ces employs n'estans pas dans l'esclat, & n'ayans point de spectateurs, sinon ceux qu'on appelle les balieures de la terre, & le rebut du monde; ce que ie puis respondre à cette demande, ne peut auoir rien d'esclattant. Ceux toutesois quine trouvent rien de petit; dans les choses qui concernent le salut des ames, puis qu'ils desirent que ie descende dans ces particularitez, & que c'est pour eux & pour semblables personnes que i'escris cecy, ils sçaurot qu'ayans pris pour nous-mesmes, deux ou trois heures de la nuit, pour agir auec Dieu, auant que d'agir auec le prochain; Le iour estant venu, les Chrestiens venoiét à l'Eglise, où nous reservions quelques Messes pour eux. Les prieres s'y faisoient publiques, à cause que plusieurs nouuellement conuertys à la foy, ne peuvent pas si tost les apprendre. Vn de nos Pères presidoit à cette deuotion, & tous les Sauuages le suiuoient, repetans sans Biij

22 Relation de la Nouvelle France,

empressement les mesmes mots. La priere acheuée on donnoit quelque instruction à toute l'assemblée; quelquefois leur expliquant quelqu'vn de nos mysteres; d'autresfois, pour les confirmer dans la foy, on leur en deduisoit quelques motifs, qui nous sembloiet dauantage dans la portée de leur esprit : souuent on les exhortoit à quelque chose de pratique, afin qu'ils passassent saintement la journée : soit qu'on les poussast à offrir à Dieu leurs trauaux, leurs peines, leurs souffrances; soit qu'on leur donnât quelque Oraison iaculatoire, qui fût leur entretien, & l'ame de tout leur trauail, soit qu'on leur enseignast les moyens de resister aux tentations; & comment y ayant succombé par malheur, il faut auoir recours à Dieu, & luy en demander pardon; soit enfin qu'on les incitastà son amour, & aux desirs de la vie eternelle.

Cette instruction estant sinie, & la plus courte qu'il se pouvoit; les premiers venus sortoient, & les autres demeuroient pour recevoir aussi l'instruction, ayans fait les prieres publiques comme les precedens. La Chapelle se remplissoit en

es années 1649. & 1650. 23

cette façon, dix & douze fois vne matinée. Cependant d'autres Peres entendoient les confessions, & selon les necessitez plus particulieres d'vn chacun, ils leur donnoient diuers aduis. Souuent en vn matin, vn seul Pere disoit yn bon mot, à cinquante & soixante personnes. Les plus longs entretiens, ne sont pas tousiours ceux qui penetrent plus auant

dans le cœur.

Sur les neuf heures on fermoit la porte de l'Eglise: & c'estoit alors que nos Peres alloiet dans les cabanes, y faire leurs visites, iusqu'enuiron deux heures auant lanuit. Car alors on sonnoit pour rappeller les Chrestiens aux prieres publiques, en la mesme façon qu'on les auoit fait le matin, l'Eglise se remplissant & se vuidant dix ou douze fois pour le moins, & c'est pour lors que plusieurs de ces bons Neophytes rédoient conte de leur iournée, selon que ceux qui auoient le soin d'vn chacun, les arrestoiet à la porte pour cét effet, tantost l'vn tantost l'autre; pour sçauoir en vn mot, cobien de fois ils auoient pensé à Dieu le long du iour : en quoy ils luy auoient esté plus fideles: s'ils luy auoient offert leur trauail, leur B ijij

faim, & leur misere: s'ils n'auoient point commis quelque faute. Cela se fait auec vne candeur qui n'a rien de barbare, & auec vne simplicité d'enfant; qui est vne marque infaillible de l'esprit de Dieu. Tousiours la nuit nous surprenoit plussoft que nous ne desirions: mais neantmoins nous la receuions auec amour, elle seule nous donnant le loisir de retourner auec Dieu; si toutesois on peut sortir de luy, lors qu'on ne parle que de luy, qu'on n'agit que pour luy, qu'on vit en luy, dans l'attente de ne mourir iamais pour autre que pour luy.

C'estoient là nos employs, au milieu de cette barbarie deuenuë Chrestienne; c'estoit ainsi que Dieu alloit disposant ces peuples pour le Ciel, les voyant proches de leur ruine. Nous l'allons voir

, and the second of the second

dans les Chapitres suiuans.

### CHAPITRE III.

De la prise & de solation de la Mision de sainct Iean, par les Iroquois, & de la mort du P. Charles Garnier, qui y estoit en Mision.

Ans les Montagnes, que nous, nommons la Nation du Petun, nous y auions depuis quelques années deux Missions: en chacune il y auoit deux de nos Peres. La plus frontiere à l'ennemy, estoit celle qui portoit le nom de Saint Iean; dont le bourg principal, qui s'appelloit du mesme nom, estoit d'enuiron cinq à six cent familles. C'estoit vn champ arrousé des sueurs d'vn des plus excellens Missionaires, qui ayt esté en ces païs, le Pere Charles Garnier; qui le deuoit aussi arrouser de son fang, puis qu'il y est mort auec son troupeau, qu'il a conduit luy-mesme iusque dans le Paradis; le jour approchant auquel Dieu vouloit faire vne Eglise triomphante, de celle qui iusqu'a-

26 Relation de la Nouvelle France, lors auoit tousiours esté dans les combats, & qui pouuoit porter le nom d'vne Eglise vrayement souffrante, nous en eusmes nouuelles sur la fin du mois de Nouembre, par deux Chrestiens Hurons eschappez d'vne bande d'enuiron trois cents Iroquois, qui nous dirent que l'ennemy estoit encore irresolu, quelle demarche il prendroit, ou vers la Nation du Petun, ou contre l'Isle où nous estions. La dessus nous nous tenons en estat de desfense, & arrestâmes nos Hurons, qui prenoient dessein de sortir en campagne, pour aller au deuat de cét ennemy. En mesmetéps nous fismes porter promptement cette nouuelle à ceux de la Nation du Petun, qui la receurent auec ioye, enuisageans cette trouppe ennemie, come desia vaincuë, & côme vne matiere de leur triomphe. Ils l'attendent quelques iours de pied ferme; puis s'ennuyans que la victoire fut si tardiue à les venir trouuer, ils voulurent luy aller au rencontre; au moins les habitans du bourg de Saint Iean, hommes de main & de courage. Ils hastent leur sortie, craignans que l'Iroquois ne leur eschappe, le voulans

surprendre, lors qu'il est encore en chemin. Ils partent se cinquiesme iour du, mois de Decembre, & prennent leur route, vers le lieu d'où ils attendent l'ennemy: mais l'ennemy ayant pris vn detour, ne fut pas rencontré, & par vn surcroist de malheur pour nous; comme il faisoit ses approches du bourg, il fit prise d'vn home & d'vne femme qui venoient d'en sortir. Il apprend de ces deux captifs l'estat de la place, & sçait qu'elle est dépourueuë de la meilleure partie de son monde, sans delay, il haste le pas, pour y mettre tout à feu & à sang, l'occasion luy en estant si fauorable.

Ce fut le septiesme iour du mois de Decembre dernier de l'année 1649 sur les trois heures apres midy; que cette troupe d'Iroquois parut aux portes de ce bourg, l'espouuante & la terreur se iette incontinent dans tout ce pauure peuple dépouillé de ses forces, qui se trouve vaincu, lors qu'il pensoit estre vainqueur. Les vns prennent la fuïte; les autres sont tüez sur la place; le feu en donna à plusieurs les premieres nouuelles, qui consommoit desia vne partie de leurs cabanes. Quantité furent pris captifs: mais, 28 Relation de la Nouuelle France,

l'ennemy victorieux, craignant le retour des guerriers, qui luy estoient allez, au rencontre hastoit si precipitemment sa retraite, qu'il sit main basse sur tous les vieillars & enfans, & sur tous ceux qu'il ne iugeoit pas pouuoir le suiure assez

promptement en sa fuïte.

Ce furent des cruautez inconceuables. On arrachoit à vne Mere ses enfans pour les ietter au feu: d'autres enfans voyoiét leur Mere assommée à leurs pieds, ou gemissante dans les sammes, sans qu'il leur fust permis, ny aux vns, ny aux autres, d'en tesmoigner aucune compassion. C'estoit vn crime de respandre vne larme; ces barbares voulans qu'on marchast dans la captiuité, comme ils marchoient dans leur triomphe. Vne pauure Mere Chrestienne, qui pleuroit la mort de son enfant, fut tuée sur la place, à cause qu'elle auoit encor de l'amour, & qu'elle ne pouuoit estouffer assez tost les sentimens de la Nature.

LePere Charles Garnier restoit alors seul de nos Peres, en cette Mission, lors que les ennemis parurent, il estoit actuellemét occupé à instruire ce peuple d'asleurs cabanes qu'il visitoit. Il sort au bruit de

es années 1649. & 1650. cette alarme. Il va droit à l'Eglise, où il trouua quelques Chresties. Nous somes morts, mes freres, leur dit-il, Priez Dieu, & prenez la fuyte, par où vous pourrés eschaper. Portes vostre foy auec vous le reste de vos vies, & que la mort vous trouue songeans à Dieu, il leur donne sa benediction, & ressort promptement, pour aller au secours des ames. Pas vn ne songe à la deffense, tout estant dans le desespoir. Plusieurs trouuent vne issuë fauorable pour leur fuyte. Ils inuitent le Pere de fuyr auec eux: mais il est retenu par lesliés de la Charité, il s'oublie de soimesme,& il ne pense qu'au salut du prochain. Son zele le portoit, & le faisoit courir par tout: soit pour donner l'absolution aux Chrestiens, qu'il auoit au rencontre; soit pour chercher dans les cabanes toutes en seu des ensans, des malades, & des catechumenes, sur lesquels il respandoit les caux du Saint Baptesme, au milieu de ces flammes. Son cœur ne brussoit d'autre feu, que de l'amour de Dieu.

Ce fut dans ces employs de Saincteté, qu'il se vit accueilly de la mort, qu'il enuisageoit sans la craindre n'y sans reculer d'vn seul pas. Vn coup de susil le perça d'vne balle, vn peu au dessous de la poitrine: vne autre balle, du mesme coup, luy déchira le petit ventre, & luy donna dans vne cuisse, dont il sut terrassé. Mais son courage n'en sut pas abbatu. Le barbare qui auoit fait ce coup, le despouilla de sa sotane, & le laissa nageant dedans son sang, asin de suiure les

autres fugitifs.

Ce bon Pere, fort peu de temps apres, fat veu ioindre les mains, faisant quelque priere. Puis tournant la teste çà & là. il apperceut à dix ou douze pas de soy; vn pauure Moribond, qui venoit aussi bien que luy, de receuoir le coup de la mort, mais qui auoit encore quelques restes de vie. L'amour de Dieu & le zele des Ames, est encore plus fort que la mort. Il se met à genoux; puis ayant fait quelque priere, il seleue auec peine, & se porte le mieux qu'il peut vers cét agonizant, pour l'assister à bien mourir. Il n'auoit pas fait trois ou quatre demarches, qu'il retombe encor assez rudement. Il se leue pour la seconde fois, & se met encore à genoux, & poursuit son mesme chemin: mais son corps espuisé

es annees 1649. & 1650. 31 de son sang, qui sort en abondance de ses playes, n'est pas si fort que son courage; Il retombe pour la troisiesme fois, n'ayat fait que quatre ou cinq pas. Nous n'auons pû sçauoir ce qu'il fit du depuis:vne bonne Chrestienne, qui nous à fait fidelement tout ce rapport, n'en ayant pas veû dauantage; à cause qu'vn Iroquois la surprit elle mesme, & luy déchargea fur la teste vn coup de hache-d'armes, qui la terrassa sur le lieu; quoy que depuis elle en soit réchapée. Le Pere receut quelque temps apres, deux coups de hache, sur les deux tempes, de part & d'autre, qui enfonçoient dans la ceruelle, s'estoit la recompense la plus riche qu'il esperast de la bonté de Dieu, pour tous les seruices passez Son corps fut despouillé, & laissé tout nud sur la place.

Deux de nos Peres, qui estoient dans la Mission la plus voisine, receurent quelques restes de ces pauures Chrestiens fugitifs, qui y arriuoient hors d'haleine; plusieurs tous couuerts de leur sang. Toute la nuict, ce ne surent qu'alarmes, dans la crainte où tout le monde estoit d'vn semblable malheur. Sur le com-

32 Relation de la Nouvelle France, mencement du iour, on apprit par quelques espions que l'ennemy s'estoit retiré. Ces deux Peres partent dés le mesme moment, afin de voir eux-mesmes de leurs yeux, vn spectacle bien triste: mais toutefois digne de Dieu. Ils ne trouuent que des cadaures, les vns dessus les autres; & de pauures Chrestiens: les vns qui acheuoient de se consommer das les reliques deplorables de ce bourg tout en seu; les autres, noyez dans leurs fang; & d'aucuns qui auoient quelques restes de vie, mais tous couvers de playes, qui n'attendoient rien que la mort, benissans Dieu dans leur malheur. Enfin, au milieu de ce bourg desolé ils y apperceurent le corps, qu'ils y estoient venus chercher: mais si peu connoissable, estant tout couvert de son sang, & des cendres det cét incendie, qu'ils passoient outre; mais quelques Sauuages Chrestiens, reconnurent leur Pere, qui estoit mort pour leur amour. Ils l'enterrent au mesme lieu, où auoit esté leur Eglise; quoy qu'il n'en restast plus aucune marque, le feu ayant tout consomé. La pauureté de cét enterrement fut

grande; mais sa saincteté n'en sut pas

moindre.

rhoindre. Ces deux bons Peres se despouillerent d'vne partie de leurs habits, pour en couurir le mort; & ne purent faire dauantage, à moins que de s'en retourner tout nuds.

Ce fut vn bien riche dépost, pour vn lieu si abandonné, que le corps d'vn si grandseruiteur de Dieu: mais ce grand Dieu trouuerra bien les moyens de nous reünir tous dans le Ciel, puisque ce n'est qu'vniquement pour son amour, que nous sommes ainsi dispersez, & durant

nostre vie, & apres nostre mort.

La crainte que l'ennemy ayant fait quelque feinte, ne retournast sur ses brisées, obligea tout ce conuoy de charité de repartir le mesme iour, & sans delay, & retourner en haste, d'où ils estoient partis, sans boire & sans manger, par des chemins fascheux, & en vne saison bien penible, la neige ayant dessa couuert la terre.

Deux iours apres la prise & l'incendie de ce bourg, les habitans retournerent, qui ayans trouvé la démarche qu'avoit pris l'ennemy par vn autre chemin, s'e-stoient doutez du malheur arrivé. Mais ils le virent de leurs yeux, & à la veue des

cendres, & des corps morts de leurs parens, de leurs femmes, & de leurs enfanssils furent vne demy-iournée dans vn profond silence; assis à terre, à la sau-uage, & sans leuer les yeux, ny pousser mesme aucun souspir, comme des statuës de marbre, sans parole, sans regars, & sans mouuement. Car c'est là le dueil des Sauuages; au moins des hommes & des guerriers: les larmes, les plaintes & les crys estant, disent-ils, pour les femmes.

La perte & du Pasteur & du troupeau nous ont esté sensibles; mais il faut qu'en l'vn & en l'autre nous adorions & nous aimions les conduites de Dieu sur nous, & sur nos Eglises, & que nous soyons disposez d'agreer iusqu'à la fin tout ce

qu'il voudra

Le Pere Charles Garnier nasquit à Paris l'année 1605. il entra en nostre Compagnie l'année 1624. & ainsi il n'aquoit guere plus de 44 ans , le 7. Decembre 1649. iour auquel il mourut dans l'employ vrayement Apostolique, dans lequel il auoit vescu, depuis l'an 1636. qu'il quitta la France, & monta dans le païs des Hurons.

es années 1649. & 1650. 35

Dés son enfance il auoit eu des sentimens de pieté tres-tendres, & principalement vn amour filial à l'endroit de la tres-saincte Vierge, qu'il appelloit sa Mere. C'est elle, disoit-il, qui m'a porté dessus ses bras, dans toute ma ieunesse, & quim'a mis dans la Compagnie de son Fils. Il auoit fait vn vœu de soustenir iusqu'à la mort, son Immaculée Conception. Il est mort à la veille de cette auguste Feste, pour aller la solemniser plus

augustement dans le Ciel.

Dés son Nouitiat, il paroissoit vn Ange: sa modestie estant si rare, qu'on le proposoit à tous les autres, comme vn miroir de saincteté. Il auoit eu de tresgrandes difficultez à obtenir permission de son pere, pour entrer en nostre Compagnie: mais elles furent bien plus grandes, lors que dix ans aprés cette premiereseparation, il fallut luy en faire agreer vne seconde plus sensible di estoit son départ de la France, pour venir en ces Missions du bout du monde: Nos Superieurs ayans desiré que son Perey donnast son consentement, à cause des obligations particulieres, que luy auoit nostre Compagnie. Son voyage en sut re-

36 Relation de la Nouvelle France, tardé vne année toute entiere: mais ce ne fut que pour enflammer ses desirs. Iour & nuict, il ne songeoit qu'à la conuersion des Sauuages, & à y consommer sa vie, iusqu'au dernier souspir. Il plût à Dieu déslors de luy donner des pressentimens de la mort qui luy est arriuée; mais si puissans, si doux, & si aimables, que ie puis dire que déslors il estoit mort vrayement au monde, & que le monde luy estoit comme vn' cadavre mort, pour lequel on n'a plus que de l'horreur & du dégoust. Il fut donc vn an tout entier pour combattre tous les efforts de la nature, en son bon pere, qui ne pouuoit entendre à vne si dure separation. Il y employa, & amis, & larmes, & prieres, & des mortifications continuelles. Enfin il obtint ce grand coup du Ciel, auec tant de ioye de son cœur, qu'il estimoit cette iournée la plus heureuse qu'il eust euë toute sa

Passant la mer, il sit dans le nauire des conuersions notables. Entr'autres il sut aduerty, qu'il y auoit parmy les mate-lots, vn homme sans conscience, sans Religion, & sans Dieu, qui suyoit tout le monde, & que tout le monde suyoit.

es années 1649 & 1650.

Il yauoit plus de dix ans qu'il ne s'estoit confessé. Le Pere porté de son zele ordinaire, entreprit cette humeur noire, & cét homme desesperé, & apres mille tesmoignages de charité, qu'il luy rendit, par toute sorte de soins, d'instructions, & debons ossices, ensin il le gagna, & luy sit faire vne confession generale, & il le mit dans vne si grande paix, & ioye de conscience, que tout le monde en sut estonné & touché.

Dés qu'il fut arriué aux Hurons, on eût en sa personne vn ouurier infatigable, remply de tous les dons de la Nature & de la Grace, qui peuuent rendre vn Missionaire accomply. Il posseda la langue des Sauuages en vn degré si eminent, qu'ils l'admiroient eux-mesmes. Il entroit si auant dans les cœurs, & auec vne eloquence si puissante, qu'il les rauissoit tous à soy: son visage, ses yeux, son ris mesme, & tous les gestes de son corps ne preschoient que la saincteté. Mais son cœur parloit plus haut que ses paroles, & se faisoit entendre mesme dans son silence: l'en sçay plusieurs qui se sont conuertis à Dieu, aux seuls regars de son visage, qui estoient vrayement

C iij

Angeliques, & qui donnoient de la deuotion, & des impressions de Chasteté à ceux qui l'abordoient, soit qu'il fut en prieres, soit qu'il parût rentrer en soy, se recueillant de l'action d'auec le prochain: soit qu'il parlast de Dieu, soit mesme lors que la Charité l'engageoit dans d'autresentreties, qui donoient quelque relasche à son esprit. L'amour de Dieu qui regnoit en son cœur, animoit tous ses mouuemens, & les rendoit diuins.

Ses vertus estoient herosques, & il ne luy en manquoit pas vne de celles qui font les plus grads Saints. Vne Obeissace accomplie capable de tout faire, & preste à ne rien faire, si son Superieur ne vouloit. Vne Humilité si profonde, que quoy que tout fut eminent en luy, non seulement il s'estimoit le plus indigne de cette Mission, mais il croyoit que Dieu le punissoit terriblement de ses infidelitez, lors qu'il voyoit quelqu'vn auoir quelque opinion de luy. Ce luy estoit vn des tourmens des plus sensibles qui pût luy arriuer. Et ie sçay que souuent en ces rencontres, pour donner à ces mesmes personnes de bas sentimens de soy-mesme, il leur descouuroit ses défauts, & ce

es années 1649 et 1650. 39 qui luy donnoit plus d'horreur de foymesme, croyant qu'en suite on le deust auoir en horreur.

Son oraison estoit si respectueuse en la presence de Dieu, & si paisible dans le silence de toutes ses puissances, qu'à peine souffroit-il la moindre distraction, quoy qu'au milieu des employs les plus dissipans. Ce n'estoient que colloques, qu'affections & qu'amour, dés le commencement de l'Oraison; & ce seu s'alloit allumant toussours iusqu'à la sin-

Sa mortification estoit égale à son amour: il la cherchoit & nuict & iour, tousiours couché dessus la dure, & portant tousiours sur son corps quelque partie de la Croix, qu'il cherissoit durant sa vie, & sur laquelle il desiroit mourir. Chaque fois qu'il retournoit de ses Missions, il ne manquoit iamais de faire racerer les pointes de fer, d'vne ceinture toute herissée de moletes d'esperon, qu'il portoit sur la chair nuë: & outre cela, tres-souuent il vsoit d'vne discipline de fer, armée aussi de pointes tres-aiguës. Son viure n'estoit autre que celuy des Sauuages, c'est à dire, le moindre qu'vn miserable gueux peut esperer en France, G iiii

Ao Relation de la Nouvelle France, Cette derniere année de famine, le gland. & les racines ameres luy estoient des delices: non pas qu'il n'en sentit les amertumes, mais il les sauouroit auec amour: quoy que toussours il eust esté vn enfant chery & d'vne maison riche & noble, & tous les amours de son Pere; esleué dés le berceau en d'autres nourritures qu'en celles des Pourceaux. Mais tant s'en faut qu'il s'estimast miserable dans ce grand abandon de toutes choses, où il estoit; & qu'il eust voulu dire, ce que disoit l'enfant Prodigue, Quanti mercenary in domo Patris mei abundant panibus: ego autem hie fame pereo; qu'au contraire il s'estimoit heureux de tout souffrir pour Dieu Jan Jan 1997 Miller British

Dans les dernieres lettres, qu'il m'elcriuit trois jours auant sa mort; pour response à vne demande que je luy faisois touchant l'estat de sa santé, & s'il n'estoit point à propos qu'il quittast pour quelque temps sa Mission, asin de venir nous reuoir, & reparer vn peu ses forces: Il me respondit tres au long quantité de raisons, qui l'obligeoient de demeurer en sa Mission; mais raisons qui ne prenoient leur sorce que de l'esprit de charité, & du

es années 1649. & 1650. 41 zele vrayement Apostolique dont il estoit remply. Il est vray, m'adioustoitil, que ie souffre quelque chose du costé de la faim: mais ce n'est pas iusqu'à la mort; & Dieu mercy, mon corps & mon esprit, se soustiennent dans leur vigueur. Ce n'est pas de ce costé là que le crains, mais ce que ie craindrois dauantage, seroit qu'en quittant mon troupeau en ces temps de miseres, & dans ces frayeurs de la guerre, qu'il a besoin de moy, plus que iamais; ie ne manquasse aux occasions que Dieu me donne, de me perdre pour luy; & qu'en suite, ie ne me rendisse indigne de ses faueurs. Ie n'ay que trop de soin de moy-mesme, adioustoitil; & si ie voyois que les forces fussent pour me manquer, puisque vostre Reuerence me le commande, ie ne manquerois pas de partir : car ie suis tousjours prest de tout quitter, pour mourir dans l'obeissance, où Dieu me veut:sans cela, ie ne descendray iamais de la Croix où fa bonté m'a mis

Ces grands desirs de saincteté auoient creu auec luy dés son bas âge. Pour moy, l'ayant connu depuis plus de douze ans, qu'il respandoit deuant moy tout

42 Relation de la Nouvelle France, son cœur, comme il faisoit deuant Dieu mesme; ie puis dire auec verité, qu'en toutes ces années, ie ne croy pas que hors le sommeil, il ayt esté vne seule heure, sans ces desirs ardens & vehemes de s'auancer de plus en plus, dedans les voyes de Dieu, & d'y auancer son prochain. Hors de cela, rien au monde ne le touchoit; ny parens, ny amis, ny repos, ny consolation, ny peines, ny fatigues. Son tout estoit en Dieu, & hors de luy, tout ne luy estoit rien.

Il prenoit des malades, & les portoit sur ses espaules, vne & deux lieuës, pour leur gagner le cœur, & pour auoir occasion de les baptizer. Il faisoit les dix & les vingt lieuës, durant les chaleurs de l'Esté les plus excessiues, & par des chemins dangereux, où fans cesse les ennemis faisoient quelques massacres. Il couroit hors d'halene apres vn seul Sauuage, qui luy seruoit de guide, pour aller baptizer, ou quelque moribond, ou quelque captif de guerre, qu'on deuoit brusler le jour mesme. Il a passé des nuicts entieres dans des esgaremens & des chemins perdus, au milieu des neges profondes, & des plus grands froids de l'Hyuer, sans que son zele fust arresté d'aucune saison de l'année.

Durant les maladies contagieuses, qu'on nous fermoit par tout les portes des cabanes; & qu'on ne parloit d'autre chose que de nous massacrer, non seulement il marchoit teste baissée, où il sçapoit qu'il y eust vne seule ame à gagner pour le Paradis; mais par vn excez de ce tele, & vne industrie de Charité, il trousoit les moyens de s'ouurir tous les chenins qu'on luy fermoit, de rompre tous es obstacles; quelquesfois auec violene. Mais ce qui estoit de plus diuin, en out ce procedé, qui n'auoit rien de la rudence humaine; c'est que dés son enrée, il gagnoit les esprits farouches, l'vne seule parole, & qu'il venoit à bout le son dessein. Rien ne le rebutoit, & ousiours il esperoit en bien, des ames es plus defesperées.

Il auoit vn recours particulier aux Anges, & en ressentoit des secours tresquissans. Des Sauuages, qu'il alloit assider à l'heure de la mort, l'ont veû acompagné d'vn ieune homme, disoient-ls, d'vn esclat maie lueux, qui se tenoit à son costé, & qui

les animoit à obeir aux instructions du Pere. Ces bonnes gens n'en pouvoient dire dauantage, & demandoient quel estoit ce compagnon, qui rauissoit ainsi leur cœur. Ils ne sçauoient pas que les Anges font plus que nous dans la conversion des Pecheurs, quoy que pour l'ordinaire leur operation ne soit pas si visible.

Son inclination la plus grande, estoit à affister les plus abandonnez: & quelque humeur rebutante que pût auoir quelqu'vn, si chetif & impertinent qu'il pût estre; il sentoit esgalement pour tous des entrailles de Merein'obmettant mesme aucun acte de Misericorde corporelle, qu'il pût pratiquer, pour le salut des ames On l'a veû panser des viceres si puants, & qui rendoient vne telle infection, que les Sauuages, & mesmeles parens plus proches des malades, ne les pouuoient souffrir. Luy seul y mettoit la main tous les iours, en essuyoit le pus, & nettoyoit la playe, deux & trois mois de suite, auec vn œil & vn visage qui ne respiroit que charité: quoy que souuent il vist tres-bien que ces playes estoient incurables. Mais, disoit-il, plus elles

es années 1649. 65 1650. 45 ont mortelles, plus i'ay de pente à en prendre le soin; afin de conduire ces bauures gens iusqu'à la porte du Paradis, & afin d'empescher leur cheute dans e peché, en vn temps, qui est pour eux, le plus perilleux de la vie.

Il n'y auoit dans tout le pais des Huons, aucune Mission où il n'eust esté, & l en auoit commencé plusieurs, nomnement celle où il est mort. Il agissoit uec les Sauuages, dans vne grande Prudence, & auec vne douceur de Charité, qui sçauoit tout excuser, & tout supporer, quoy qu'elle n'eust rien de lasche.

Il n'auoit aucune attache à son trauail; ny aux personnes, ny aux lieux, ny aux employs. Mais enuisageant la volonté de Dieu esgalement en toutes choses; en quelque lieu qu'il fust quelque occupaion que l'obeissance luy ordonnast; dés ce mesme moment, il s'y portoit auec courage, auec constance, & comme vn homme qui n'auoit plus d'autres pensées au monde, sinon de trouuer Dieu, où on vouloit qu'alors il le cherchast. Souuent on luy a fait quitter le soin des Missions, où estoit tout son cœur; pour labourer la terre, pour seruir d'vn homme de

46 Relation de la Nouvelle France, voiture, & traisner sur les neiges, com me vn cheual à la charuë; pour prendre le soin des malades, pour auoir soin de la cuisine, pour aller chercher cà & la dans les bois, quelques raisins sauuages & faire les dix & douze lieuës pour en trouuer sa charge, & pour en retirer apres de longs trauaux, à peine ce qu'il faut de vin, pour celebrer quelques Messes le reste de l'année. Par tout il estoit égal à soy-mesme, & à le voir, on eust iugé qu'il n'auoit point d'inclination', sinon pour ce qu'on luy voyoit faire, & que c'estoit là le vray employ, où il fut appellé de Dieu. On ne fera rien, disoitil, pour le salut des ames, si Dieu ne se met de la partie auec nous: quand c'est luy qui nous y applique, par la conduite de l'obeissance, il est obligé de nous y assister, & auec luy nous y ferons ce qu'il attend de nous. Mais quand c'est que nous cherissons vn employ, fut-il le plus sainct de la terre, Dieu n'est pas obligé d'estre de la partie: il nous laisse à nous-mesmes, & de nous-mesmes que pouuons-nous sinon vn rien, où le peché qui nous met au dessous du rien? Il n'estoit pas tellement attaché à la

es années 1649. & 1650. 47 conversion des Hurons, que son cœur ne le transportast aux Nations les plus esson'y eust-il que les enfans à aptizer, qui, disoit-il, sont vn gain cerain pour le Ciel. Il nous disoit souvent qu'il eust esté bien aise de tomber entre es mains des Iroquois, & d'estre leur captif: que s'ils l'eussent brussé tout vif, il eust eu pour le moins ce loisir là, de les nstruire, autant de temps, qu'ils proongeroient ses tourmens: Que s'ils luy eussent donné la viesc'eust esté vn riche moyen de procurer leur conversion, qui nous est impossible; le chemin nous en estant fermé, tandis qu'ils sont nos en-

Ie finiray ce Chapitre, par quelques points d'vne lettre, que m'escriuit celuy de nos Peres, qui l'enterra, & qui auoit passé en Mission auec luy, les dernières années de savie, voicy comme il m'en escrit.

Puisque vostre Reuerence desire que ieluy escriue, ce que ie sçay des vertus du Pere Charles Garnier, ie coucheray icy ce que i'en ay remarqué. le puis dire en general, que ie ne connoissois point de vertu, qui luy manquast, & qu'il les

48 Relation de la Nouvelle France; auoit toutes dans vn haut degré. Ie puis aussi asseurer, qu'en quatre ans que i'ay esté son compagnon, ie ne l'ay iamais veu faire vne faute, qui fut directement contre quelque vertu Il cherchoit vrayment Dieu dans son employ, & non pas soy-mesme; & ie n'ay iamais pû remarquer que la nature agit en luy, particulierement dans les fonctions de nos Missions. Il se portoit ardemment à quoy que ce fust; auec autant de zele pour les affaires d'autruy, & pour l'auancement des autres Eglises; comme de la sienne. le l'ay toussours veu dans vne grande esgalité, parmy la diuersité des succez, son cœur, ny son visage, ne paroissoit iamais troublé de quoy que ce fust. Il iouissoit d'vne grande paix d'esprit, qui prouenoit d'vne grande conformité qu'il auoit aux volontez de Dieu; à laquelle vertu, depuis quelque temps, il s'estudioit particulierement. Tout le monde sçait le zele qu'il auoit pour la conversion des Sauuages, comme il aymoit d'estre en Mission la peine qu'il auoit à la quitter, & combien il pressoit, lors qu'il estoit à la maison, pour retourner en Mission. Il me souvient que dans ma

es années 1649. 60 1650. 49 ma maladie, lors qu'on me croyoit tout proche de la mort, vn soir en me veillant, il me demanda, que lors que ie serois en Paradis, ie priasse pour la Mission de Saint Ioseph, dont alors il auoit le soin, il me demanda cela vniquement, & d'vne façon que ie ne puis expliquer, & qui me fit conceuoir qu'il ne songeoit à rien, qu'au bien de sa Mission. l'admirois souuent en luy qu'il ne parloit iamais en mauuaise part, d'aucun Sauuage, quelque impertinent qu'il fust : & moy souuent luy parlant de quelque faute qui m'eust dépleu en eux; il escoutoit paisiblement, & l'excusoit; ou bien ne disoit mot: & iamais ie n'ay pû remarquer ny en ses paroles, ny en ses actions, si peu que ce soit de passion à l'endroit d'aucun Sauuage. Il n'auoit point d'autres pensées, que des choses de sa Misfion : il estoit ignorant de la France comme vn homme qui iamais n'en eust esté; & les nouuelles qu'il en entendoit vne fois chaque année, faisoient si peu d'impression dans son esprit, qu'il les oublioit incontinét. Cen'estoit qu'auec violence qu'il se captiuoit à l'entretien

de quelques letres, dont il ne se pouuoit

Relation de la Nouvelle France, dispenser. Il sembloit n'estre nay que pour la conversion des Sauvages: sa ferueur en cét endroit croissoit tous les iours. Il auoit vn sensible regret, quand quelque petit enfant luy eschappoit, mourant sans Baptesme: cette nouuelle le surprenoit, & l'affligeoit, comme vn autre seroit affligé de la mort d'vn de ses plus proches parens. Son zele estoit infatigable: il quittoit souuent le manger & le repos pour ses Chrestiens. Ie l'ay veu partir souuent d'vn tres mauuais temps, & marcher auec de grandes incommoditez, allant d'vn bourg à l'autre; tomber dans les Rivieres; Rien n'estoit capable de l'arrester, quand il estoit question de trauailler pour les Sauuages. Il s'accommodoit bien auec fon compagnon, quel qu'il fust, iamais il ne m'a dit parole, qui fust le moins du monde contre la Charité. Il prenoit tousiours le pire pour soy, & m'accommodoit en tout; & il taschoit de couurir sa charité du pretexte de sa propre commodité; comme si ce qui estoit le pire, luy eust esté le plus commode. Son obeissance estoit rare, & pleine de sousmission, & de simplicité, quoy qu'il sût quelquesois

es années 1649. 6 1650. particulier en ses pensées : dez le moment qu'il connoissoit vn sentiment contraire à celuy du Superieur, il agissoit auec autant d'ardeur dans l'esprit d'autruy, qu'il eust fait dans le sien. Il estoit tres-exact dans l'observation de nos Regles; & quelque occupation qu'il eust, pour la conversion des Sauvages, iamais il n'eust perdu aucun temps de ses Oraisons, de ses lectures spirituelles, ny de son examen. Il retranchoit de son sommeil ce qui luy eust manqué pour cét effet, dans la brieueté du iour. Sa Chasteté estoit si pure, qu'elle me paroissoit Angelique : dans vne Modestie aussi rare, que l'en aye point veu en France. Mais sur tout, i'admirois son Humilité, il auoit vn tres-bas sentiment de soy-mesme, & quoy qu'il eust des talens eminens pour ces Missions, neantmoins il se postposoit à tous les autres. Les louanges des hommes ne le touchoient aucunement. le ne l'ay iamais ouy parler, ny à son auantage, ny auec mespris d'autruy. Iusques icy sont les termes du Pere qui m'escrit. l'ay creû que dans la naifueté de cette

lettre, ceux qui sçauent ce que c'est de la

vertu solide, & qui ont l'œil ouuert aux choses qui vrayement rédent vne ame grande aux yeux de Dieu; y descouuriront vn thresor, que possedoit ce seruiuiteur de Dieu. l'adiousteray icy seulement, que tous ceux qui l'ont pratiqué, l'ont estimé vn Saint, & qu'il auoit l'approbation de tout le monde, sans en excepter aucun. Les Hurons le nommoient Orâcha.

Voicy encorvn petit mot qu'il escriuit de l'Isle de sainct Ioseph à ses deux freres, sçauoir est le R.P. Henry de S. Ioseph de l'Ordre des Carmes, & le R. P. Ioseph de Paris Capucin. Cette lettre fait voir la trempe de son cœur, & le pressentiment qu'il auoit de sa mort. Ce petit mot, dit-il, est pour nous encourager tous trois à nous haster d'aimer nostre bon Maistre; car ie croy qu'il est difficile que quelqu'vn de nous trois nesoit bien proche du terme de sa carriere. Redoublons donc nos ferueurs, hastons le pas, redoublons nos prieres les vns pour les autres, & faisons vne nouvelle protestation, que celuy que nostre Seigneur appellera le premier à soy de nous trois, sera l'aduocat des

deux qui resteront, pour leur obtenir de Nostre Seigneur son sainct amour, & vne parfaicte vnion auec luy, & vne perseuerance sinale. Ie fais donc le premier cette protestation, & prie Nostre Seigneur de tout mon cœur, de posseder nos trois cœurs, & de n'en faire qu'vn auec le sien dés à present & dans l'eternité. Voila le stile d'vn Sainct qui aimoit ses freres en Saint & comme des Saints aussi aussi auons-nous appris qu'il auoit des marques de saincteté dés sa tendre ieunesse.

Deffunct Monsseur Garnier son pere, auoit coustume de donner tous les mois quelque piece d'argent à ses enfans pour leurs petits diuertissemens dans leurs estudes, le P. Charles Garnier estant pensionaire en nostre College de Paris, & sortant les iours de congé pour s'aller vn petit recreer en ville, au lieu de porter son argent en vn ieu de paulme, l'alloit ietter dans la boëtte des prisonniers du petit Chastelet: L'vn de ses bons freres qui luy a veu donner pour vne seule aumosne toute la recreation d'vn mois, adiouste, que passant vn iour sur le Pontneuf, & voyant vn liure sale & impie,

D iij

14 Relation de la Nouvelle France, qu'on disoit auoir esté composé par Theophile, il l'achepta, & le mit en estat den'estre iamais leu de personne, peut estre, disoit-il, que quelqu'vn le lisant offenseroit Dieu, il vaut mieux l'achepter & le perdre. Vne autre fois ses camarades estans entrés dans vn cabaret pour y faire bone chere, comme il estoit de la Congregation de Nostre Dame, qui deffend aux ieunes gens d'entrer dans de semblables lieux, il les attendità la porte comme vn laquais attendroit son maistre, ces preludes marquant vne grande saincteté future. Ie ne m'estonne pas si Monsieur son pere voyant que son fils vouloit estre Iesuiste, dit à l'vn de nos Peres, Si ie n'aimois vniquement vostre Compagnie, ie ne vous donnerois pas vn enfant qui depuis sa naissance iusques à maintenant n'a iamais commis la moindre desobeifsance, & ne m'a jamais causé le moindre déplaisir. La gloire de sa mort a couronné l'innocence de sa vie.

## CHAPITRE IV.

De la mort du Pere Noël Chabanel.

Voicy la sixies me victime que Dieu apris à soy, de ceux de nostre Compagnie, qu'il auoit appellé en cette Mission des Hurons; n'y ayant eû encore aucun de nous quiy soit mort, sans y respandre son sang, & consommer le sa-

crifice tout entier.

Le Pere Noël Chabanel estoit compagnon de Mission du Pere Charles Garnier, & lors que le bourg de sain& Iean fut pris par les Iroquois, il n'y auoit que deux iours qu'ils s'estoient separez, selon les ordres qu'ils en auoient receu: Nos Peres & moy ayans iugé à propos de ne pas tenir deux Missionaires exposez dans le danger, outre que la famine y estoit si extreme, qu'ils ne pouuoient trouuer vne nourriture suffisante pour deux personnes. Mais Dieu ne voulut pas qu'ayans vescu ensemble sous le ioug d'vne mesme Mission, ils fussent separez à la mort. D iiij

56 Relation de la Nouvelle France,

Cebon Pere, reuenant donc où l'obeissance le rappelloit, auoit passé par la Mission de sainct Mathias, où estoient deux autres de nos Peres, & les auoit quitté le matin du septiesme iour de Decembre. Ayant fait six grandes lieuës d'vn chemin tres-difficile; il fut surpris de la nuict, au milieu des bois, estant en compagnie de sept ou huict Chrestiens Hurons. Son monde estoit couché & endormy; luy seul veilloit, & estoit en priere. Sur la minuit il entend du bruit, & des cris : partie de l'armée ennemie victorieuse, qui tenoit ce chemin; partie aussi des captifs, pris ce iour là mesme dans le bourg de sainct Iean, qui chantoient leur chanson de guerre selon leur coustume. Le Pere à ce bruit resueille ses gens, qui sans delay prennent la fuite par dans les bois, & enfin se sauuerent, s'estans dispersez çà & là, & ayans pris leur route vers le lieu mesme d'où venoit l'ennemy, quoy qu'vn peu à l'escart.

Ces Chrestiens eschappez du peril, arriuerent à la Nation du Petun, & sirent leur rapport, que le Pere auoit sait quelque chemin, voulant les suiure: mais es annees 1649. & 1650.

que n'en pouuant plus, il s'estoit mis à genoux, & qu'il leur auoit dit, N'importe que ie meure; cette vie est bien peu le chose, c'est le bon-heur du l'aradis, que les Iroquois ne me pourront rauir.

Sur l'aube du iour, le Pere ayant chanzé de route, voulant venir nous trouier en l'Isle où nous estions, se vit arreté au bord d'vne riuiere, qui luy traueroit son chemin. Vn Huron en a fait le apport; adioustant qu'il le passa dans on canot, au deçà de la riuiere; & que our fuir plus lestement, il s'estoit deshargé de son chapeau, & d'vn sac où stoient ses escrits, & d'vne couverture, ui sert à nos Missionnaires de robe & de nanteau, de paillasse & de matelats, de et, & de tout autre meuble, & mesme e maison, lors qu'ils sont en campagne, 'ayans point pour lors, d'autre abry. Du epuis nous n'auons pû apprendre aucue autre nouvelle du Pere.

Nous ne sommes pas asseurez, comnent il sera mort, & s'il ne sera point ombé entre les mains des ennemis, qui n essect tuerent sur le mesme chemin, ne trentaine de personnes. Ou plustost ue s'estant esgaré dans les bois, il y

58 Relation de la Nouvelle France, soit mort, partie de faim, partie de froid, au pied de quelque arbre, où la foiblesse l'ayt obligé de s'arrester. Mais apres tout, ce qui nous semble plus probable, c'est qu'il aura esté tué par ce Huron, le dernier qui l'ayt veu, autrefois Chrestien, & depuis Apostat; lequel pour iouyr des despouilles du Pere, l'aura assommé, & aura ietté son corps dans la Riuiere. Si nous eussions voulu poursuiure cette affaire, ie croy que nous cussions trouvé des preuues conuainquantes contre ce meurtrier : Mais dans ces miseres publiques, nous iugeasmes plus à propos d'estouffer les soupçons qu'on pouuoit en auoir; & nous-mesmes fermasmes les yeux à ce que nous estions bien aises qu'on ne vit pas. Ce nous est assez que Dieu soit seruy.

Le Pere Noël Chabanel nous estoit venu de la Prouince de Tolose, l'année 1643 ayant esté receu en nostre Compagnie dés l'année 1630 alors aagéseulement de dix-sept ans. Dieu luy auoit donné vne forte vocation en ces païs, mais elle ne sut pas sans combat estant icy, mesme apres les trois, les quatre, & les cinq ans d'estude, pour apprendre la

es annees 1649. & 1650. 59 langue des Sauuages, il s'y voyoit si peu auance, qu'à peine pouuoit-il se faire entendre dans les choses les plus communes. Cette mortification n'est pas petite à vn homme qui brusse du desir de la conversion des Sauuages, & qui d'ailleurs n'auoit iamais manqué my dememoire, ny d'esprit, qu'il auoit fait assez paroistre, ayant enseigné quelques années, auec satisfaction, la Rhetorique en France. Son humeur, en suite de cela, estoit si essoignée des façons d'agir des Sauuages, qu'il ne pouuoit quasi rien agreer en eux , leur veuë luy estoit onereuse, leur entretien, & tout ce qui venoit de ce costé là. Il ne pouuoit se faire aux viures du Païs, & la demeure des Missions estoit si violente à toute sa nature, qu'il y auoit des peines extraordinaires, sans aucune consolation; au moins de celles qu'on appelle sensibles, tousiours coucher à plate terre, viure depuis le matin iusqu'au soir dans vn petit enfer de fumée, & dans vn lieu où souuent le matin on se trouve couvert de neiges, qui entrent de tous costez dans les cabanes des Sauuages; où on est remply de vermine; où tous les sens ont cha-

60 Relation de la Nouvelle France, cun leur tourment, & de nuich, & de jour, n'auoir iamais que de l'eau toute pure pour esteindre sa soif, & les meilleurs metz qu'on y mange pour l'ordinaire, n'estant que de la cole, faite de farine de bled d'Inde bouillie dans l'eau: y trauailler sans cesse, estant tousiours si mal nourry, & n'auoir pas vn seul moment de la iournée, auquel on puisse se retirer en vn lieu, qui ne soit public: n'auoir point d'autre chambre, d'autre sale, ny d'autre cabinet, pour faire ses estudes; non pas mesme aucune autre lumiere, que celle d'vn feu enfumé, entourré en mesme temps de dix & de quinze personnes, & d'enfans de tous aages, qui crient, qui pleurent, qui y disputent, qui s'entretiennent de leur mesnage; qui y font leur cuisine, leur repas, leur trauail, en vn mot tout ce qui se fait dans la maison. Quand Dieu auec cela retire ses graces sensibles, & se cache à vne personne, qui ne respire qu'apres luy; quand il·la laisse en proye à la tristesse, & aux dégousts, & aux auersions de la Nature: ce ne sont pas là des espreuues qui soiet à la portée d'vne vertu commune; & il faut que l'amour de Dieu soit alors puises années 1649 & 1650.

lant dans vn cœur, pour n'y estre pas estoussé. Ioignez les veuës continuelles des perils, dans lesquels on se trouue à chaque moment, d'estre attaqué d'vn Ennemy barbare, qui souuent vous sera oussir mille morts, auant que d'en nourir d'vne seule; qui n'a que des seux des slammes, & des cruautez inouyes. Sans doute qu'il faut vn courage digne les enfans de Dieu, pour ne pas perdre

œur au milieu de cét abandon.

C'à esté dans cét abandon que Dieu a oulu esprouuer les cinq & six années, la delité de ce bon Pere. Mais tant s'en aut que le Diable ayt iamais rien gaigné ur luy, de ce coste là ; quoy qu'il luy epresentast chaque iour, Que retourant en France, il y trouuerroit & la bye,&le repos, & les consolations qu'il auoit receues, tout le temps passé de vie: qu'il n'y manqueroit pas d'emloy plus sortable à son naturel, & dans equel tant d'ames Saintes pratiquent autement la vertu de Charité, dans le ele des Ames, & consomment leur vie our le salut de leur prochain lamais our tout cela, il n'a voulu se détacher ela Croix où Dieu l'auoit mis; iamais

il n'a demandé d'en sortir. Mais au contraire, pour s'y attacher plus inuiolables ment, il s'obligea par vœu d'y demeurer iusques à la mort, afin de mourir en la Croix. Voicy la teneur du vœu qu'il en conçeût, & ces propres termes.

Domine Iesu Christe, qui me Apostolorum Sanctorum huius Vinea Huronica adiutorem, licet indignissimum, admirabili dispositione tuæ paternæ Prouidentiæ Voluisti. Ego, Natalis Chabanel, impulsus desiderio seruiendi Spiritui tuo sancto, in promouenda barbaro rum Huroniæ, ad tuam fidem conversione: Voueo, coram sanctissimo Sacramento pretiost Corporis & Sanguinis tui, Tabernacu. lo Dei cum hominibus, perpetuam stabilitas tem in hac Missione Huronica : omnia intelligendo iuxta Societatis, & Superiorum eins interpretationem, & dispositionem. Obsecre te igitur, suscipe me in seruum huius Missionis perpetuum, & dignum effice tam excelse ministerio, Amen. Vigesimadie Iunij 1647.

Vne disposition admirable de vostre Paternelle Providence, auez voulu que it fusse Coadjuteur des Sainces Apostre de cette vigne des Hurons, quoy que i'en sois tout à faict indigne. Me sen

es annees 1649. 65 1650. 65 tant poussé du desir, de seruir aux intentions qu'a sur moy vostre saince Esprit, pour auancer la conuersion à la foy, des barbares de ce pais des Hurons; Moy, Noel Chabanel, estant en la presence du tres-sainct Sacrement, de vostre Corps & de vostre Sang precieux, qui est le tabernacle de Dieu auec les hommes: Ie fais vœu de perpetuelle stabilité en cette Mission des Hurons; entendant le tout, selon l'interpretation des Superieurs de la Compagnie, & selon qu'ils voudront disposer de moy. le vous consure donc, mon Sauueur, qu'il vous plaise me receuoir pour seruiteur perpetuel de cette Mission, & que vous me rendiez digne d'vn ministere si sublime. Amen.

Il sit ce vœu le iour du tres-Saint Sarement, de l'année 1647. & quoy que du depuis ces reuoltes de la Nature yent tousiours donné de l'exercice à sa vertu; la grace a tousiours esté la maitresse, & Dieu luy a donné cette persererance, qu'il desiroit si ardemment.

La derniere fois qu'il se separa d'auec nous, pour aller en la Mission où il est nort; embrassant, & disant le dernier 64 Relation de la Nouvelle France, adieu, à celuy de nos Peres, qui auoit le soin de la conduite de son ame; Mon cher Pere, luy dit-il, que ce soit tout de bon cette fois, que ie me donne à Dieu, & que ie luy appartienne. Mais il profera ces paroles d'vn sibon accent, & d'vn visage si resolu à la vraye sainteté, qu'il toucha viuement celuy de nos Peres auquel il parloit; lequel ayant trouvé à l'heure mesme, vn de ses amys, ne pût s'empescher de luy dire; Vrayement ie viens d'estre touché! Ce bon Pere vient de me parler auec l'œil & la voix d'vne victime qui s'immole: le ne sçay pas ce que Dieu veut faire, mais ie voy qu'il fait vn grand-Saint.

En effet, Dieu le disposoit au sacrisse ce; & il luy donnoit à luy-mesme, quelque sorte de presentiment. Il auoit diturn de ses amys; Iene sçay ce qu'il y a en moy; & ce que Dieu veut disposer de moy: mais ie me sens tout changé en vn point. Ie suis fort apprehensis de mon naturel; toutesois maintenant que ie vay au plus grand danger, & qu'il me semble que la mort n'est pas essoignée, iene sens plus de crainte. Cette dispositione de la mort n'est pas essoignée, iene sens plus de crainte. Cette dispositione de la mort n'est pas essoignée, iene sens plus de crainte. Cette dispositione de la mort n'est pas essoignée, iene sens plus de crainte. Cette dispositione de la mort n'est pas essoignée, iene sens plus de crainte. Cette dispositione de la mort n'est pas essoignée, iene sens plus de crainte. Cette dispositione de la mort n'est pas essoignée, iene sens plus de crainte. Cette dispositione de la mort n'est pas essoignée, iene sens plus de crainte. Cette dispositione de la mort n'est pas essoignée, iene sens plus de crainte. Cette dispositione de la mort n'est pas essoignée, iene sens plus de crainte. Cette dispositione de la mort n'est pas est disposition

Lors

sition ne vient pas de moy.

es années 1649. 65 1650. 65

Lors qu'il partit de la Mission de sain et Mathias, le iour mesme de sa mort, parlant au Pere qui l'embrassoit. Ie vay, dit-il, où l'obeissance me rappelle: mais où ie ne pourray, ou i'obtiendray du Superieur, qu'il me renuoye dans la Mission qui estoit mon partage, il faut seruir

Dieu-iusqu'à la mort.

On verra dans la lettre suiuante, qu'il a escrit au R.P Pierre Chabanel son frere Religieux de nostre Compagnie, les sentimens qu'il auoit des souffrances. Peu s'en est fallu, dit-il, dans les apparences humaines, que V.R. n'ait eu vn frere Martyr: mais helas! il faut deuant Dieu, vne vertu d'vne autre trempe que la mienne pour meriter l'honneur du Martyre: Le R. P. Gabriel Lallemant l'vn des trois que nostre Relation din auoir souffert pour Iesus-Christ, auoit pris ma place au bourg de sainct Louys depuis vn mois deuant sa mort, que ie fus enuoié comme plus robuste de corps en vne Mission plus eloignée & plus laborieuse: mais non pas si fertile en Palmes & en Couronnes que celles dont ma lâcheté m'auoit rendu indigne devant Dieu. Ce sera quand il plaira à la

66 Relation de la Nouuelle France, diuine Bonté pourueu que de mon costé ie tâche de faire, Martyrem in Vmbra & Martyrium sine sanguine. Les rauages des Iroquois sur ce pais feront peut estre vn iour le reste par les merites de tant de Saincts, auec lesquels i'ay la consolation de viure si doucement parmy tant de tracas & de dangers continuels de la vie. La Relation me dispensera d'adiouster autre chose à la presente, aussi bien n'ay-ie ny papier ny loisir qu'autant qu'il en faut pour supplier V. R. & tous nos Peres de sa Prouince de se souvenir de moy au sainct Autel, comme d'vne victime destinée peut estre au feu des Iroquois, Vt merear tot Sanctorum patrocinio victoriam in tam forti certamine: Ce sont ses paroles dignes d'vn homme qui n'attendoit que le moment du sacrifice.

## CHAPITRE V.

De la Mission de Sain Et Matthias.

Estoit icy la seconde des Missions, que nous auions dans la Nation du Petun. Depuis la mort des deux PP dont es années 1649 & 1650. 67
ous auons parlé; la necessité d'ouuriers
ous obligea de ne faire plus qu'vne
lission, dans toutes commontagnes,
urchargeant les deux autres Peres, qui
réstoient, du soin de ces pauurés Eglies desolées, qui venoient de perdre
eurs Pasteurs: & mesme, quelque temps
pres, nous nous vismes contrains de ne
inser qu'vn seul des deux Peres, pour
out le Christianisme, vne maladie surenue à l'vn d'eux, nous ayant obligé de
e rappeller en vn lieu, où il pûst receloir vn peu plus d'assistance.

Dans les grandes fatigues de ces Missons, exposées à tous les malheurs dont a Nature peut auoir plus d'horreur, ce l'est pas vne des Croix des moins pelances, de se voir seul, dans vne Eglise dissiée, qui ne faisoit que naistre : de se voir ceablé dés le matin jusqu'au soir, d'vn nonde de Catechumenes & de Chretiens, dont il faut baptizer les vns, enendre les autres en Confession, apprendre à la plus-part les Prières & le Catehisme, & les Mysteres de nostre Foy, olliciter les insideles à ce qui est de leur alut, aller chercher & les vns & les autres, dans de phanes abandonées, où la

pauureté mesme habite, mais ou l'esprit de la Foy, n'y est pas moins diuin, que dans les Loures & dans les Palais les

plus superbes de l'Europe.

Quelques Capitaines infideles, ani mez contre les progrez de la Foy, & cro yans qu'elle seule estoit la ruine des pais qui se font Chrestiens, firent courir vne calomnie contre nous, afin d'irriter tout le peuple, & l'animer à la vengeance. On assemble pour cette effet les plus considerables d'vn bourg, dependant de cette Mission, (c'estoit le bourg de sainct Mathieu, dont nos Peres estoient alors absens: ) On publie hautement dans ce conseil de sedition, qu'vn certain Huron eschapé depuis peu de jours, des mains des Iroquois plus voisins de Kebec; y auoit veu de grands coliers de Porceleine, enuoyez de la part d'Onnontio, (c'est le nom que donnent les Hurons à Monsieur nostre Gouverneur.) Que cet Onnontio voulant diuertir les armes des Iroquois, crainte qu'ils ne se iettassent sur les François de Montreal, des Trois Riuieres, & de Kebec; auoit enuoyé ces presens, & ces coliers de Porcelene, das le pais ennemi, afin de les inniter de coduies annees 1649. O 1650. 69

e vne armée dans le pais des Hurons & u'il leur auoit promis, que les François ui y estoient, trahiroient les Hurons & Algonquins; faisans mine de se portra auec courage, à leur dessens le comat, ils ne tueroient personne, ayans requi des ordres secrets de sa part, de ne narger leurs armes à seu, sinon de poute seule, sans bale & sans plomb.

En suite de cette calomnie, on nous it plus noirs que nos robes, on crie aux aistres & à la trahison, on ne parle que nous massacrer, & les bouteseux de tte sedition, disent hautement, qu'il ut assommer le premier des François

i'on auroit au rencontre.

En effet, nos deux Missionaires, faisans ar course, fort peu de iours apres, à ce urg de leur departement, où ce conil s'estoittenu: de loin qu'on les est perceu, on crie, Au meurtre & au mascre: on court aux portes par où ils doint entrer: on les reçoit auec des crys des huées, semblables à celles, dont on cueille les prisonniers de guerre, qui nt destinez pour le seu. Nos Peres enent à leur organaire, auec vn yisage

70 Relation de la Nouvelle France, asseuré. Qui craint Dieu, ne craint pas le creatures, & ceux qui ne souhaittent qu de mourir en son service, ne palissent pa en ces rencontres. Les seditieux s'entre parlent, pour voir celuy qui leueroit le hache, sur ces deux victimes innocentes Ils ne jettent sur eux, que des yeux de fu reur & leur cœur ne respire rien que l sang. Mais Dieu leur lia les mains pou ce coup. Ces deux bons Peres passent travers cette foule d'impies, sans rece uoir aucun dommage. Plusieurs qui n'e stoient pas de la conjuration, mais qu n'en pouvoient ignorer les conclusions qu'on auoit publiées, se disoient les vn aux autres: Ne sont ce pas ceux-cy qu l'on devoit massacrer? comment don ont-ils trauersé au milieu de leurs enne mis, preparez pour le meurtre? on el sortyàla foule, pour les tuër, & pas v toutesfois n'a fait le coup, que tant d monde auoit promis de faire.

Dieune se contente pas de proteger no Peres en cerencontre mais pour recom penser les fatigues & les dangers de leu voyage, en la monnoye dont il paye le iournées de ses seruiteurs en vn seul iou ils baptizerent dix-sept Personnes dans

és annees 1649. 6 1650. 71 ce bourg, où ils deuoient trouuer da mort; & ils y confesserent quantité de Chrestiens.

Le bourg de S. Iean n'auoit pas encore esté pris, ny desolé par les Iroquois, lors que cette sedition arriva: mais ce sut fort peu de jours apres: & nous auons sujet de croire, que la mort du Pere Noël Chabanel, n'a esté qu'vn effect de cette coniuration. Veu nommement que le Huron, sur lequel tomba le soupçon de l'assassinat, comis en la personne de ce Pere, estoit du bourg de S Mathieu; & qu'vne personne de confiance nous a dit, auoir entendu de sa bouche; qu'il s'estoit vanté d'estre le meurtrier, & d'auoir défait le monde de cette voirie de François, & d'auoir iette dans la riuiere son cadavre, l'ayant assomme à ses pieds Quoy qu'il en soit, ce n'est pas vn petit bon-heur pour ceux qui viuent en ces contrées, de sçauoir & de voir, que seur vie est entre les mains de tout le monde; & qu'ils doiuent attendre la mort, autant de la part de ceux mesmes qu'ils reconoissent pour amis, que d'vn Iroquois ennemy.

En vn autre bourg, dependant de cette mesme Mission, nos Peres y auoient eri-

E iiij

72 Relation de la Nouvelle France, gévne petite Chapelle, & ils y auoient esseué vn clocher, pour y appeller les Chrestiens, & mettre dans ce nouveau Christianisme, les exercices de deuotion, qui estoient desia establis dans les Eglises plus anciennes. Les infideles entrent en fureur à la veuë de ces obiets de pieté; ils contresont les possedez du Diable, s'ils ne le sot en verité; ils rompet tout, &ils profanét ce lieu de sain cteté; ils dérobent & ils pillent les petits meubles de cette pauure Eglise, & tout ce qu'auoiét les Peres, qui alors en estoiet absens ayans esté faire leurs visites en des bourgades plus esloignées. On porte côme en triomphe ces dépouilles de la maison de Dieu; on vomit des imprecations contre ceux qui preschent sa parole, & on publie hautement qu'ils meritent la mort.

Ces insolences sont arrivées plus d'vne sois: mais qui a Dieu pour protecteur,
experimente mille sois en vn seul Hyuer,
que le Diable peut bien entrer en rage
contre nous, & qu'il a sujet de le faire,
voyant qu'on luy enseue sa proye; mais
qu'apres tout, Dieu est le maistre, qu'yn
seul cheueune peut tomber de la teste de
ses serviteurs, sans sa diuine volonté; &

es années 1649. 65 1650. 73 que la foy ne porte iamais plus de fruits, que lors qu'elle est dauantage persecutée. Il falloit que le nombre des Eslus de Dieu fut accomply en toutes ces contrées, auant que leur desolation arrivast

qui estoit si prochame.

Vn pauure, mais excellent Chrestien de cette Mission, estoit tombé entre les mains des ennemis, & n'attendoit rien que le feu pour son supplice. Il eût recours à Dieu dans sa necessité. MonDieu, dit-il, ie croy de tout mon cœur, que vous seul estes le maistre de nos vies : si vous voulez, i'esprouueray dés auiourd'huy, que ma foy m'aura déliuré de la mort, qui sans vostre secours m'est tout à fait inéuitable. Chose estrange! ce pauure homme fut déliuré à l'heure mesme de sa captiuité, l'Iroquois qui venoit de le prendre captif, l'ayant renuoyé, sans sçauoir pourquoy. Ce Chrestien se nomme Pierre Outouré.

CHAPITRE VI.

De la Mission de sainct Charles.

Velques Hurons, de ceux qui l'an passé, craignans le feu des Iro-

74 Relation de la Nouvelle France, quois, auoient quitté leur pais, & s'essoignoient de nous, pour fuir encore plus loin, ce cruel ennemy: estans arrivez en vn lieu qu'ils iugerent assez propre pour s'y habituer, s'y arresterent & y bastirent leurs cabanes, à dessein de s'y fortisser, & d'y faire yn nouveau pais. Deux de nos Missionaires, l'vn de langue Algonquine, & l'autre qui parle Huron, ayans parcouru tout l'Esté, les costes de nostre mer douce, pour le secours spirituel tant des Hurons, qui alors y estoient dispersez, que des peuples Algonquins, nous representeret à leur retour, qu'il seroit à la gloire de Dieu, que quelqu'yn de nous hyuernast en ce lieu, où plus de monde deuoit se rassembler. Nous y destinasmes donc vn de nos Peres, de la langue Hurone, qui nous quitta au mois d'Octobre.

Lors qu'il sut arrivé en cette nouvelle habitation quelques Chrestiens le receurent chez eux, auec vne charité qui n'eût rien de sauuage. La premiere chose qu'ils firent, sut de dresser de quelques écorces d'arbres, vne Chapelle, riche dans sa pauureté, où depuis le matin iusqu'au soir, Dieu ne laissoit pas d'estre adoré, au milieu de ces vastes sorests, où iamais il n'a-

uoit receu cét hommage.

es années 1649. & 1650. 75

Plusieurs qui n'estoient pas Chrestiens, se rendirent aussi-tost aux instructions qu'on leur donna. Quelques autres accu-soient la Foy, d'estre vne chose mauuaise, & ne vouloient pas y entédre disans que iamais leur pais n'auoit esté si affligé, que lors qu'on auoit comencé tout de bon, à quitter leurs ancienes superstitios, & à receuoir le Baptesme. Ces gés-là estoiet les plus riches, & les plus à leur aise, il falloit que Dieu les humiliast, pour les sauuuer.

En effect, come ils n'auoiet quali aucune prouisson de bled, & que le plus fort de leur esperace estoit sur la peche, qui toutes les années est tres-abondante en ce lieu là, pendant l'Hyuer; iamais elle ne s'y est veuë si malheureuse que celle-cy. Ils font des trous dans la glace, espaisse de deux & de trois pieds: au dessous de laquelle ayans trouue l'eau viue, ils iettent leurs rets, où d'ordinaire on puise quantité de poisson, qui accourt à ces ouuertures. Mais cet Hyuer ils ne trouuoient das leurs filets aucun poisson, dix ou douze petits haracs, qui quelquefois s'y rencontroient, estoit vne manne du Ciel, à ces pauures gens, qui mouroient de faim. Ils se viret bien-tost au bout de leurs perites prouisions; sans bled, sans gland, & sans legumes. D'aucuns alloient peler les arbres, & faisoient bouillir les escorces, pour les rendre mangeables: d'autres viuoient d'une certaine mousse, qui s'attache aux rochers, & d'une espece de tondre, qui pourry dedans l'eau, s'humecte, & se renste comme une éponge Une sois chaque iour, on faisoit cuire das une grade chaudiere, un petit morceau de poisson ensumé, qui rendoit un bouillo amer, dont un chacun beuuoit abondamment, afin de se remplir, & d'estousser sa faim par ces lauaces d'eau:

Ce bon Pere, se vit en sin reduit à cette vie, l'espace de cinquante iours: qui apres tout luy estoient des iours bien-heureux; qui le faisoient benir Dieu, voyant que cette misere publique, abbatoit la superbe de ceux qui du commencement n'auoient pas voulu l'escouter. Ils venoient comme des moutons, & demandoient le saint Baptesme; non pas dans l'attente d'aucun secours, qu'ils pussent esperer, d'un homme qu'ils voyoient dans la famine aussi bien qu'eux: mais à cause qu'ils admiroient que son courage n'en fust pas abbatu qu'il estoit seur con-

es années 1649. & 1650. 77 solation, dans la veuë qu'il seur donnoit. alors, d'vn bon-heur eternel, exempt de toutes ces miseres. Il faut bien, disoient ils, que ce qu'il nous presche soit vray, puis qu'il ne craint pas de mourir auec nous, & de faim, & de froid; & qu'il nous enseigne le mesme dans nostre Pauureté, qu'il faisoit lors qu'il estoit plus à son aise.

sur la fin de l'Hyuer ces pauures fameliques, se voyans mourir tous vifs dans ces miseres, se dissiperent çà & là. Vne partie vinrent nous trouuer en l'Isle où nous estions, y esperans plus de secours. Le Pere les yaccompagna; & apres six grandes iournées d'vn chemin tres-penible, sur les glaces, de cette mer alors glacée, il arriua heureusement en cette maison.

nailon. Vn autre de nos Peres, qui auoit hyuerné en la Mission de Saint Pierre, encore plus esloignée, n'eût pas moins à souffrir, dans les mesmes miseres, qui partout ont consommé ces peuples 82 dont partout Dieu a tiré sa gloire, disposant toutes ces ames pour le Ciel, par des voyes adorables

De la Mission du Saint Esprit.

Ette Mission estoit pour les Nations de la langue Algonquine, qui n'ont point de demeure asseurée, aussi peu que les poissons, de la pesche desquels ils viuent, sur les costes du grand Lac, qu'ils habitent, tantost en vn lieu, & tantost en vn autre, selon les diuerses saisons de l'année; ou selon que les craintes des Iroquois les obligent de s'essoigner plus loin, du peril qui les menace chaque iour. C'est à dire que nos Peres qui ont eu le soin de cette mission, y ont mené vne vie errante, auec ces peuples errans, & ont este quasi tousiours dessus les eaux, ou fur quelques rochers affreux, battus des flots & des tempestes. Mais partout, Dieu s'y est fait connoistre; n'estant pas moins le Dieu des Mers, que le Dieu de la terre. Quantité de ces nations errantes, ont pris seu depuis vn an aux paroles de l'Euangile: quantité se sont faits Chrestiens, & ont receu le faint Baptesme: mesme leurs Capitaines, qui iamais n'auoient voulu se faire instruire. Voicy ce que 

es années 1649 et 1650. 79 m'en escriuoit le Pere qui cét Huuer auoit le soin de cette Mission. Ie benis Dieu, dit-il, de l'assiduité de ces bonnes gens à venir prier Dieu: l'admire leur innocence, & le desinteressement du temporel; eux ne me demandans rien; & moy n'ayant tien dequoy leur donner.

Les barbares ne sont pas si barbares qu'on les croit en France, ou pour mieux dire, il faut aduouer que la soy dompte la barbarie, & qu'elle donne vn cœur Chrestien, à des gens qui n'auoient que

des cœurs de beste.

Il estoit temps que Dieu leur donnast cét esprit de foy: car le Printemps estant venu, les Iroquois partys de deux cents lieues de là, surprirent vne partie de ces bons Neophytes, dans le lieu qu'ils estimoient le plus affeuré pour leur vie. Ils entraisnerent dans la Captiuité, hommes, femmes, & enfans; fans pardonner à cet aage innocent, qu'ils brussoient au milieu des flammes, auec des cruautez inconceuables. Les voyes de Dieu sont adorables il laisse prosperer les ennemis de son saint Nom; en mesme téps qu'il abandonne à toutes les miseres, ceux qui commencent à l'adorer. Qu'il en soit beny à iamais.

## CHAPITRE VIII.

De la desolation du pais des Hurons, au Prin-

temps de l'année 1650. Ous auions passé tout l'Hyuer, dans les extremitez d'vne famine qui a regné par toutes ces cotrées, & qui partout a enleue vn tres-grand nombre de Chrestiens, continuant tousiours ses rauages, & iettant le desespoir partout. La faim est vn tyran inexorable, qui iamais ne dit c'est assez, qui iamais ne donne de treue; qui deuore tout ce qu'on luy donne; & si on manque à le payer, il se repaist du sang humain, il vous déchire les entrailles, sans qu'on puisse euiter sa rage, ny se soustraire de saveuë, tout aueugle qu'il est. Mais le Printéps estant venu, les Iroquois nous furent encore plus cruels: & ce sont eux qui vrayement ont ruiné toutes nos esperances, & qui ont fait vn lieu d'horreur, vne terre de sang & de carnage, vn theatre de cruauté, & vn sepulchre de carcasses décharnées par les langueurs d'vne longue famine, d'vn pais de benediction, d'vne terre de Sainteté, & d'vn lieu qui n'auoit plus rien de barbare, depuis que le sang des

es années 1649 & 1650.

respandu pour son amour auoit rendu

tout son peuple Chrestien.

Nos pauures Hurons affamez furent contraints de se separer d'auec nous ; au commencement du mois de Mars, pour aller chercher quelque gland au sommet des montagnes qui se découuroient de leurs neges; ou pour aller à quelques pesches, en des lieux plus exposez au Soleil du Midy, ou les glaces se fondet plustost. Ils esperoient en ces lieux escartez, de trouuer quelque petit soulagement à la famine, qui les faisoit mourir tout vifs, comme vn ennemy trop domestique renferme dans leurs propres maisons, & qui s'estoit rendu le maistre de la place. Mais ils craignoient en mesme temps, de trouuer vne mort plus cruelle, & de tomber dans les feux & les flammes des Iroquois, allans ainsi chercher leur vie. Ils se cofessent aust que de partir, ils redoublét leurs deuotions d'autant plus que leurs miseres s'augmentet: plusieurs se comunient pour se disposer à la mort, iamais leur foy ne fut plus viue, & l'esperance du Paradis ne leur parut iamais plus douce, que dans ce desespoir & cet abandon de leur vie. Ils diuisent leurs troupes; afin

82 Relation de la Nouvelle France, que si les vns tomboient entre les mains de l'ennemy les autres pussent eschaper. Le grand Lac, qui entouroit nostre Isle de Saint Ioseph, n'estoit alors rien qu'vne crouste de glaces, espaisses de deux & de trois pieds. A peine ces bons Chrestiens nous quittoient ils deveuë, que ces glaces fondent sous leurs pieds: d'aucuns se novent dans ces abysmes, & y trouueret leur tombeau; les autres s'en retirét plus heureusement quoy que transis d'un froid mortel. Ce fut vne mort bien cruelle, a de pauures vieillars, à des femmes & à des enfans, de rendre l'ame sur ces neges fans aide & fans secours mais nonpas sans la consolation de celuy, qu'ils adoroient dedans leur cœur, & qui iamais n'y pût mourir

Ante ans, ayant passé toute la nuit couchée au milieu de ces glaces, y sut trouuée pleine de viele lendemain matin. On luy demande, qui l'auoit conseruée. le m'escriois de sois à autres, respodit elle, Lesous taitent, Iesus ayez pitié de moy: en mesme temps ie me sentois toute es chaussée le froid me saississant à quelque temps de là, ie recommençois ma priere, es années 1649. Es 1650. 83

& mon corps reprennoit sa chaleur, i'ay
passe toute la nuit en cette sorte, & i'attendois la mort auec plaisir. Cette pauure semme, ne sçauoit rien que ces deux
mots de toutes ses prieres, elle en réchapa pour lors mais du depuis elle est tombée entre les mains des ennemis, & y
trouua la fin de ses miseres.

Nos pauures fameliques començoiem à ionir des douceurs de leur pesche; qu'ils trouverent affez abondante: mais leur ioye deuoit estre plus pour le Ciel, que pour la terre. Le jour de l'Annonciation, vingt-cinquiesme de Mars, vnearmée d'Iroquois ayans marché prez de deux-cents lieues de pais, à trauers les glaces & les neges, trauerfans les montagnes & les forests pleines d'horreur; surprirent au commencement de la nuit, le camp de nos Chrestiens; & en sirent vne cruelle boucherie Il sembloit quele Ciel conduisit toutes leurs demarches, & qu'ils eussent vn Ange pour guide : car ils diuiserent leurs troupes auec tant de bon-heur, qu'ils trouderent en moins de deux iours; toutes les bandes de nos Chrestiens, qui estoient dispersées çà & làs esloignées les vnes des autres, de six,

Fij

Relation de la Nouvelle France, sept, & huit lieuës. Cent personnes en vn lieu; en vn autre cinquante: & mesme il y auoit quelques familles solitaires, qui s'estoient escartées en des lieux moins connus, & hors de tout chemin. Chose estrange! de tout ce monde dissipé, vn seul homme s'eschapa, qui vint nous en apporter les nouvelles: comme il arriva autresois à ce prodige de Patience, auquel il ne restoit dedans ses pertes; sinon vn triste messager, qui venoit hors d'halene, luy en donner aduis, & luy rendre son mal-heur plus sensible.

Ma plume n'a plus d'ancre, pour exprimer la rage des Iroquois, en ces rencontres, elle à horreur de representer si souuent des spectacles de cruauté, ausquels nos yeux ne peuuent pas s'appriuoiser, aussi peu que nos sens; qui iamais ne sont insensibles à l'excez de tous ces tourmens de fureur. Nostre vnique consolation, c'est que ces supplices d'horreur, trouuent la fin auec nos vies, & que Dieu les couronnera d'vn bon-heur qui n'a

point de fin.

Du depuis, les malheurs nous ont accueilly à la foule, à peine les Chrestiens, qui restoient dans le bourg Saint Ioseph, es années 1649. 65 1650. 85

auoient respiré quelques iours; pour rcleuer leurs esperances, apres vn coup si rude, qui les auoit tous abbatu. Ils tremblent dans la crainte des flammes, & de la cruauté des Iroquois: mais vn mal qu'ils n'enuisagent que de loin, leur paroist moins terrible, que la douleur presente, d'vne famine insupportable, qui les portoit iusques aux rebuts de la nature, & les faisoit deuorer des carcasses pourries: la Mere n'auoit point d'horreur d'assouuir sa faim enragée du corps de son enfant; & les enfans ne pardonnoient pas au corps de leur Pere.

La faim, dit-on, fait sortir les loups hors du bois. Nos Hurons fameliques, sont aussi contrains de sortir hors d'un bourg, qui n'estoit remply que d'horreur. C'estoit sur la fin de Caresme Helas!que ces pauures Chresties eussent esté trop heureux, s'ils eussent eû dequoy le ieusner, au gland & à l'eau. Le iour de Pasque, nous leur fismes faire vne communion generale: le lendemain, ils se separerent d'auec nous: nous laissans tous leurs petits meubles: dont la pluspart declarerent publiquement qu'ils nous faisoient leurs heritiers; voyans bien que leur F iii

86 Relation de la Nouvelle France, mort n'estoit pas essoignée, & qu'ils la

portoient dans leur sein.

En effect, peu de jours s'escoulent, que nous apprenons les nouvelles du malheur que nous aujos preueu Ce pauure troupeau dissipé tombe dans les embusches de nos ennemis Iroquois : les vns sont tuez sur la place; on traisne les autres captifs; on brusse les femmes & les enfans quelques vns s'échaperent du milieu de ces stammes, qui apportent l'es-

froy & la terreur par tout

Huit iours apres, vn semblable malheur accueille encore vne autre bande. Ce ne sont que massacres en quelque lieu qu'ils aillent. Par tout la famine les suit; où ils rencontrent vn ennemy, plus cruel que la cruauté mesme: & pour comble d'vne misere sans ressource, ils apprenent que deux puissantes armées sont en chemin, pour les venir exterminer : que la premiere vient à dessein de faire le dégast dans leurs champs, d'arracher leurs bleds d'Inde, & de desoler la campagne; que la seconde armée doit moissonner tout ce qui auroit eschapé la fureur des premiers. Ce n'est que desespoir par tout. Dans le plus fort de toutes ces alarmes,

es annees 1649. 65 1650. deux anciens Capitaines viennent me trouuer en secret, & me firent cette harangue. Mon frere, me dirét-ils, tes yeux te trompent lors que tu nous regarde: tu croy voir des hommes viuans; & nous ne sommes que des spectres, & des ames de trespassez. Cette terre que tu foule aux pieds vas 'entr'ouurir, pour nous abismer auec toy; afin que nous soyons au lieu qui nous est deu parmy les morts. Il faut que tu sçache, mon frere, que cette nuit dans vn conseil, on a pris la resolution d'abandonner cette Isle. La pluspart ont dessein de se retirer dans les bois, afin de viure solitaires, & qu'homme du monde ne sçachant où ils sont, l'ennemy n'en puisse auoir la connoissance: Quelquesvns font estat de reculer à six grandes iournées d'icy : les autres prennent leur route vers les peuples d'Andastoé, alliez de la nouuelle Suede a d'autres disent tout haut, qu'ils vont mener leurs femmes & leurs enfans, pour se ietter entre les bras de l'ennemy; où ils ont vn grand nombre de leurs parens, qui les desirent, & qui leur donnent aduis, qu'ils ayent à se sauuer au plustost, d'vn païs desolé, s'ils ne veulent perir dessous ses ruines: Mon F iiij

Relation de la Nouvelle France, frere, adioustoient-ils, que feras-tu solitaire en cette Isle, lors que tout le monde t'aura quitté? es-tu venu icy pour cultiuer la terre? veux tu enseigner à des arbres? ces Lacs, & ces Riuieres, ont elles des oreilles pour escouter tes instructions ? pourrois tu suiure tout ce monde, qui se va dissiper? la pluspart trouueront la mort, où ils esperent trouuer la vie : quand tu aurois cent corps, pour te diuiser en cent lieux, tu ne pourrois pas y suffire, tu leur serois à charge, & tuleur serois en horreur: La famine les suiura par tout, & la guerre les trouverra. The second of the second

Mon frere, prend courage, m'adiouflerent ces Capitaines. Toy seul, nous
peux doner la vie, si tu veux faire vn coup
hardy. Choisis vn lieu, où tu puisse nous
rassembler, & empesche cette dissipatio,
iette les yeux du costé de Quebec, pour y
transporter les restes de ce païs perdu,
n'attes pas que la famine, & que la guerre,
ayêt massacré iusques au dernier, tu nous
porte dedas tes mains, & dans ton cœur.
La mort tien a rauy plus de dix mille. Si
tu dissere dauantage il n'en restera plus
vn seul. & alors tu aurois le regret de n'a-

es années 1649. 0 1650. uoir pas sauué ceux que tu aurois pû retirer du danger, & qui t'en ouurent les moyens. Situ escoute nos desirs, nous ferons vne Egliseà l'abry du fort de Kebec : nostre foy n'y sera pas esteinte : les exemples des Algonquins & des François nous tiendront en nostre deuoir: leur charité soulagera vne partie de nos miseres: & au moins y trouuerons-nous quelquefois quelque morceau de pain pour nos petits enfans, qui depuis si long temps, n'ont que du gland, & des racines ameres, pour soustenir leur vie. Apres tout, deussions nous mourir auec eux, la mort nous y sera plus douce, qu'au milieu des forests, où personne ne nous assisteroit à bien mourir, & où nous craignons que nostre foy ne s'affoiblisse auec le temps, quelque resolution que nous ayons de la cherir plus que nos vies.

Ayant entendu le discours de ces Capitaines, i'en sis le rapport à nos Peres.
L'affaire estoit trop importante, pour la
conclure en peu de iours. Nous redoublons nos deuotions; nous consultons
ensemble; mais plus encore auec Dieu;
nous faisons des prieres de quarantes
heures, pour reconnoistre ses sainctes vo-

90 Relation de la Nouvelle France,

lontez. Nous examinons cette affaire, quinze,seize & vingt fois Il nous semble de plus en plus que Dieu auoit parlé par la bouche de ces Capitaines. Car nous voyons qu'il estoit vray, que tout le pais des Hurons, n'estoit plus qu'vne terre d'horreur, & vn lieu de massacre. En quelque endroit que nous iettassions nostre veuë, nous estions conuaincus, que la famine d'vn costé, & la Guerre d'vn autre, acheueroient d'exterminer ce peu qui restoit de Chrestiens. Mais si nous les pouuions mener à l'abry du fort de nos François, de Montreal, des trois Riuieres, ou de Quebec; nous iugions qu'en effet ce seroit là l'vnique lieu de leur refuge que les secours que nous pourrions leur rendre, y seroient plus puissans, & que leur foy y seroit plus en asseurance: en vn mot, que Dieu y seroit plus glorifié. 

Ce fut vn sentiment si general de tous nos Peres, que ie ne pû y resister, estant d'ailleurs bien asseuré que leur cœur estoit tellement attaché aux croix & aux soussirances, qu'ils cherissoient dans cette heureuse Mission; que chose au monde ne les eust pû détacher sinon l'ynique veuë de la plus grande gloire de Dieu.

L'ennemy cependant continue tousjours ses massacres; la famine va nous
depeuplant, si nous ne hastons nostre retraicte nous sauuerons moins de Chrestiens. Le dessein en ayant esté pris à loisir, l'execution en deuoit estre prompte;
crainte que l'Iroquois n'entendant ces
nouvelles, n'allast nous tendre des embusches, pour nous arrester au passage:

Ce ne fut pas sans larmes que nous quittalmes ce pais, qui possedoit nos cœurs, qui arrestoit nos esperances, & qui estant desia rougy du sang glorieux de nos freres, nous promettoit vn semblable bon-heur, nous ouuroit le chemin du Ciel, & la porte du Paradis Mais quoy! il faut s'oublier de soy-mesme, & quitter Dieu, pour Dieu, ie veux dire, qu'il merite luy seul d'estre seruy, sans la veue de nos interests, sussent ils les plus Saints que nous puissons auoir au monde.

Dans ces regrets, ce nous fut vne confolation, d'emmener auec nous de pauures familles Chrestiennes; enuiron trois cents ames: tristes reliques d'vne nation autresois si peuplée; que les mi-

92 Relation de la Nouvelle France, feres ont accueilly, au temps qu'elle a esté la plus fidele a Dieu. Le Ciel y auoit ses esluz; il s'est peuplé de nos despouilles, en depeuplant la terre: & ce nous est assez, pour nous contenter dans nos pertes, de voir que ceux qui sont restez auec nous; ayans perdu leurs biens, leurs parens, leur patrie, n'ayent pas perdu leur foy. Plus de trois mille auoient depuis vn an receu le Saint Baptesme, qu'eussions nous pû plus saintement leur souhaitter, sinon qu'ils emportassent dans le Ciel leur innocence baptismale? Dieu leur a fait cette grace, plustost qu'ils ne s'y attendoient, pourrions-nous bien nous plaindre, qu'il leur ayt hasté ses faueurs? puisque nous-mesmes nous nous fussions estimez trop heureux, de mourir en leur compagnie pour iouir du mefme bon-heur.

Par les chemins, qui sont d'enuiron trois cents lieues, nous auons marché sur nos gardes, comme dans vne terre ennemie: n'y ayant aucun lieu où l'Iroquois ne soit à craindre, & où nous n'ayons veu des restes de sa cruauté, ou des marques de sa persidie. D'vn costé nous enuisagions des campagnes, ou il

es années 1649. & 1650. n'y a pas dix années, que i'y comptois les huit & dix milles hommes: de tout celà, il n'en restoit pas mesme vn seul. Passant plus outre, nous costoyions des terres, nouuellement rougies du sang de nos Chrestiens. D'vne autre part vous eussiez veu des pistes encores toutes fraisches, de ceux qu'on auoit emmenez captifs. Vn peu plus loin; il n'y auoit que des carcasses de cabanes, abandonnées à la fureur de l'ennemy, ceux qui les habitoient ayans pris la fuite dans les bois, & s'estans condamnez à n'auoir plus d'autre demeure qu'vn perpetuel bannissement. Les Nipissiriniens. peuples de la langue Algonquine, auoiet estétout nouvellement massacrez dans leur lac, de quarante lieuës de contour: lequel autrefois i'auois veu habité quasi tout le long de ses costes, & lequel maintenat n'est plus rien qu'vne solitude. Vne iournée plus en deçà nous trouuasmes vue forteresse, où les Iroquois auoient. passé l'Hyuer venans à la chasse des hommes. A quelques lieues de là, nous en trouuasmes encore vne autre. Par tout, nous marchions sur les mesmes démarches de nos plus cruels ennemis.

94 Relation de la Nouvelle France,

Au milieu du chemin, nous eusmes vne alarme assez viue, vne troupe d'enuiron quarate François, & de quelques Huros, qui auoient hyuerné à Kebec, & qui motoient cette grande riuiere, apperceurent quelques pistes de nos découureurs, & creuret que c'estoit l'ennemy: En mesme temps nostre auant-garde eût aussi connoissance des pistes de ceux qui venoiet de nous découurir. Les vns & les autres estans rerournez sur leurs pas, chacun se prepare au combat : mais estans venus aux approches nos alarmes furent bientost changées en joye.

Ces François que nous cusmes au rencontre, auoient fait prise depuis fort peu de iours, de quelques Iroquois, qui auoient voulu les surprendre, & qui eufsent fait vn coup aussi heureux qu'il estoit remply de courage, s'ils se fussent assez promptement retirez apres leur premica redescharge. Ils n'estoient que dix Iroquois, qui auoient hyuerné enuiron sois xante lieues au desfus des Trois Riuieres. où ils ne viuoient que de chasse; attendas au Prin-téps quelque bande, ou de François, ou de Hurons qui passeroient par là: Cesennemis ayans apperceu sur le soir,

es annees 1649. 65 1650. 95 la fumée du feu de nos François, qui s'estoiet cabanez enuiron vne lieuë proche de leurs embusches, viennent de nuict les reconnoistre, & ils eurent bien l'asseurance, dix qu'ils estoient, d'en attaquer soixante. Il est vray qu'ils se glisserent à la faueur d'vne nuiet obscure, & qu'ils prirent leur route auec tant de bon-heur, qu'ils ne furent pas apperceus des sentinelles, finon lors qu'ils estoient desia dedans le camp, & qu'ils déchargerent les coups de mort sur les premiers qu'ils rencontrerent en leur chemin, tout le monde estant endormy

Il semble que la mort ne cherchoit que les bons Chrestiens, & les colomnes de nostre Eglise Huronne; ils en tuerent sept auant qu'on se fust reconnu, entrautres vn Capitaine nommé lean Baptiste Atironta, dont souvent nous auons parlé dans nos Relations precedentes, lequel ayant hyuerné à Kebec cette derniere année, y auoit edifié tout le monde, par l'innocence de savie, & par l'exemple de les vertus per la life

Le Pere Breffany qui nous ramenoit cette troupe, auec laquelle il estoit descendu des Hurons sur la fin de l'Esté

Relation de la Nouvelle France, precedent, se resueille au bruit de ces meurtres, il voit à ses costez ses compagnons, qui desia auoient receu le coup de la mort, il crie aux armes, & en mesme temps il recoit trois coups de fléche dans la teste, qui le couurent tout de son sang. On accourt au secours, six Iroquois furent tuez sur la place, deux furent pris captifs; les deux derniers n'en pouuant plus laschent le pied, & se sauuent à la fuite. Voila quels sont nos ennemis, ils sont sur vous, lors qu'on les croit à deux cents lieues de là; & au mesme moment ils l'esuanouissent de vos yeux, si ayans fait leur coup ils veulent songer à la retraicte.

Cette troupe, qui nous eût au rencontre: ayant appris la des route de tout le pais des Hurons, prend dessein de retourner dessus ses pas Nous suiuons donc nostre chemin. Helas que ces malheureux Iroquois ont causé de desolation en toutes ces contrées! Lorsque ie montois cette grande Riuiere, il n'y a que treze ans: ie l'auois veû bordée de quantité de peuple de la langue Algonquine, qui ne connoissoient pas vn Dieu: & lesquels au milieu de l'insidelité s'estimoient les

Dieux

es années 1649 & 1650. 97 Dieux de la terre : voyans que rien ne leur manquoit, dans l'abondance de leurs pesches, de leurs chasses, & du commerce qu'ils auoient auec leurs nations alliées: & auec celà, ils estoient la terreur de leurs ennemis. Depuis que la foy est entrée dans leur cœur, & qu'ils ont adoré la Croix de Iesus-Christ; il leur a donné pour partage vne partie de cette Croix vrayement pesante: les ayar mis en proye aux miseres, aux tourmens, & à des morts cruelles, en vn mot, c'est vn peuple effacé de dessus la terre. Nostre vnique consolation, c'est qu'estans morts Chrestiens, ils sont entrez dans le partage des veritables enfans de Dieu-Flagellat Deus omnem filium quem recipit.

## CHAPITRE IX.

De l'establissement de la Colonie Huronne, à Kebec.

Pres enuiron cinquante lournées; d'un chemin tres penible; dans lequel nous filmes quantité de naufrages; plusieurs de nous estans tombez dans des precipices affreux, & dans le milieu des abismes; d'où Dieu nous retiroit d'y ne main amoureuse, contre nos esperances: ensin nous arrivasmes à Kebec, le vint-huitiesme de Iuillet.

Montreal, où nous y fusmes receus auec vn cœur de Charité vrayement Chrestienne. C'est vn lieu auantageux pour l'habitation des Sauuages. Mais cette place estant frontiere à l'Iroquois, que nos Hurons suyent plus que la mort mesme: ils ne pûrent pas se resoudred'y commencer leur Colonie. Si l'Iroquois pouuoit estre arresté: cette Isle seroit bien-tost toute peuplée: & mesme ie ne suis pas hors d'esperance, qu'auant l'Hy-uer quelques familles de ces bons Chrestiens sugitifs, n'y aillent faire leur demeure.

C'est la coustume de ces Peuples, mesme des Insideles, lors qu'vne nation se resugie dans quelque pais estranger; que ceux qui les reçoiuent les distribuent incontinent dans diuerses maisons, où non seulement on leur donne le giste, mais aussi les necessitez de la vie, aues vne Charité qui n'a rien de barbare. qui vn iour fera honte à quantité de peuples, qui sont nez dans le Christianisme. l'ay veu dans les Hurons pratiquer tressouuent cette hospitalité: autant de sois que nous y auons veû des nations desolées, des bourgs ruinez, & quelque peuple fugitif, sept & huit cent personnes trouuoient dés leur abord, des hostres charitables, qui leur tendoient les bras, qui les secouroient auec joye, & qui mesme leur distribuoient vne partie des terres desia ensemencées, asin qu'ils pûssent viure, quoy qu'en yn païs estranger, comme dans leur Patrie.

moins, vne partie de cét accueil, estans arriuez à Kebec Les Religieuses Hospitalieres ouurirent incontinent & leur cœur, & leurs mains, & le sein de leur Charité: non seulement pour les malades: mais aussi pour quelques vnes de ces pauures familles, que la famine poursuiuoit. Les Vrsulines parcillement, auec leur bonne fondatrice, Madame de la Peltrie, ont entrepris en ce tencontre, au dessus de leurs forces mais non pas au dessus de leur consiance qu'elles ont en Dieu, elles se charge,

100 Relation de la Nouvelle France, rent incontinent d'vne famille tresnombreuse: la premiere qui dans le pais des Hurons ayt embrassé la foy. Leur seminaire fut ouuert a de petites filles, qui accreurent leur nombre, & le zele de ces bonnes Meres, ne trouuant point quasi de bornes, leurs classes s'ouurirent aussi à quantité d'externes; qu'elles instruisent du Catechisme, en langue Huronne : & ausquelles elles donnent à manger: estendant ainsi leurs Charités en mesme temps & sur les corps, & sur les ames. Trois ou quatre personnes des plus considerables, se sont chargez aussi, chacun du soin d'vne famille Mais apres tout, il est resté plus de deux cents de ces pauures Chrestiens, qui n'ont peu trouuer aucun secours, dans la famine qui les presse, & qui les suit par tout.

Veritables sentimes d'une charité vrayement Chrestienne, à tous ceux qui ont vne si riche occasion de la pratiquer. En attendant qu'on puisse faire dauantage a comme leurs Peres, de subuenir à leurs necessitez. Par les chemins, nous les auons nourris, dans leur propre pais

es années 1649. 65 1650. Dieu nous fournissoit les moyens de soulager vne partie de leurs miseres. Nous auons respandu pour eux nostre fang & nos vies, pourrions nous apres celà leur refuser ce qui est hors de nous, qui puisse estre en nostre pouuoir? Ils viennent tous les jours querir chez nous, la portion qu'on leur distribue, ils se sont bastys eux-mesmes leurs cabanes, ils tascheront par leur trauail de chercher quelque partie de leur nourriture. Si apres nous estre espuissez, nous nous voyons dans l'impuissance de continuer nos charitez, & qu'ils meurent icy de famine, proche de nos François; au moins aurons-nous cette consolation, qu'ils y mourront Chrestiens.

Mais la famine n'est pas le mal qui soit le plus à craindre. C'est la terreur des Iroquois, qui menacent toutes ces contrées, qui font sentir par tout leur barbarie, & qui de plus en plus vont continuans leur rage, non seulement contre les restes des Algonquins& des Hurons: mais tournent maintenant le poids de leur fureur contre nos habitations Francoifes.

Il n'y a que fort peu de iours, qu'yne Giij

102 Relation de la Nouvelle France, autre bande de vingt-cinq à trente Iro-quois, eurent bien l'asseurance d'attaquer en plein iour, proche des Trois Riuieres, plus de soixante de nos gens, qui les alloient chercher Ces mal-heureux sont a demy-corps dans la bouë, dans des marets, & cachez dans des ioncs; d'où ils font leur décharge, & où on ne peut pas les aborder. Se voyans trop pressez, ils prennent la fuyte, & s'embarquent dans leurs canots. Nos gens ne peuuent pas tousiours marcher de compagnie; plusieurs demeurent en arriere. Les Iroquois les voyans desunys, tournent visage, & combattent contre ceux qui sont auancez des premiers: quand ils voyent qu'on se reunit; ils reprennent la fuyte auec ordre; & apres quelque temps, ils reprennent aussi le combat : en vn mot, ce sont des Protées qui changent de face à tout moment; & on ne doit pas croire qu'ils soient & sans conduite, & sans courage.

Nous perdismes en ce rencontre quelques vns de nos meilleurs Soldats: d'autres furent grieuement blessez. Les Iroquois se voyans trop viuement pressez; significant vne retraite, auec vn ordre, qui

es années 1649. 65 1650. n'eût rien de barbare. Aussi, leur conducteur, & le chef de ces ennemis de la foy, estoit vn Hollandois; ou plustost l'abomination d'vn peché, & vn monstre produit, d'vn Pere Hollandois Hereti-

que, & d'vne Payenne.

Iusques à quand Dieu permettra-il qu'on face vne terre d'horreur, d'vn pais qui sans ces Barbares ne seroit que benediction. Car n'eust esté leur cruauté, le nom de Dieu auroit penetré bien auat dans yn grand nombre de peuples infideles, qui restent encore à convertir, La Croix de Iesus-Christ se feroit iour, au milieu des tenebres du Paganisme qui y regne, & le Paradis s'ouuriroit à vn million de pauures Ames, qui n'ont que l'enfer pour partage.

Nous attendons auant l'Hyuer trois cent Chrestiens Hurons, qui viendront accroistre nostre Colonie commencée: six cents hommes de la Nation Neutre, nous ont fait porter la parole, qu'ils viendroient l'Esté prochain, nous demander des armes & du secours, ayans maintenant guerre ouuerte auec les Iroquois, en mesme temps, il faudroit fondre sur cét ennemy de la foy, & G iiij

trouver les moyens de leur porter la guerre dans leur propre pais. En vne année de bon succez ; & apres vn effort, digne du zele que tant de saintes Ames ont pour la conversion des Sauvages, on auroit exterminé cette poignée de gens, qui ne vivent que pour renverser les ouvrages de Dieu.

Apres celà, nos esperances restoriroient, & la gloire de nos Eglises, seroit encore plus grande, que n'a esté l'innonocence & la sainteté de celles, dont nous deplorons maintenant les ruines.

Mais puis que nous parlons de l'establissement d'une Colonie Huronne à Kebec, mettons en suitte quelques Chapitres des Sauuages circonuoisins, affoiblis, en terre par les mesmes ennemis, & par les mesmes persecutions, & & sortisses pour le Ciel par une mesme creance

ended a comment of the contract of the contrac

## CHAPITRE X.

De l'Eglise de sainct Ioseph à Sillery.

Ette Eglise n'a pas esté exempte des calamitez, qui comme vn torrent sont inondé le pauure pais des Hurons. On nous escrit d'Europe, que les malheurs sont sse vniuersels, qu'on diroit quasi, que les colomnes de l'Vniuers sont esbranlées. Nous auons cette consolation dans nos miseres que nostre creance, est bien souuent nostre grand crime, & que la guerre d'vn Estat tout barbare, est quasi changée en vne guerre Saincte Car la plus part de nos Chrestiens, ne prennent les armes depuis quelque temps, que pour conseruer le Christianisme dans leurs nouuelles Eglises. Or comme les Croix sont le fondement de la Religion, & que Dieu n'a point détruit son Eglise par les persecutions, nous esperons que les guerres, les famines, Relation de la Nouvelle France, & les martyres, qui peuplent l'Eglise triomphante de nos bons Chrestiens, n'abismeront pas ces pauures Eglises militantes & souffrantes. Les sleuues qui se cachent sous terre, ne sont pas perdus ils en sortent auec l'estonnement de ceux qui en ignorent la source & l'origine: mais entrons en discours.

Vne troupe de Chrestiens de sain& Ioseph, s'estants ioints ce Prin-temps auec quelques Sauuages des Trois Riuieres, & auec quelques Hurons, à dessein, comme ils disent d'aller coupper les pieds à quelques-vns de leurs ennemis, afin d'empescher qu'ils ne les vinssent troubler dans leurs prieres, rencontrerent vn Iroquois en leur chemin, dont ils se saistrent. Quelques-vns se voulant contenter de cette proye, leur Capitaine nommé Iean stagsains, homme grand & puissant, tres bon Chrestien & fort vaillant, repartit qu'il falloit approcher des bourgades Hiroquoises, & tâcher d'en surprendre quelqu'vne: Ils auancent donc à la sourdine, en uoyant deuant eux vn Algonquin & vn Huron, pour reconnoistre si l'ennemy n'est point en campagne. Le Huron fit rencontre d'vne troup-

es années 1649. & 1650. 107 pe d'Iroquois, se voyant surpris, il fait bonne mine, & pour sauuer sa vie, il comit vne lascheté & vne trahison treshorrible. Voilà qui va bien, que ie vous aye rencontré, dit-il, aux Iroquois, il y a long-temps, mes freres, que ie vous cherchois, ils luy demandent où il alloit, ie m'en vay, dit-il, en mon pais, chercher mes parens & mes amis: le pais des Hurons n'est plus où il estoit; vous l'auez transporté dans le vostre, c'est là où ie m'en allois pour me joindre à mes parens & à mes compatriotes, quine font plus qu'vn peuple auec vous. Ie me suis eschappé des ombres qui restent encore d'vn peuple qui n'est plus. T'és tu mis en chemin tout seul, luy demadent-ils? Non pas 3 respond-il, i'ay pris l'occasion d'vne bande d'Algonquins, qui vous viennent chercher; ie me suis écarté d'eux de téps en temps, pour rencontrer quelques vns du pais où ie me vay rendre, afin de les liurer entre leurs mains. Les Iroquois tressaillans d'aise à cette nouuelle, se rassemblent & s'en vont sous la conduite de ce Iudas, surprédre nos pauures Algoquins, qui se sians trop sur leurs espions, ou sur leurs Découureurs, comme ils les nom-

108 Relation de la Nouvelle France, ment, n'attendoient pas vne salue d'arquebuses qui les mit en déroute, plus sieurs y perdirent la vie, quelques-vns se sauueret à la saueur des bois, vn bon nobre fut mis dans les liens pour estre la curée de ces mâtins, nostre Capitaine Chrestien se battit auec vne generosité, qui donna de l'estonnement à l'ennemy mesme : Les iugemens de Dieu sont pleins dabylmes. Signal Land of the suite

Le traistre ayant demeuré quelque téps auec les Iroquois, eut bien la hardiesse de retourner vers les François & vers les Algonquins, pour tramer, à ce qu'on croit vne autre trahison, sa premiere ayant si bien reussi sans estre découuerte; mais Dieu qui est iuste ne permit pas qu'vne actio finoire fut bien long-temps cachée. Les Algonquins qui retournerent de cette défaite plus morts que vifs, ayans declaréà leurs amis les soupçons qu'ils auoient de ce Huron, on l'interrogea sur ce fait, il parut chanceler, on le presse de dire la verité, enfin il auouë son crime, confessant ingenuement que l'amour de la vie, & la crainte de la mort, l'auoit ietté dans cette mal-heureuse déloiauté.

Monsieur le Gouverneur le fit appre-

es annees 1649. 65 1650. 109 hender, & aprez auoir esté conuaincu d'vne trahison si noire il sut condamné à mort, & liuré entre les mains de ses gens mesme, pour en faire l'executio. On pensa premierement au salut de son ame, & puis on l'attacha au pilory planté deuant le fort des François, ou parut vn Huron armé d'vne hache, qui luy dit, tu merite la mort pour auoir trahy nos amis & nos alliez, ; il est vray, respond le coulpable, tuez moy ; le Huron luy décharge vn coup de hache sur la teste, qui ne l'assomma pas, il redouble iusques à trois fois, & le met à mort. Voila le payement de sa trahison: mais disons deux mots de nos pauures Chrestiens conduits au pais des feux& des flammes, nous n'en sçauons encor que peu de chose, mais ce peu est bien remarquable.

Deux Huros captifs, échappés des mains des Iroquois, ayas veu les horribles tourmens qu'on a fait souffrit à ces pauures victimes, nous ont comblé de douleur & de ioye. Ils disent, que ces bons Neophytes chantoient les louanges de Dieu, au milieu des slammes qu'il sembloit que le Ciel, sur lequel ils iettoient incessament les yeux, leur donoit plus de cotentemét

& de plaisir, que les feux ne leur causoiét de douleurs & de tourmés, mais ils exaltent sur tout vn nommé Ioseph Onaharé, quelques vns ont dit qu'il meritoit la palme du martyre, car en effet, il a souffert pour Iesus-Christ, & voicy coment.

Ce leune homme depuis quelque temps, ne regardoit plus les Iroquois que comme les ennemys de la foy, & comme les destructeurs de la Religion Chrestienne, il ne portoit les armes contre eux qu'en veuë de conseruer l'Eglise, où il auoit pris naissance en Iesus-Christ, il s'estoit resolu de souffrir & de mourir constamment pour sa querelle, c'est pourquoy se voiant pris & garotté, il luy rendit mille louanges, le remercia de luy auoir donné la foy & le Baptesme, priatout haut en face de tous ses ennemis, donna courage à ses camarades, les exhortant de souffrir les tourmens, qui leurs estoient preparés, comme des enfans de Dieu, à qui le Ciel estoit ouvert. Les Iroquois luy deffendet de prier Dieu, & d'animer ses gens. Il les regarde d'vn visage assuré, il les voit armés de fer, de feux, de flames, de cousteaux, de haches toutes rouges, il se moque d'eux & de Transfer to the contract of

es annees 1649, 69 1650. 111 leurs tourmens, il continuë sa priere, ce qui iette ces barbares dans vne tellerage qu'ils resolurent de le tourmenter d'vne faço nouuelle, s'il ne cessoit d'inuoquer son Dieu, ils le martyriserent trois iours, & trois nuits durant, & iamais ne purent l'empescher de chanter les louanges de son Seigneur, & de son maistre: ils luy disoient, en se moquant, ce que les suifs obiectoient au Fils de Dieu, demande secours à celuy que tu inuoque; dis luy qu'il te vienne déliurer : mais ce leune homme, méprisant leur fureur, remercioit Dieu de la grace qu'il luy faisoit d'endurer comme vn Chrestien, & non come vn simple Sauuage. Enfin il l'honora iusques au dernier souspir, & ceux qui ont assisté a ces grades souffrances, disent qu'ils ne sçauent lequel des deux a paru plus estonnant à leurs yeux, ou la rage, & la grandeur des tourmens, ou la constance & la generosité du Patient. Comme on estoit sur l'impression de ce Chapitre, on a receu vne lettre, apportée par le dernier vaisseau venu de ces contrées, qui parle en ces termes à vn Pere qui en est retourné depuis peu. Voicy des nouuelles de vostre pauure

Voicy des nouuelles de vostre pauure Ioseph. Vn Ieune Huron son grand amy,

112 Relation de la Nouvelle France, aiant esté pris auec luy, & receu la vie des Iroquois, qui luy auoient donné toute liberté dans leurs Bourgades, s'est sauué, & nous a rapporté ce qui suit. N'estant point suspect aux Iroquois qui m'auoiét donné la vie, ie trouuay moien de monter sur l'echaffaut, où on tourmentoit Io seph Onaharé, & de luy parler vn peu de temps, il me dit ces paroles. Si iamais mô cher amy turetourne au pais des Algoquins, assure les que les Iroquois auec tous leurs tourmens, n'ont peu m'arracher la priere de la bouche, ny la foy de mon cœur; Dis leur que ie suis mort auec plaisir dans l'esperance d'aller bien tost au Ciel. En effect adiouroit ce leune Huron, il ne cessa de prier & de louer Dieu dans ses tourmens qui durer et trois iours entiers; & comme cette grande trouppe de Bourreaux le tourmentoient dauantage pource qu'il prioit, luy au lieu d'arrester ses prieres pour arrester ses tourmens, les redoubloit dauantage, leuant souuent les yeux vers le Ciel. Ce spectacle me comblant de douleur & me tirant les larmes des yeux. Il me demanda si l'estois mescontent de son bon-heur; ne m'attendris point par par par tes larmes, me disoit-il, car ie t'asseure, qu'encor que ie souffre beaucoup en mon corps, mon ame n'est point triste, ce seroit bien pour vn neant que ie m'attristerois, puis que ie suis si proche de la maison de celuy qui a tout fait. Voila, dit le Pere, dont nous auons receu la lettre, ce qu'on nous a raconté de nouueau de ce ieune homme qui vous a esté si cher.

Sortant de Saint Ioseph il sit de soymesme, & sans qu'aucun l'instruisit, vne Confession generale depuis son Baptesme, & passant aux Trois riuieres il se confessa & se communia encor auec ses camarades. Dieu le disposoit à vne si sainte & si

glorieuse mort.

Ce genereux Athlete estoit natif d'vne petite nation Algonquine assez peu estoignée du pays des Hurons. Ayant ouy parler de nostre creance, & voyant que ses compatriotes ne la gouttoient pas; il descendit aux Trois riuieres, & de là il vint iusques à Saint Ioseph à Sillery, où ayant veu la pieté des Chrestiens, il fut touché, se sit instruire, & en suite demanda & obtint le Baptesme. Nous l'auions tenu vn an dans nostre maison, & comme il se faisoit grand il choisit vn tres-bon Chrestien nommé

Charles Ka riskatisitch pour son Pere, qui le receut & l'adopta comme son sils, & le maria à vue ieune sille Chrestienne; il estoit d'un naturel prompt, vis & hardy, & sila Foy n'eut esté fortement enracinée dans son ame, il y a long-temps qu'il auroit quitté la demeure & la compagnie des Chrestiens, veu mesmement que ses parens sirent tous leurs essorts pour le faire retourner en son pays, insques à luy deleguer un sien cousin que nostre Neophite méprisa, voyant le peu d'amour qu'il auoit pour la Religion Chrestienne.

Vne année deuant sa mort, estant allé en guerre auec vne troupe d'Algonquins dot le ches n'estoit pas baptisé, come ils approchoient du pays de leurs ennemis, leur Capitaine voulut consulter le Demon pour sçauoir de luy quelle route ils prendroient, asin de faire rencontre à leur auantage: Nostre Ioseph s'y opposa, dissant que la Loy de Iesus-Christ ne permettoit aucune communication auec les mauuais esprits; mais comme il n'estoit pas le plus fort, on dresse le Tabernacle, le Sorcier, ou plustost le Iongleur, y entre, il l'ébranle, & le fait trembler d'une façon estrange, il fait ses inuocations, en sorte

és années 1649. & 1650. 115 que le Demon, ou plustost le charlatan mesme changeant de voix, & s'adressant au Chrestien, luy dit d'vn ton plein de menaces: D'où vient que tu ne veux pas qu'on me consulte? Tu fais du hardy, & tu n'es qu'vn superbe. Tout le monde tremole à cette voix. Le Chrestien repart sans estonner: Tuveux jetter la peur dedans mon ame, ie ne crains ny toy, ny tes menaces, ny les Iroquois; ie crains & i'honoe celuy qui a tout fait, c'est mon Maistre le tien; tu n'as de pouuoir qu'autant u'il t'en accorde. C'est moi, dit le Demon, ui ay tout fait. Tu es vn imposteur, ropliue nostre Ioseph, monstre tes forces, ie te leffie, tu voudrois m'ébranler, mais tu n'y erdras que tes peines. Le Demon deneura confus, & nostre Chrestien ne laispas de ressentir comme vn coup qui luy donné au costé, qui l'empescha trois ours durant de respirer, ne se mouuant u'auec peine, cela le surprit, mais ne l'aattit pas, il disoit en son cœur; Il n'imporquand ie deurois mourir, ie ne cederay mais au Manits. Enfin s'estant fortemet commandé à Dieu, le mal le quitta en n instant comme il l'auoit pris en vn ioment.

116 Relation de la Nouvelle France,

Quelqu'vn de ses camarades voyant qu'il ne plioit point nonobstat sa douleur, luy sit ce reproche; le suis marry d'auoir entrepris ce voyage auectoy, ie voudrois que nous fussions encor dans les cabanes d'où nous sommes partis, ie n'en sortirois iamais en ta compagnie, puis que tu ne fais pas comme les autres; & que tu n'obeys point à nostre Capitaine. Hé quoy donc, fit nostre Chrestien, nous sommes-nous mis en campagne pour consulter le Demon? nos parens & nos alliez nous ont-ils dit à nostre depart; Allez dresser des Tabernacles, & faites reuiure les anciennes superstitions que nous auons quittées? ne nous ont-ils pas recommandé de couper les bras & les jambes à nos ennemis, afin que nous puissions prier Dieu, & que nous puissions estre instruits en repos? Nous cherchons des hommes, & non des Demons, c'est en ce point que j'obeiray, & non pas en vos jongleries.

Comme ils estoient dans cette contraste, ils apperceurent deux Iroquois, ils quittent le combat de la langue, ils partent comme des levriers d'attache; nostre Ioseph élèue son cœur à Dieu, & courant comme la foudre, passa bien-tost ses cama-

és années 1649. 69 1650. rades: les Iroquois se sentans poursuiuis jettét leurs robes par terre, & fuiét la mort plus viste que la tempeste; mais nostre so! dat Chrestien attrappe bien-tost celuy des deux qui auoit moins d'haleine, il luy donna vn grand coup d'espée dans le flanc, & fans s'arrester poursuiuit son compagnon: mais comme il auoit trop dauantage, il ne le pût attrapper; Retournans sur ses pas, il rencontre le sorcier, & luy dit, hé bien ton demon l'auoit-il dit que tu te trouuerois des derniers à la course ? si j'eusse esté femme, il m'auroit fait peur, mais ie ne crains ny toy ny luy, ny tous vos sortileges, Passons outre. 334 & 12 86 34

dont nous venons de parler, ne fut pas seul, Charles Ka riskatisitch, qui auoit adopté pour sils nostre Ioseph, retournant de Tadoussac à Kebec dans vne chalouppe chargée de Chrestiens, sur accueilly d'une si grande tempeste, qu'il sit naufrage dans le grand sleuue, & pas vn n'en réchappa, ces deux coups de soudres lancez sur la pauure Eglise de S. Ioseph ont causé une grandissime desolation. Il faut confesser que la Foy est un grand appuy, si elle n'eust regné dans les

H iij

118 Relation de la Nouvelle France, cœurs des femmes veufues, & des filles orphelines, & des enfans abandonnez, on n'auroit entendu que des cris, & des hurlemens de barbares, & des lamentations de gens deseperez, & on ne vit que des benedictions, & des louanges; ces pauures creatures à la verité bien abattues, mais remplies d'vne sainte resignation aux volontez de Dieu, se vindrent ietter aux pieds de nos Autels, les meres prians pour leurs enfans, les femmes pour leurs maris, & les enfans pour leurs peres. Toutes se confesserent & se communierent pour le soulagement de leurs ames. Cum occideret eos quarebant eum. Plus Dieu les afflige, & plus ils le cherchent, qu'il soit beny à iamais dans les temps & dans l'eternité.

Nous pourrios rapporter quantité de bos sentimés & de bones actions des enfans de ces nouvelles Eglises, mais le peu que nous auons dit, suffira pour exciter ceux qui entendront parler de nostre desolation, de nous secourir au Ciel & en la terre. Ces Eglises sont nées dedans les Croix, elles ont engendré leurs enfans dans les souffrances, dans les persecutions, dans les epidimies, a les famines; dedans les guerres, elles ne se nourrissent que de lat-

es années 1649. 6 1650. 119 mes & que d'angoisses, elles ne sont quasi plus composées que de veufues, & que d'orphelins, & si ie parlois en Sauuage, ie dirois qu'il ne reste plus que des ombres, que les viuans sont allez au Ciel. Ie ne puis apres tout desesperer, la primitiue Eglise estoit remplie de bannis, de gens faits esclaues, de condamnez aux feux, aux rouës, aux mines, aux escuries publiques, & Dieu a tiré de ces bassesses les Tiares & les Mitres, les Sceptres & les Couronnes, qui ne trouveront leur affermissement solide que dans l'establissement du Royaume de I E s v s-CHRIST, Dieu vueille donner la pensée & le zele aux Princes Chrestiens de l'establir en ce nouveau monde.

Be were the first of the grant of

in this person is the second of the second o

المرابع من المرابع من المرابع من المرابع المرا

The second of th

production of the second of th

tient to an agreement in a section of the con-

- Contraction of the section of the section of the

Signal - graphy the graphy to

rain thugh the control of the contro

Elshally state for Cont. H Gilljan

## 120 Relation de la Nouvelle France,

## CHAPITRE XI.

Des Sauuages des trois Rivieres &

A Pres le départ des vaisseaux sur la fin de l'année 1648 plusieurs Sauuages de diuerses nations s'estans rassemblés aux Trois riuieres, tindrent vn conseil entr'eux, dans lequel ils conclurent que les articles suiuans seroient soigneusement obseruez.

uens Chrestiens de cette nouvelle Eglise, pour sonder les volontez de tous les Sauuages qui se voudroient habituer en cét endroit, touchant leur bonne ou mauuaise inclination pour la Foy & pour la Priere comme ils parlent.

2. Que tous ceux qui voudroient faire profession du Christianisme, se soûmet-troient aux peines qui leurs seroient imposées s'ils contreuenoient aux Loix de Jesus-Christ & de son Eglise.

3. Que l'yurognerie seroit bannie &

es années 1649. El 1650. 121 ilée de leurs cabanes, & que si quelqu'vn tomboit dans ce crime on le mettroit en prison pour le faire jeûner quelques jours, non pas au pain & à l'eau, mais à l'eau toute pure, sans autre aliment.

4. Que les Apostats, s'il s'en trouuoit aux trois riuieres, ou les infidelles endurcis, & rebelles à la Foy ne seroient point protegez dans le fort des François.

En suitte de ces conclusions on sonda tous les Sauuages infideles. Ils répondirent qu'ils honnoroient la priere, & qu'ils vouloient prester l'oreille à la doctrine de Iesus-Christ; il n'y en eut qu'vn seul qui rebutast la proposition qu'on luy sit de se convertir: il y auoit long-temps qu'il frequentoit les Chrestiens, mais le demon luy auoit mis si auant dans la teste qu'il mouroit bien tost s'il se faisoit baptiser, que la crainte d'vne mort temporelle l'a jette dans yn mal-heur eternel; car en fuyant les Hiroquois il est tombé entre leurs mains; & si Dieu ne luy a fait vne grace miraculeuse il a passe d'vn seu elementaire dans le feu des enfers:on remarqua auec estonnement que tous ceux qui l'accompagnoient se sauuerent, & que luy seul & sa famille furent la proye 122 Relation de la Nouvelle France,

de ces Anthropophages.

Pour les Chrestiens, leur ferneur sut si grande, que si quelqu'vn auoit contreuenu aux ordres susdits, il se venoit presenter luy-mesme pour estre emprisonné ou pour receuoir en public la correction ou le chastiment de sa faute; Dieu veuille que cette ardeur dure long-temps.

Le courage & la force d'vn Chrestien en la Foy, nous donnera sujet de parler de la fin assez mal heureuse de deux sauuages: vne escouade de 25.0u 30.hommes estoient allez en marchandises vers la nation des staskotsemisek, ce sont peuples qui ne descendent quasi jamais vers les François, leur langue est messée de l'Algonquine & de la Montagnese, ces marchans estans munis d'armes, partie pour se dessendre, partie pour en vendre à ces peuples, l'vn d'eux voyant que sa poudre estoit humide, l'expose aux rayons du Soleil pour la faire secher, l'autre voulant donner aduis de leur venuë aux Sanuages du pays, tira vn coup d'arquebuse à quelques pas du baril où estoit cette poudre, qui prit seu en vn moment, & brusta trois Sauuages en sorte qu'on eut dit qu'ils auoient passé au trauers d'vn grand

es années 1649. Et 1650. 123 incendie, tantils estoient noirs & defigurez. On les porte aussi-tost dans les cabanes des infidelles, les charlatans ou les jongleurs; comme les plus experts medecins du pays, se presentent pour conjurer leur mal, par des cris, & par des chansons & par des tambours plus capables de tuer vn malade que de le guerir: deux condescendirent à leur superstition, mais le troisième, nommé Barthelemy Chigsnabik, ne voulut jamais qu'on le soufflast, ny qu'on remplit ses oreilles de leurs hurlemens. On luy dit que c'est fait de sa vie, si ces medecins ne le pensent à leur mode: Il n'importe, répond-il, la vie de l'ame est preserable à la vie du corps; les infideles le prient d'auoir compassion de soy-mesme, ils font approcher les Iongleurs: il les rebute, protestant qu'il n'aura jamais recours au demon. Ceux qui faisoient profession de l'aimer le conjurent de vouloir éprouuer leurs anciens remedes, pour éuiter la mort. le mourray sans peine, repart-il, & ie ne puis sans peché obeyr à vos Iongleurs, ne m'en parlez plus, ie suis Chrestien; l'ay toutes ces superstitions en horreur. En sin ce bon Neophyte estrechapé auec la joye & le contentement

des Chrestiens, & les deux autres moururent incontinent apres le tintamarre des tambours & des hurlemens de ces jongleurs, ce qui donna bien de l'estonnement, & de la confusion aux insideles.

Si-tost que ce braue Neophyte sut de retour aux Trois riuieres, il se transporta à la chappelle pour remercier Dieu de l'a-uoir conserué dans vn si grand danger, sa ferueur à maintenir la Foy le rend recommandable, & nostre Seigneur prend plaisir de le consoler dans les troubles de cette miserable vie.

Vn Sauuage disant vn iour en la presence de quelque Pere de nostre Compagnie, qu'il sentoit depuis quelque
temps le poids d'vne tristesse qui luy
estoit onereuse: il faut, dit Barthelemy,
que tu ne croye pas si fortement en Dieu,
que doit croire vn homme qui est baptisé;
car si ta Foy estoit viue, rien ne te pourroit attrister: jamais ie n'estois content,
deuant que ie susse Chrestien, j'auois
tousiours quelque ennuy ou quelque tristesse, mais maintenant que ie puis aller
au Ciel, & que les peines de cette vie
nous sont prositables, rien ne m'attriste,

es années 1649. O 1650. 125 vne seule chose me donne du mécontentement, c'est de voir quelques-vns de mes compatriotes peu affectionnez à la Foy & à la Priere.

Voicy vn raisonnement de Sauuage que ie pourrois appeller Theologique, pource qu'il est fondé sur les principes de la Foy. Cebraue Neophyte ayant appris les souffrances & la mort du Pere Iean de Brebeuf & de nos autres Peres massacrez par les Hiroquois, en tiroit ces belles conclusions, il me semble qu'il ne faut point s'attrister de la mort de ces bons Peres, leurs tourmens sont passez, & leur joye ne finira jamais, s'ils nous aymoient en terre ils nous ayment encore au Ciel; car la bonté ne se perd pas en ce pays-là; s'ils procuroient le salut des Sauuages en ce monde, ils ne sont pas pour le negliger en l'autre, ou la charité ne diminue jamais: si plus on est grand & plus on fait de bien nous n'auons rien perdu par leur abscence. Pour moy ie les veux imiter, ie me trouue dans le danger de nos ennemis aussi bien qu'eux, ils se pouuoient sauuer, ie le pourrois faire en m'écartant des endroits où les ennemis sont leur courses, ils sont demeurez dans le peril pour ayder ceux qui ne pouuoient pas suyr, ils ont mieux aymé mourir instruisant les Sauuages, que de se mettre à couvert en les abandonnant; j'en seray de mesme, ie mourray plustost que de manquer à mes compatriotes, le seul dessir de les secourir pour leurs ames & l'amour que j'ay pour la Foy & pour la Priere, me retiendra auprés de ceux qui don-

nent leur vie pour nous.

Ce bon homme aymoit si ten drement ceux qui exposent leur vie pour nostre Seigneur, qu'il voulut qu'vn petit fils que Dieu luy a donné portast le nom d'Isaac en l'honneur du Pere Isaac Ioques massacré au pays des Hyroquois. Cét enfant estant tombé malade bien-tost apres son Baptesme, il n'en accusa point ce Sacrement de vie comme font les infideles, il le prendentre ses bras, le porte à l'Eglise, luy fait le signe de la Croix sur le front aucc de l'eau beniste, se presente à Dieu auec ces paroles, Il est à toy, prends-le, ou me le rends, tu me l'as donné fais ce que turvoudras, tu le peux guerir, ie croy en toy, aye pitié de moy; il ne fallut point d'autre medecine pour guerir cet enfant, ille remporta plein de vie en sa cabane;

es années 1649. 6 1650. 127 sa mere s'estant trouvée fort mat se seruit du mesme remede & s'en trouva tresbien.

Le Pere tomba malade incontinent apres, vn François qui entendla langue des Sauuages l'allant visiter luy demanda quelle pensée il auoit dans sa maladie,& si le demon ne tâchoit point de luy persuader que ce mal prouenoit de sa creance; Il ne l'a pas encore fait, répondit-il, & quand il le feroit il n'y gagneroit rien; j'ay tousiours deuant les yeux vn certain discours que j'ay entendu de la bouche de Noel Negabamat, qu'on appelle à present Tekserimat: l'ay perdu, me disoitil, la plus part de mes enfans depuis que ie suis baptisé: ceux qui me restent sont tous malades, j'attends leur mort à tous momens, il n'y a iour qu'il ne nous arriue quelque perte, ou quelque mal-heur, perdons tout, mais ne perdons point la Foy. Ces parolles me sont demeurées profondement dans l'esprit, le dis souuent à celuy qui a tout fait, ie ne veux que la pensée que tu prends de moy, fais tout ce que tu voudras, & ie l'agreeray; j'ay dessein, ajoustoit-il, de me confesser & de me communier Dimanche prochain, & puis

128 Relation de la Nouvelle France, iene penseray plus à moy: il le sit & guerie; Dieun'a pas moins d'amour pour les sim-

ples que pour les sçauans.

Le coucheray en ce lieu vne histoire assez remarquable. Vne jeune Algonquine ayant esté prise en son pays, & menée dans le pays des Hyroquois, comme elle estoit assez bien faite, & d'vn bon naturel, elle fit rencontre d'vn bon mary, après huict ou neuf ans de captiuité, elle tomba malade, en sorte qu'elle croyoit que c'estoit fait de sa vie. Vne autre captiue, nommée Monique l'alla visiter: Remarquez s'il vous plaist en passant, vn trait de l'adorable prouidence du bon Dieu sur ses éleus. Cette Monique estoit aueugle quand elle fut prise, & c'est vn miracle que les Hyroquois qui m'assacrent toutes les vieilles femmes & toutes les infirmes qui ne leur peuuent rendre aucun seruice pardonnerent à vn aueugle: mais Dieu la vouloit conseruer pour le salut de plusieurs ames; elle a esté fort bien instruite en l'Hospital de Kebek, ellesçait la do-Strine de Iesus-Christ, & en parle tresbien, & auec beaucoup de bons sentimens; Dieu luy a rendu, non pas la veuë toute entiere, mais autant qu'il en faut pour

es années 1649. & 1650. 129 pour se conduire, & pour aller consoler les femmes & les filles Chrestiennes qui gemissent comme elle, sous le poids d'vne rude captiuité: elle fait de petites assemblées, elle instruit, elle carechise, elle encourage, elle enseigne & fait faire les prieres à ses compagnes; en vn mot Dieu luy fait faire en ce pays d'horreur & de tenebres le mestier d'yn dogique ou d'yn predicateur. Ayant donc appris que la femme dont nous voulons parler estoit malade elle se transporte en sa cabane, & luy remet en memoire ce qu'elle auoit autressois entendu de nostre creance: voyant que la malade prenoit plaisir en ces discours, elle poursuit sa pointe, passe la nuict aupres d'elle, luy fait de mander pardon de ses fautes, l'exhorte à souhaiter le saint Baptesme pour éuirer les peines, & pour jouyr des recompenses qu'elle luy met deuant les yeux. Cette pauure creature animée d'vn esprit plus fort que le sien, promit à Dieu qu'elle chercheroit toutes les voyes d'estre baptisée, si sa bonté la tiroit de la mort qu'elle attendoit. Sa priere sut exaucée, elle guerit & se voulant en suitte retirer en son pays pour accomplir sa promesse, son cœur sur

130 Relation de la Nouvelle France, combatu de diuerses pensées. Elle auoit vn petit fils agé enuiron de 7. ou 8. ans qu'elle aymoit vniquement, son espoux la cherissoit fort, elle estoit en pleine liberte dans les bourgades Hyroquoise, & les parens de son mary la voyoient de bon œil, elle se jettoit dans le hazard d'estre brussée & rotie toute viue en cas de surprise dans sa fuitte, elle pretendoit aller dans vn pays desolé, ou peut-estre aucun de ses parens ne restoit sur la terre pour la receuoir; il n'importe, elle est resoluë de tenir la parolle qu'elle a donnéeà Dieu, elle cherche les moyens d'éuader: vne sienne amie captiue promet de luy tenir compagnie, la conclusion est prise, elles preparent leur petit bagage qui ne pouuoit pas estre biengrand, puis qu'il ne les deuoit pas empécher, ny de marcher, ny de courir dans les rencontres. La nuit destinée pour leur départ commençant de reuestir la terre & les forests de ses tenebres, cette pauure semme voulut prendre congé de son petit fils, les Sauuages ont trop de tendresse pour leurs enfans, ils croyent souuent seur persuader par la raison, ce qu'on ne peut obtenird'yn si bas âge que par la crainte elle;

es années 1649. Et 1650. luy tint ce discours; Mon enfant ie ne suis pas de ce pays-cy, ayant esté prise captine dans le pays des Algonquins & amenée dans cette bourgade, ton pere m'a épousée; mais mon cher fils ie serois bien ayse de voir encore vne fois mon pays, c'est pourquoy j'ay resolu de te quitter; ne t'en fâche point, car ie t'ayme beaucoup; l'enfant se mit à pleurer, & luy dit; ma mere ie veux aller auec vous, ny m'abandonnez pas. Mon fils, repart la mere, tu ne me sçaurois suiure, tu serois cause de ma mort; quand ie seray partie addresse-toy à telles femmes qui sont de mon pays, elles t'enseigneront ce que tu dois sçauoir, rends leur obeyssance, & lors que tu seras assez grand pour me venir trouuer: souuiens-toy que tu as vne mere au pays des Algonquins qui t'a aymé de tout son cœur; mais ne me découure point; car tu serois cause que ie serois brussée. Ayant fait son Adieu, non sans larmes & sans soûpirs de part & d'autre, il suruint vn empechement qui retarda leur fuitte sept ou huict iours, & pendant tout ce temps-là ce pauure petit innocent ne découurit jamais le dessein de sa mere, ce silece est rare en vn âge si tendre.

132 Relation de la Nouvelle France,

Enfin ces deux fugitiues prenant l'occasion au poil, se jettent dans ces vastes forests, ne portant que la moitié de leur vie, & encore estoit-elle partagée entre la crainte & l'esperance: tout est chemin dans ces grands bois, il faut tenir sa route à la veue des Astressans compas, & sans boussole; ayant desia fait quelques journées de chemin, elles apperçoiuent des Hiroquois qui retournoient de la guerre ou de la chasse, la peur leur oste l'esprit & vne partie de leurs forces; celle qui s'estoit renduë compagne de nostre captiue, portant auec soy vn petit enfant qu'elle auoit mis au monde fort peu de iours deuant sa fuitte, voyant que son laict s'estoit perdu & tary, tant par la peur & par l'apprehension de ses ennemys, que par les grands trauaux qu'elles fouffroient en vn voyage si épouuantable, & craignant d'ailleurs que les cris & les gemifsemens de ce pauure petit ne fissent perdre & la mere & l'enfant, elle luy osta la vie, mais la pauure mal-heureuse ne conserua pas la sienne par cette mort, elle fut reconnue & prise par ces Hyro. quois qui la garotterent pour estre la pasture des flammes dans leur bourgade:

és années 1649. & 1650. 133 mais redoutant les seux de la terre & ne connoissant pas ceux de l'enfer, elles'y precipita par vne mort volontaire & com-

me enragée.

Pendant que les ennemis poursuiuoient celle-cy, l'autre se cacha si dextrement qu'elle éuita leur prise, & poursuiuant son chemin toute seule; enfin elle arriua au pays des Chrestiens, ou elle raconta toutes ses auantures; & apres auoir estésoigneusement instruite en la Foy de Iesus-Christ, elle fut baptisée en son nom, bien joyeuse d'auoir trouué la veritable liberté des enfans de Dieu par des dangers capables d'épouvanter des Geans.

On baptisa à mesme temps vne semme dont la conversion ne semble pas moins miraculeuse, quoy qu'elle soit moins estrange en apparence. C'estoit vn esprit altier, vnehumeur dédaigneuse & arrogante, la superbe estoit le caractere qui la distinguoit des autres semmes, & vous eussiez dit que ce mal estoit hereditaire en sa famille, tant ceux qui la touchoient en estoient empestez. Sa Sœur aisnée estant prise des Hyroquois avma mieux se tuer soy-mesme, & vn enfant qu'elle portoit auec elle, que d'estre leur seruan134 Relation de la Nouvelle France, te ou leur esclaue. Il arriua certain iour, qu'vn Pere de nostre compagnie luy parlant, déplora auec des paroles tendres, mais efficaces, le mal-heur & la punition de sa sœur, qui auoit si souuent méprisé le Baptesme: la crainte de tomber dans le mesme chastiment s'empara si fortement de cette ame, qu'elle se fit instruire, & poursuit son Baptesme si ardamment, qu'elle l'obtint auec vne si grande benediction, qu'il n'y a rien de plus souple, de plus obeyssant & de plus humble que cette semme, les épreuues l'ont renduë plus constante en la Foy, elle a perdu son mary, braue Capitaine & bon chasseur, elle n'a plus qu'vn fils pour tout support, & ce fils est tousiours malade: ce delaissement des creatures l'attache plus fortement au To an a second a second Creatcur.

le nesçay si ie dois marcher plus auant dans les bons sentimens des Sauuages, le rapport qu'ils ont les vns auec les autres peuvent donner du dégoust à vn entendement qui suit de cent lieuës tout ce qui paroist approcher des redites, mais aussi faut-il auouër que plusieurs personnes nous conjurent de ne point obmettre ce qui peut enslammer la volonté.

es annees 1649. & 1650.

Quand ie pense à la vie que j'ay menée deuant que d'estre baptisé, disoit vn bon Neophyte, ie suis si consus que ie voudrois me pouuoir dérober des yeux de Dieu & des hommes & de moy-mesme; & si pour expier mes offenses on me disoit qu'il se faut jetter dans les mains des Hyroquois, il me semble que j'o-

beyrois promptement.

Vn autre s'estonnoit, que Dieu eut tant de bonté, d'auoir amené des predicateurs d'vn pays si essoigné pour le conuertir. Si moy qui ne suis qu'vn pauure homme, disoit-if, ressens tant de douleur de voir les desordres de quelques-vns de mes gens qui ne sont pas encore Chrestiens, en sorte que j'ay de la peine de les souffrir; comment est-ce que Dieu m'a souffert tant d'années? mais qui l'a porté, nonobstant nos maladies, à me faire son enfant? il faut bien que le cœur de Dieu soit vn cœur de Pere.

Vn autre instruit du S. Esprit; car les hommes ne luy auoient point appris cette leçon, disoit, qu'il ne falloit pas benir Dieu & le remercier seulement pour les graces qu'il nous a fait, il le faut benir aussi pour ceux qui ne le louënt pas; il luy faut ren-

I- iiij

dre des actions de graces pour les biens qu'il fait à ceux qui ne le connoissent pas, il le faut adorer pour les enfans qui n'ont point encore d'esprit ny de jugement. Si quelque homme fait vn present à mes enfans, ie le remercie pour eux; & pour qu'y donc ne benirois-je pas celuy qui leur a donné la vie, & qui leur conserue auec tant de bonté; ie le remercie mesme pour les autres enfans, asin que si leurs pareus s'en oublioient, Dieu reçoiue honneur & louange des biens qu'il depart à ses creatures.

Vn Capitaine, homme de consideration, demandoit d'estre instruit & d'estre baptisé, le Pere à qui il s'adressa le voulant éprouuer, l'écouta assez froidement, & luy dit, viens-moy trouuer tous les iours, & si ie ne suis pas à la maison, retourne vne autresois; il venoit en certain temps jusques à cinq ou six fois pour vn iour, il n'y a rien qui éloigne tant de Dieu, & qui soit plus opposé à la verité que le fast, & que l'orgueil, l'humiliation est la pierre de touche de la Foy & des vertus solides; le Pere instruit vn enfant. Ensin cet homtue connut bien qu'on vouloit découurir

és annees 1649.69 1650. 137 s'il auoit vne bonne & forte volonté d'embrasser vne Loy qui fait profession de la Croix, de la pauureté & de l'humilité. Il apporte aux pieds du Pere ses richesses qui consistoient en quelques coliers de porrelaine, & luy dit; mon peredonne tout cela aux pauures, & scache que j'ayme la Foy plus que tous les biens de la terre; & en suitte découurant ses épaules, fais-moy fustiger bien serré pour mes offenses, & tu sçauras que iene crains point les souffrances, ny la confusion: sa constance & vn danger de mort où il se rencontra, luy firent donner le Baptesme. Si-tost qu'il fut Chrestien il s'écria deuant ses gens; scachez que c'est du fond de mon cœur que j'ay embrasse la pierre; Si vous me voyez jamais reculer, ie vous donne toute liberté de vous rire & de vous mocquer de mon inconstance.

Vn chasseur ayant eu quelque instruction, se mit à genoux pour remercier Dieu après auoir tué vn grand Cerf, son camarade se mit à rire; j'ay, sit-il, appris cela des Chrestiens, l'autre s'en gausse & le pousse du pied pour le faire leuer; disant, qu'il auoit bien vescu jusques alors sans ces badineries, & que son bon-heur

138 Relation de la Nouvelle France, ne dépendoit pas de nos ceremonies: à quelque temps de là, ce fanfaron s'estant embarqué dans vn canot, fit naufrage, & s'en reuint tout delabré & à demy mort; nostre chasseur luy dit, si tu eusse, prié le Dieu des Chrestiens, peut-estre t'autoit-il preserué de ce mal-heur. Ce miscrable s'en gaussa derechef, mais s'estant mis sur l'eau vne autre fois, son petit basteau décorce renuersa dedans par vn beautemps; on eut peine de retirer son corps desportes de la mort, Dieuveuille que son ame en reçoiue la vie: quoy qu'il en soit, nostre chasseur touché de ce chastiment, nous vint trouuer & nous dit; qu'vn nommé Atcheens, Capitaine de la nation d'Yroquet l'auoit enchargé de se faire baptiser. Ne fais pas comme moy, luy disoit-il, j'ay negligé le Baptesme pendant la vie, ie le souhaite à la mort, & ie ne le puis auoir: ah! que j'ay de regret de mourir dans vn lieu éloigné des François:mon cœur est triste, ie suis priué de l'vnique bien qui me pourroit consoler; sois sage, mon cher amy, n'attends pas à la morta te convertir; pour conclusion, ce bon chasseur fut mis au nombre des Carecumenesser of the control of the contr

és annees 1649. 65 1650. 139

Disons deux mots des Atticamegues, & finissons ce Chapitre. Ces peuples deleguerent vn vray Israëlite d'entr'eux, pour nous venir voir, & pour emmener en leur pays le Pere qui a vn soin particulier de cette Mission. Ce pauure Peren'y pût aller, pource qu'il n'y auoit pour lors que deux de nos Peres aux Trois riuieres pour le secours des François & des Sauuages. Je ne sçay lequel des deux fut plus triste, ou ce bon Israëlite nommé Antoine, aagé d'enuiron (5 ans, ou le Pere, à qui les larmes venoient aux yeux, entendant les amoureux reproches que luy faisoit ce fidele Messager. Que diront ceux qui te souhaitent auec impatience, & qui ont va si grad desir de se confesser que feror mes enfans qui n'ot pas encor receu le Baptesme? ma femme qui n'a pû descendre iusques icy ne me verra pas de bon œil, si ie retourne sans t'embarquer? faut-il donc que nous soyons separez apres nostre mort? que les vns soient bien-heureux,& les autres mal-heureux, si j'eusse pû apporter toute ma famille sur mes espaules ie l'aurois fait, mais les chemins sont espouuantables. Si les autres qui ne peuuent surmonter ces difficultez, viennent à mourir sans Baptesme, à qui en sera la faute? pour conclusion le Pere ordonna que l'yn des plus sages d'entr'eux consereroit le saint Baptesme à ceux qu'on ver roit en danger de mort, & qu'on porteroit les autres à former souvent des actes d'yn puramour, & d'yne contrition parfaite, pour suppléer au desaut du Sacrement de Penitence. Il est vray que ces bonnes gens menent vne vie si innocente que le Pere se consoloit dans l'impuissance de les aller secourir.

Il a sceu depuis, que la femme d'vn Capitaine estoit morte sans Confession; iamais, dit-il, on n'a veu semme plus zelée pour la Foy, elle a conuerty fon mary, fon gendre, & toute sa famille, & quantité d'autres personnes. Elle demandoit tous les iours à Dieu la grace de ne point mourir qu'apres auoir receu tous ses Sacremens. Il no luy a pas accordé cette faueur, mais il luy auoit donné vne si grande innocence, & vne telle crainte & horreur du peché, qu'elle ne manquoit iamais de s'éueiller tous les Samedis sur la minuit; & alors se mettant à genoux elle examinoit sa conscience, puis s'adressant à nostre Seigneur, elle luy confessoit tous ses es années 1649. 6 1650. 141 echez comme elle auroit fait deuant en luite quelques prieres, comme si ce veritable Pontise uy eut donné pour penitence. Dieu est bon, & sa bonté se répand jusques dans le sonds de la Barbarie.

Le Pere adjouste que quelques Sauuages instruits dedans ces vastes forests, sans
amais auoir veu aucuns Europeans, sont
venus demander le Baptesme, recitans
brauement les prieres qu'ils auoient apprises de la bouche des Chrestiens qui habitent ces grands bois. Il me semble que
nous pouuons dire des graces de Dieu
ce qu'on dit du Soleil; Nec est qui se abscondat à calore eius, il n'y a personne qui
ne ressente quelques essets de cette chaleur divine.

Manus and ababal 4901 H

and the second of the second o

Carlo Control Control

## CHAPITRE XII.

## De la Mission de sainte Croix à Tadonssac.

Mission, dit dans ses Memoires, que ce qu'il en a remarqué de plus considerable, se rapporte au zele ardant que les Sauuages Chrestiens & leurs Capitaines ont fait paroistre pour l'amplification du Royaume de Iesus-Christ, & pour écar-

ter le vice de leur nouuelle Eglise.

En voicy quelques exemples. Ce bon Pere les estans venus visiter apres Pasques, ils le priesent de leur faire adorer la sainte Croix, comme les Chrestiens de S. Ioseph l'auoient adoré la Semaine sainte. Il ne faut pas, disoient ils, que pour auoir esté priuez de Prestres en ce saint Temps, nous soyons encore priuez du souuenir de la mort de nostre Redempteur. Ils se disposerent à certe grace, huict jours durant, se confessans deux sois selon leur coustume: quand ils passent quelques

es années 1649. 6 1650. 143 mois sans pouuoir approcher de ce Sacrement: ils firent vn jeusne public & vniuersel, & vn iour de Vendredy ils rendirent leurs deuoirs à lesus-Christ mourant, auec tant de sentimens de pieté & de deuotion, que les François qui assisterent à cette sainte ceremonie, ne pouuoient assezadmirer la ferueur de ces bons Neophytes.

Quelques-vns touchez de regret d'auoir offensé Dieu, pour s'estre laissé aucresfois surprendre des boissons, que les Françoisleur portent; protesterent tout haut, & tout publiquement, qu'ils estoiet indignes de s'approcher de l'image de Icsus-Christ, demandant qu'il leur fût seulement permis de baiser le paué de l'E-

glise.

Quelques petits enfans s'estans apperceus qu'on emportoit la sainte Croix deuant que leurs parens leur eussent fait baiser, demanderent par leurs larmes & par leurs cris, & par leurs begayemens, qu'on la remit, afin qu'ils la pussent ado-

rer aussi bien que les autres.

Il semble, dit le Pere, que nostre Seigneur laissa découler quelque petite goute de son Sang dans les cœurs de ces bonnes gens; car au sortir de là les Capitaines & les principaux Chrestiens, enslammez contre le vice qui regne dauantage à Tadoussac à la venue des vaisseaux, causé par le vin, & par l'eau de vie qu'on leur vend, protesterent hautement, que ceux qui auoient approché leur bouche des playes de lesus-Christ en son image, seroient rudement chastiez si d'oresnauant ils la profanoient par l'yurognerie.

En suite de cette publication, ceux qui auoient des barils pleins de ces boissons, cachez dedans la terre, les apportoient au Pere, suy disans que tandis qu'il tiendroit leur Demon familier en prison, il ne seur

pourroit nuire.

Ils ordonnerent encore, que personne ne traitât ou n'achetât de ces boissons que par l'ordre du Pere donné par escrit, & que si quelqu'vn y contreuenoit, qu'il seroit censé pour yurogne, & puny comme tel.

En troisième lieu, ils supplierent treshumblement Monsieur le Gouuerneur qu'il sit dresser vne prison à Tadoussac, & qu'il sit punir & chastier ceux qui seroient entachez de ce crime.

En quatriéme lieu, vn Capitaine assez sujet

es années 1649. & 1.650. sujet à cette maladie protesta par vn cry public, que si iamais on le voyoit estourdy de boisson, il vouloit le premier subir toute la rigueur des loix, & que pour la mauuaise edification qu'il auoit autresfois donné, il se feroit punir & fustiger publiquement si quelqu'vn de ses gens toinboit dans cette faute, voulant vanger en sa propre personne les pechez de ceux qui

estoient sous sa charge.

Quelque temps apres vn ieunehomme parut à demy yure, ce Capitaine voulut tenir sa parole. Il se trouve dans vne assemblée où estoient la pluspart de ses gens, & leur tint ce discours. Si vous auez de l'amour pour moy, faites-le maintenant paroistre, tirez vengeance de mon corps pour le peché d'vn tel; si quelqu'vn de vous m'espargne, ie le tiendray pour vn lasche & pour vn poltron, & pour vne personne peu affectionnée à la Foy, & à la priere: là dessus il descouure ses espaules, commandant aux petits & aux grands de le fustiger; la pluspart prenans ses paroles au pied de la lettre, obeyrent fortement de la main aussi bien que du cœur. Les François qui se trouuerent à ce spectacle, voyans qu'on le frappoit tout de bon, furent attendris, & quelques-vns iusques aux larmes, admirans la constance & la joye qu'il faisoit paroistre dans le sacrifice qu'il offroit à Dieu pour le peché de son

peuple.

Celuy qui auoit comis l'offense voyant ce beau jeu, sut bien estonné, il s'auance & parle en ces termes à son Capitaine qui estoit son parent. Mon cousin nous n'a-uons qu'vn mesme corps, estans paitris d'yn mesme sang; tu as porté la moitié du chastiment deub à mon offense, il faut que le sacrisice s'acheue sur mon corps, l'innocent a souffert, venons au coupable; & là dessus il se presente à ceux qui estoient dessa tous disposez de luy faire la charité qu'il attendoit de leurs mains, aymant mieux souffrir en cette vie que de porter son crime en l'autre monde.

L'vn des deux Capitaines de cette Reduction, apprenant que son frere estoit sur le point de faire diuorce auec sa femme, l'aborde auec ces paroles; le ne sçay si ie te dois appeller mon frere, si tu quitte ta femme tu quitteras la Foy, & en suite tu cesseras d'estre mon parent & mon allié, ou plustost tu te declareras mon ennemy, auise à ce que tu feras, si tu sors de l'Eglise il faut sortir de Tadoussac, & iamais n'y paroistre, autrement ie te feray dégrader, ou abandonner dans quelque Isle deserte, d'où iamais tu ne pourras sortir. Ce pauure homme estonne d'vn tel discours, confessa ingenuement, que son cœur vouloit estre méchant, il conjure les Chrestiens de prier Dieu qu'il luy pardonne son offense, il demande qu'on le punisser goureusement, & que c'est l'vnique misericorde qu'il attend de ceux qui croyent en Dieu, auec lesquels il n'osoit se trouuer dans leurs saintes assemblées s'en iugeant tres-indigne.

Les Chrestiens auec leurs Chefs, jadis si ialoux de leur païs, & de leur port de Tadoussac, qu'ils en resusoient la cognoissance aux autres Nations, voyans que les Peres ne pouuoient pas les aller trouuer dans le sonds de leurs grands bois, les ont inuitées de venir demeurer aupres d'eux pour apprendre le chemin du Ciel, apportant pour raison, qu'estans amis en cette vie, il ne falloit pas estre diuisezen lautre. Les spapinachisek ont desia receu la Foy. Les smamisek qui habitet les terres voisines de l'Isle d'Anticosti ont commencé cette année de paroistre à Tadoussac, &

K ij

de prester l'oreille à la doctrine de Iesus-Christ. Ces bons Capitaines leur ont sait des presens pour les attirer aupres d'eux, asin de leur donner enuie d'embrasser leur creance.

Cen'est pas tout. Ces peuples qui cachoient iadis aux François les chemins des Nations où ils vont trafiquer, ne voulans pas mesme que nous en abordafsions, nous pressent maintenant qu'ils sont Chrestiens, de les suiure dans ces vastes forests, pour baptiser & pour confesser les Nations qui ne peuuent approcher de leur pays. Ils ont mené le Pere Gabriel Druillettes dans ces contrées par vn chemin nouueau, mais tres-affreux, afin qu'il visitat & qu'il consolât ceux qui ne le pouuoient venir trouuer à Tadoussac. Ie vy, dit le Pere, tant de ferueur dans ces bons Neophytes à mon premier abord, que les fatigues d'vn voyage espouuantable, & qui fait peur aux Sauuages mesmes, me semblerent bien douces? The second of the second of the

Si tost que nostre Canot parut à leurs yeux, ils accoururent vers les riues d'vn grand lac sur lequel nous voguions, & m'ayant reconnu, la joye se respandit sur leur visage, ils se jettent à genoux, les petits

es années 1649. G 1650. 149 enfans m'enuironnent & me caressent de tous costez, les malades s'écrient qu'ils ne craignent plus la mort, puis qu'ils ont moyen de se confesser, les principaux de leguent quelques Canots pour aduertir les Sauuages voisins de ma venuë. On me dresse cependant vne petite Chapelle, qui fut bien-tost bastie.

Le Dogique, c'est à dire celuy qui fait les prieres publiques parmy ces bonnes gens, & qui les instruit en l'absence des Peres, sit rendre des actions de graces à nostre Seigneur pour nostre arriuée, il fit entonner des Cantiques aux petits & aux grands, mais auec tant de pieté, & de deuotion, que ie ne pûs iamais parler que par les yeux, tant mon cœur estoit remply de consolation.

Ce bon Dogique ne manquoit pas tous les iours de visiter les malades, de prier pour eux, en sorte que quelques Payens touchez de cét exemple, demandoient le Baptesme, & quelques-vns disoient tout haut, que ses prieres les auoient guaris de - (17/20)

leurs maladies.

Il rendit vn compte tres-exact au Pere de tout ce qui s'estoit passé pendant l'Hyuer touchant le Christianisme, il demandoit des conseils pour soy & pour cette petite Eglise, auec autant d'humilité, de soumission, & de prudence, qu'on en sçauroit souhaiter au milieu de nostre Europe.

Vn vieillard aagé d'enuiron quatrevingts ans fort ahurté à ses superstitions, voyant la bonne vie des Chrestiens, & prestant l'oreille aux paroles du Pere, le pria de l'instruire, protestant qu'il abandonneroit ses anciennes coustumes pour embrasser les nostres. Il venoit deux sois le iour en la Chapelle pour apprendre, comme vn enfant, les elemens de nostre doêtrine, & comme sa memoire estoit sort desseichée on le voyoit souuent se pourmeneren des lieux écartez, repetant les prieres qu'on luy auoit enseignées, pour les inculquer plus auant dans le fonds de son cœur.

Tous les Catechumenes poursuiuirent ardamment leur Baptesme, vn entr'autres dessa aagé, voyant que le Pere luy refusoit cette grace, le remettant pour l'esprouuer iusques au Printemps de l'année suiuante entra dedans l'Eglise, harangua fortement en la presence de tous les Chrestiens, protessant que s'il mouroit deuant ce temps-là, il accuseroit le Pere deuant la Iustice de

Dieu de sa perte & de sa damnation.

Le Demon enragé de voir qu'on luy arrache des mains vne proye dont il jouit depuis tant de siecles, a tasché de troubler ces bons Neophytes par l'imposture d'vn ieune homme, que ses parens protestent auoir enseuely & enterré, & le jour suiuant de ses funerailles il parut, disent-ils, sur le soir tout plein de vie, asseurant qu'vn certain qu'il ne cognoissoit pas l'auoit tiré du sepulchre, & luy auoit enseigné la façon d'honorer Dieu; il condamne les prieres & les deuotions des Chrestiens, auec tant d'attache à son jugement, qu'encore qu'il auoue que le Demon soit mauuais,& qu'il faille croire en I E s y s-CHRIST, il le veut neantmoins seruir à sa mode, traisnant deux & trois femmes apres soy. Il a fait solliciter quelques ieunes Chrestiens par sa sœur, à qui il a fait croire qu'elle pouuoit sans crime leur accorder ce qu'ils souhaiteroient d'elle, pourueu qu'ils renonçassent à la Foy & aux prieres qu'on leur a enseignées dans Tadoussac, mais les Anges sont plus puissans que les Demons, ces bons Neophytes ont conserué la pureté de leurs corps, par la pureté de leur creance.

K iiij

152 Relation de la Nouvelle France,

Enfin le Pere estant sur son depart, vn bon Sauuage l'inuita au festin, luy rendant mille graces, & luy donnant mille benedictions, de la peine qu'il auoit prise de les venir visiter auec tant de trauaux, l'asseurant qu'aussi-tost que l'Hyuer seroit passé, il meneroit la pluspart de ses gens à Tadoussac, pour y estre instruits plus à loisir, le priant de nommer en chaque cabane quelque bon Neophyte des plus sages, & des mieux instruits, pour tenir sa place en son absence, & pour luy rendre compte en son temps des actions & des déportemens de ces nouveaux enfans de Dieu qui en verité composent vne petite Eglise fort innocente.

Vn braue & genereux Catechumene voulut accompagner le Pere, mais il
le fit passer par son pais, où ayant fait
assembler ses compatriotes il demanda
le Baptesme d'vne façon bien agreable,
& pleine de ferueur. Mon Pere, luy ditil, i'ay autressois manié nos tambours,
& ie me suis messé de sousser en la presence de mes gens à toutes ces superstitions, ie desire d'estre baptisé deuant

es: années 1649. 1650. 153 eux, asin qu'estans tesmoins de la Foy que ie professe, ils soient mes accusateurs si ie n'obey à tout ce que la Loy de IES VS-CHRIST me commande, ie les inuite, & les conjure de me reprocher en ta presence tout ce que ie commettray contre la profession du Christianisme. Ic desire qu'ils me veillent, & qu'ils examinent mes actions pour r'en faire vn fidelle rapport, me soumettant au chastiment que tu me voudras imposer, si ie contreuiens aux loix de mon Baptesme; ne fais donc point de difficulté de m'accorder cette grace, qui doit non seulement profiter à mon ame, mais qui doit encore donner lumiere à la nation des staksamisek, qui sont distans de ce lieu dé dix iournées. Mon frere iadis Capitaine de Tadoussac m'ayant instruit des veritez, dont tu nous a parle, i'en ay fait le recità ces peuples qui sont mes alliez. Ie les ay espouuantez par les peines d'Enfer, ie les ay consolés par les delices dont jouyssent les Chrestiens au Ciel, ie les ay fait prier Dieu, ils m'ont tesmoigné vn grand desir d'estre instruits; baptise-moy donc, mon Pere, nous les irons voir l'Esté prochain tous

deux ensemble. Il ne falloit pas éconduire yn si bon cœur.

## CHAPITRE XIII.

De la venuë d'un Hiroquois en France,

L'semble bien à propos de dire deux I mots de la vie de cét Hiroquois, deuant que nous parlions de sa mort. L'an 1645. vnetroupe d'Hiroquois venant en guerre sur le grand sleuue de Saint Laurens, sur apperceue par vne petite escouade de nos Sauuages, qui s'en alloient à la chasse de leurs ennemis. Le Capitaine de nos Algoquins nommé Simon Pieskaret, ayant découvert le premier ces Auanturiers Hiroquois, leur dressa vne embuscade si à propos, qu'il les deffit. L'Hiroquois dont nous parlons & vn sien camarade furent faits prisonniers en ce combat. Pieskaret les amena tous deux viuans, sans les auoir outragez contre leur coustume, & les presenta à Monsieur le Cheualier de Montmagny Gouverneur pour lors de tout le pais.

és annees 1649. & 1650. Comme les Hurons luy auoient desia doné vn prisonnier de la mesme nation, il voulut sonder si par le moyen de ces prisonniers, les Hiroquoisseroient capables d'vn bon traité de paix, afin de reunir tous ces peuples qui se déchirent, & qui se deuorent d'vne estrange façon. Le succez parut fort heureux, l'vn des trois prisonniers fut renuoyé en son païs auec des paroles, ou plustost auec des presens, qui inuitoient cette nation à la paix. Ils enuoyerent deux Ambassadeurs sur ce sujet dés la mesme année, & la suivante 1646. la paix fut entierement concluë, & nos prisonniers renuoyez libres en leur pais. Celuy dont il s'agit homme d'esprit, & puissant de corps ayant veu les presens que Monsieur le Gouuerneur auoit fait pour sa deliurance remporta auec soy vn amour & vn desir de recognoissance enuers les François, disant qu'il leur estoit redeuable de sa vie, comme il est veritable. Car si Monsieur le Cheualier de Montmagnine se fut entremis dans cét affaire les Algonquins l'auroient brussé & mis en pieces. La mesme année 1646, qui vitla naissance de la paix, en vit aussi la mort. Le Pere Isaac Iogues estant allé au pays de

156 Relation de la Nouuelle France, ces Barbares auec vn jeune François, y fut tué au mois d'Octobre; nostre Hiroquois voyant qu'on le vouloit mettre à mort s'y opposa; il n'y gagna rien qu'vn coup de hache qu'il receut sur le bras, l'ayant presenté deuant le Pere pour le mettre à couuert. Ce coup receu par charité, sut peutestre le coup de sa predestination; car il est bien croyable, que ce bon Pere estant au Ciel, a obtenu de nostre Seigneurle salut de son ame, en reconnoissance du salut qu'il auoit voulu conseruer à son corps.La mort du Pere Iogues & la rupture de la paix fut cachée aux François & aux Algonquins tout l'Hyuer, mais au Prin-temps de l'année suiuante 1647. la perfidie des Hiroquois éclata par le meurtre de quantité de nos Chrestiens surpris par ces traistres.

Nostre Hiroquois ne sut point de la partie, il ne vint point en guerre auec ses compatriotes, ne se pouuant resoudre de combattre ceux qui luy auoient donné la vie; mais ensin estant venu l'an 1648, assez proche de l'habitation des François nommée les Trois riuieres, pour chasser aux Castors, & ayant apperçeu vne chalouppe conduitte par des François, ilse

és années 1649. 6 1650. 157 presenta sur le bord du grand fleuue, it crie, il appelle, il fait signe qu'on le vienne querir, les François le voyant seul l'abordent & le reçoiuent dans leur vaisseau; vn Huron pris en guerre & deuenu Hiroquois parmy eux, fortant du bois, & voyant qu'on emmenoit son camarade, fait signe qu'ille veut suiure, on l'embarque auec l'Hiroquois, & on les mene tous deux au Capitaine des Trois riuieres: Ils auoient trois autres compagnons quiparurent quelque temps apres, on tascha bien de les surprendre, mais la desiance les sit éuader, excepté le plus soible qui ayant esté attrapé par vn Algonquin fut mis à mort sur la place.

Le Huron deuenu Hiroquois, interrogé par nos Truchemens, dit tout libremét,
qu'il auoit dessein, sa chasse aux Castors
estant faite, de chasser aux Algonquins,
& qu'il en auroit pris ou tué quelqu'vn
s'il en eut rencontré à son auantage. Pour
nostre Hiroquois il protesta que depuis
le moment que les François luy auoient
donné la vie, il auoit tousiours porté dans
son corps yn cœur François, qu'il s'estoit
opposé à ceux qui auoient tué le Pere
Isaac Ioques, qu'il auoit receu au bras le

premier coup qui fut déchargé sur ce bon Pere, il monstroit la marque. l'ay tous-jours eu la pensée, disoit-il, de vous donner auis de la trahyson de mes compatriotes, ie ne l'ay pû faire qu'à present que ie me suis jetté entre vos bras. Sa justification ne sut pas receuë, la sourbe des méchans rend les innocens coupables, on luy met les sers aux pieds comme à vn traistre.

Quelque temps apres, deux canots remplis d'Hyroquois furent découuerts en pleine nuiet sur la grande riuiere; la sentinelle en ayant donné auis au Caporal, on fit monter nostre Hyroquois sur vn bastion, il crie à pleine teste, ses gens luy répondent, ils parlent ensemble en langue Hiroquoise; & pour conclusion, on enuoye vne chaloupe vers ces deux canots qui amena au fort vn autre Hiroquois; en voyla deux entre les mains des François, qui donnerent le nom de berger au premiervenu pour le distinguer des autres, il fut le lendemain enuoyé vers vne troupe de ses Gens qui estoient en armes au delà du grand fleuue, d'où il reuint accompagné de deux autres, ausquels on mit les fers aux pieds aussi bien qu'à leurs

es annees 1649. 29 1650. 159 camarades. Il est vray qu'on deliurera le berger de ces entraues, pource qu'on ne creut pas qu'ayant amené les autres, il, osast éuader sans eux. Quelques iours apres, d'autres bandes d'Hiroquois paroifsant à tous momens, il sit si bien que deux de ses compatriotes se vindrent ençore jetter dedans les fers : ce procedé donnoit de l'estonnement, quelques-vns l'attribuoient à l'amour qu'il portoit aux François, d'autres le prenoient pour vne trahyson secrete qu'il pretendoit faire reussir en son temps; quoy qu'il en soit, ces oyscaux s'ennuyans d'estre si long-temps en cage, trouuerent le moyen de s'enuoler nonobstant leurs fers, & leurs gardes; le seul berger dont nous parlons resta parmy les François, les autres s'estans sauuez assez adroitement.

On fut bien en peine de ce qu'on feroit du pauure homme; les vns le vouloient faire mourir comme vn traistre, d'autres disoient que s'estant rendu à nous de bonne foy, on ne pouuoit pas le condamner à mort sur de simples soupçons de trahyson; enfin on jugea qu'il estoit à propos de l'enuoyer en France, de peur que s'il venoit à se sauuer, il n'emportast auec soy

vne trop grande connoissance du pays, & de l'estat des François & des Algonquins. On le mit donc entre les mains d'vn Pere de nostre Compagnie qui repassoit pour les affaires de ces nouuelles

Eglises.

Ils s'embarquerent à Kebek le dernier d'Octobre, de l'an passé 1649. ils entrerent dans le port du Havre de Grace le 7. de Decembre; le Pere pendant cette trauersée appelloit ce pauure Hiroquois de temps en temps, luy faisant reciter ses prieres qu'ilsçauoit tres bien, ayant esté instruit pendant son sejour parmy les François. Il auoit souuent demandé le Baptesme, mais l'incertitude du futur l'auoit empesché de receuoir vn si grand bien; veu mesme qu'on luy vouloit donner vne plus grande instruction, & vne plus grande connoissance de nos mysteres, & tirer de luy vne preuue plus asseurée de sa bonne volonté.

Comme on l'enuoya de l'habitation des Trois riuieres au port de Kebek, où il se deuoit embarquer, il luy arriua vne chose tres-remarquable. Les soldats & les Matelots qui estoient dans la barque, ayant peur qu'il ne sautât dans l'eau pendant

és annees 1649.69 1650. pendant la nuiet, pour se sauuer à la nage, & puis à la course dans les bois, le lioient le soir fort estroitement, & le lendemain matin on le trouuoit libre & tout delié; on le serra dauantage, & on redoubla ses liens les autres nuiets, en sorte qu'onne croyoit pas qu'il se pust en aucune façon dégager; on le trouua neanmoins encore tout libre & delié le lendemain matin: cela sit croire à ceux qui estoient dans la barque, & qui ne l'entendoient pas qu'il estoit sorcier. Or moy qui écris cecy, ayant appris ce qui s'estoit passé; ie priay vn jeune homme, grand amy de cet Hiroquois, de l'aller voir, & de luy demander confidemment de quelle industrie il se servoit pour se dégager des liens dont il estoit si estroitement & si soigneusement garotté: l'Hiroquois luy répondit auec vne grande douceur & auec vne presence d'esprit fort tranquille, que se voyant si maltraité des François, desquels il auoit appris quelque connoissance de celuy qui a tout fait, il luy addressoit ces parolles dans les peines & dans les douleurs que luy causoient ses liens. Toy qui as tout fait, tu sçais bien que c'est à tort que les François me traitent si rudement, me prenant pour vn

traistre, ie ne le suis pas, tu le sçais bien, aye pitié de moy: Ayant sait cette priere mes liens, disoit-il, tomboient d'eux messans que j'y apportasse aucune industrie. Dieu est assez bon pour saire vn miracle pour sauuer vne ame; quoy qu'il en soit, les soldats François, vn chirurgien qui estoit dans la barque, & les matelots employerent leurs liens, leurs ligatures, & leur esprit à garotter cet homme, & on le trouua tousiours délié sans que les cordes fussent en aucune saçon endommagées, mais poursuiuons nostre chemin.

Ce pauure Barbare estant arriué au Havre de Grace, & voyant d'vn costé tout le port si remply de navires qu'ils se touchoient l'vn l'autre, & de l'autre tant de maisons rassemblées en vn mesme lieu, & conferant dans son esprit ces grands vaisseaux auec leurs petits canots d'écorces, & ces maisons auec leurs cabanes, il demeura deux heures sans parler, tant il sut

faisi d'estonnement.

Au sortir du Havre, le Pere le conduisit à Dieppe: il luy auoit donné des souliers à la Françoise; mais comme ceux dont on se sert en son pays sont souples comme des chaussons de tripot, ou comme de gros gands de Cerf, il ne pouuoit s'accommoder à nostre chaussure; il quitte ses bas & ses souliers, & encore que le temps fut froid & humide, & les chemins tout rompus; car c'estoit enuiron le 6. Decembre, il marchoit nuds pieds, & nuë teste aussi lestement qu'au milieu d'yn Printemps ou d'yn Esté.

Vn rencontre en ce chemin accreut son premier estonnement, il sortit du Havre vn iour de marché, & passa par diuers lieux és iours de Festes; les chemins estoient tous couvers de monde: Comment, disoit-il, les François sont par tout; la campagne en est pleine aussi bien que les villes? cela luy faisoit croire ce que quelques-vns disent par sois en riant aux Sauuages; qu'il y a autant d'hômes en Frace que d'arbres dans leurs grandes forests.

Les chemins estans fort glissans, ce pauure Hiroquois se sit entorse au pied, & se soula le nerf, en sorte qu'estant arriué à Dieppe, le Pere le logea à l'Hospital pour le faire penser. Les Religieuses qui gouvernent cette maison auec vne netteté, & vne charité rauissante, le receurent & le sirent penser soigneusement: mais comme le mal estoit assez fâcheux, le Pere voulant tirer droit à Paris, suy dit qu'il demeurast en repos en cette maison, où

164 Relation de la Nouvelle France, il estoit aymé, & qu'il le seroit venir, quand il seroit guery, dans la ville ou demeuroit ordinairement le grand Capitaine des François. Ce Sauuage voyant le depart du Pere, qui estoit sa seule & vnique connoissance, le voulut suiure, disant, que son pied ne luy faisoit plus de douleur. Il se met donc en chemin, mais il il n'auoit pas fait vn quart de lieue que son pied & sa jambe s'enflerent, en sorte qu'il auoua qu'il ne pouuoit marcher. Retourne, luy dit le Pere, en la maison d'où tu és party, tu seras receu auec charité, & ie feray en sorte qu'on te fasse venir au lieu où ie m'en vay quand tu pourras marcher. Ce bon homme craignant de prendre vne maison pour l'autre, & voyant de loin vn François qui tiroit vers la ville, pria le Pere de luy dire qu'il prist la peine de le conduire à l'Hospital; car pour moy, disoit il, ie suis sourd & muet en France, j'ay laisse ma langue & mes oreilles en mon pays. Le Pere le mit entre les mains de ceFrançois qui le rendit en la maison de misericorde, où il fut pense &secouru jusques à son entiere guerison.

Il demeura plus d'vn mois dans cet Hospital, où il donna vne telle édification aux bonnes Religieuses qui le goues années 1649. 69 1650. 165 uernent, qu'elles en écriuirent en ces termes. Mon Reuerend Pere, voicy sincerement ce que nous auons remarqué dans les deportemens du Sauuage Hiroquois, que vous nous auez laissé, & que nous vous auons renuoyé.

Il nous a donné des marques d'yne grande pieté, comme il n'estoit que cate-chumene, il n'entendoit la Messe que jusques à l'Euangile, mais en se retirant de la Chapelle il se mettoit à genoux en quelque petit coin, continuant ses prieres jusques à l'entier accomplissement du

sacrifice, & cela tous les iours.

Il prioit souvent pendant le jour, mais il ne maquoit point tous les matins à son leuer de s'aller presenter à Dieu deuant l'autel, & d'y faire ses prieres; il manioit si souuent son Chapelet que nous croyons qu'il le disoit plusieurs sois pendant le jour.

Lors qu'on portoit le Saint Sacrement aux malades de l'Hospital, vous le voyiez aussi-tost à genoux, mais dans vne posture si deuote, qu'il touchoit les cœurs de tous

ceux qui l'enuisageoient.

Ensin si on le vouloit réjouyr, il luy falloit parler du Baptesme, au moindre signe qu'on luy en donnoit, son visage paroissoit guay, il portoit des marques d'yn

L iij

166 Relation de la Nouvelle France, esprit qui ne respiroit que ce bon-heur.

Il nous respectoit, disent les meres, auce vne modestie qui ne ressentoit rien du Sauuuage, il estoit prompt à obeyr, tresenclin à obliger, & à secourir ceux qu'il voyoit desirer de luy quelque seruice. Le seu s'estant mis dans quelque maison voisine de l'Hospital, il sit paroistre son courage, sa sorce, & son adresse, se trou-uant empesche dans des habits François, il se mit en calçon & en vn moment grimpa sur les endroits les plus dangereux faisant plus luy seul que plusieurs enséble.

Il prenoit son repas, non en Barbare, mais en homme temperant; car encore qu'il sut grand & puissant, il mangeoit assez mediocrement, & receuoi tce qui luy estoit presenté, auec vne si grande reconnoissance, qu'on l'eut pris pour vne personne éleuée dans la ciuilité Françoise.

Il se diuertissoit quelquessois auec les malades, ou auec les pauures de l'Hospital, maistousiours auec vne si grande retenue qu'il ne mécontentoit personne, & jamais on n'a apperçeu en luy la moindre indecence, non pas mesme l'ombre d'aucune liberté indigne d'vn Chrestien, quoy qu'il ne le sut pas encore. Estant incommodé d'vn mal de gorge & d'esto-

mach, on le fit voir au medecin qui ne jugea à propos d'y apporter aucun remede,
veu que le mal se guerissoit petit à petit;
mais si-tost qu'il eut appris que le Reuerend Pere qui l'auoit amené en France, le demandoit à Paris, il ne parla plus
de son mal, sa joye sur si grande qu'il ne
se mit guere en peine, ny de remedes,
ny de medecin; il prit congé de nous &
de nos malades, nous laissant à tous vn
regret de son depart: tant il estoit modeste
& de bonne humeur.

Il arriua à Paris, en uiron le 20. Ianuier, le Pere qui l'auoit conduit sur mer le reçeut auccjoye, & luy demanda s'il estoit bien guery. Ie ne sçay si la crainte d'estre vn autre fois separe de luy, n'altera point la sincerité qu'ont les Sauuages en leurs paroles; ou si la joye de le voir ne luy déroboit point le sentiment de son mal; quoy qu'il en soit, il temoigna qu'il estoit en tres-bonne santé, & cependant il auoit vne sievre qui luy a causé la mort, il demandoit incessamment à boire; le Pere croyant qu'il estoit alteré pour la fatigue du chemin luy en faisoit donner, recommandant qu'on ne luy donnast que de l'eau, mais les officiers des maisons où il le menoit le voulans caresser luy donnoient du vin jettant de l'huyle dans vn

brasier qui l'a consommé.

Il fut logé dans la maison des nouveaux convertis par la faueur de madame la Marquise d'Ost, où il trouva la vie & la mort quasi tout ensemble; voicy ce qu'en ont remarqué ceux qui gouvernent cette maison de charité.

Le 22 Januier de cette année 1650. nous fut amené par les Peres Iesuistes vn Hi roquois âgé peut-estre d'enuiron 35. ans, encor qu'il fut indisposé il ne laissa pas d'assister à tous les exercices de la maison, & notamment aux prieres, où on reconnut qu'il auoit esté instruit; car dés la premiere fois qu'il entra dans la Chapello il osta son chapeau, & se mit àgenoux, tirat vn chapellet de sapochette, auec lequel ilus fit le signe de la Croix sur soy sans qu'o luy enseignast; sa modestie exterieure donoit vne grande marque des bons sentimens de son cœur. C'est vn grad mal de ne se pas entendre les vns les autres, on ne pouuoiteme pas luy demander ce qui luy faisoit mal; enfin le quatriéme jour de son entrée dans la maison, on vit bien qu'il ne se pouuoit plus soûtenir, on le met au lict, on luy touche le poux, & on découure vne grosse siévre qu'il auoit cachée jusques alors. Ceux es années 1649. Et 1650. 169

qui le visitoient ne luy pouuans parler que par signes formoient sur eux le signe de la Sainte Croix, éleuans par apres les mains au Ciel, pour luy donner sujet d'y porter son cœur; il entendoit fort bien ce langage, faisant les mesmes choses auec tant d'affection

qu'il sembloit soulagé de son mal.

Ce bon homme appelloit tou sours l'Ecclesiastique de la maison par le nom de Mosseur qu'il auoit appris couersant auec les Fraçois, si quelque autre se presentoit pour luy rédre quelque seruice, il détournoit saface, repetat céte parole Monsieur, & quand le Prestre l'abordoit il ne pouuoit exprimer son desir, ny produire sa pensée. Chacun luy portoit compassion; on a jugé depuis & auec raison qu'il vouloit demander le Baptesme, mais comme on ne l'entendoit pas, il faisoit souuent venir le Prestre, croyant que le voyat si bas il le baptiseroit. Le Pere qui l'auoit amené l'alloit visiter de temps en temps, & l'asseuroit qu'il seroit baptisé, mais la crainte qu'il auoit de mourir sans ce bon-heur luy faisoit demader l'Ecclesiastique Enfin le mal redoublat, ceux de la maison s'assébleret à l'entourde son liet pour voir sion luy accorderoit cette faucur; quelques-vns asseuroiet qu'il étoit téps, d'autres disoient que la force qu'il faisoit encore paroistre estoit vn indice qu'il n'estoit pas 170 Relation de la Nouvelle France, voisin de la mort; on termina cette contestation par vn Veni Creator, pour demander lumiere au S. Esprit de ce qu'on deuoit faire: à peine eut-on acheué la priere, qu'il fut saist d'vne conuulsion si violente, qu'on prit resolution de le baptiser tout sur l'heure; on croyoit qu'il eut perdu le jugement, mais il fit bien paroistre le contraire; car la violence du mal l'ayant jetté hors du lict, on reconnut qu'il s'efforçoit nonobstant sa foiblesse, & nonobstant ses grandes souffrances de couurir sa nudité; & quand il vit le Prestre reuestu d'vn Surplis & d'vne Estole auec l'eau en main, se doutant bien qu'on luy alloit donnerl'accomplissement de ses desirs; il se tint enrepos arrestant la fureur de sonmal, on vit son visage tout réply de joye, le Pere qui en auoit soin auoit couché sur le papier quelques actes de cotrition en lagueHiroquoise, afin qu'on luy suggerast de temps en temps, notamment si on estoit cotraint de le baptiser en son absence: on prononça ces paroles deuant luy pour l'exciter à demander pardo à Dieu, il les repetoit auec deuotion & auec sentimet, faisant d'autres prieres de luy-méme qui rauissoient tous les assistans, ils'efforcoit de leuer les mains au Giel, il baisoit le Crucifix; en vn mot on le baptisa sur les 8. heures du soir, & demie heure apres son ame

purifiée dans le Sang de l'Agneau s'éuola au Ciel, ce qui obligea ceux qui estoient presés de reciter, non pas vn Libera, mais le Pseaume, Laudate Dominum omnes Gentes, en action de graces d'vne faueur si signalée; voila ce qu'en ont écrit, & ce qu'en ont rapporté de bouche ceux qui ont esté témoins oculaires du bon-heur d'vn Hiroquois, qui auoit peut-estre mangé sa part de plus de 50. hommes.

le croyois que ce Chapitre conclueroit la Relation de cette année, mais le P. Hierôme Lallemant estat retourné de la nouvelle France par le dernier vaisseau, & n'ayant pas rencontré à Paris nostre R. P. Prouincial, nous coucherons iey la lettre qu'il luy a enuoyée pour luy rendre compte des missions qu'il a si long-temps gouvernées en ce bout

du monde.



LETTRE DV P. HIEROSME Lallemant, au R.P. Claude de Lingendes, Prouincial de la Compagnie de IESVS en la Prouince de France.

MONR. P.

## PAX CHRISTI.

V. R. aura desia appris, par le retour des premiers vaisseaux, la suite des desastres, & du débris de la Mission Huronne, causée enfin par la furie des Hiroquois. La Relation qu'en enuoye le P. Paul Raguencau, grossie de quelques Chapitres des Missions plus voisines de Kebec; fait voir le détail, & le particulier de ces mal heurs. Nos yeux & nos cœurs, voyans & sentas ces coups de la main de Dieu, n'ont que cette repartie. Il est le souverain Seigneur de ses ouurages, & le Maistre de nos petits desseins conceus pour sa gloire, c'est à nous d'agréer ses ordres, & de n'improuver iamais ce qu'il fait.

Ie ne sçay comme il est venu en la pensée de nos Peres, qu'il estoit à propos que ie repassasse la mer pour contribuer au remede de nos mal-heurs; y ayant en France tant de personnes capables d'y trauailler sans moy; és années 1649. 6 1650. 173
s'il n'y eut eu autre confideration, j'eusse eu
bien de la peine de quitter la nouuelle France: Mais leur desir joint aux intentions de
V. R. que i'ay presumées, m'y a fait ensira resoudre. I'ay laissé le gouvernail entre les
mains de celuy qui auoit conduit si courageusement l'Eglise Huronne dans ses combats, & sauué si à propos les reliques ou les
restes de cette pauvre Mission.

Ie suis donc party de Kebec le 2. iour de Nouembre de la presente année 1650. & suis arriué au Havre de grace le 3. de Decembre, en la compagnie du P. François Bressany, & de nostre Frere Iean Ligeois. C'est à Dieu de donner les remedes que nous cherchons à nos miseres; & à nous de prier sa diuine Majesté que nos fautes & nos manquemens ne diuertissent point sa benediction dont

nous auons si grand besoin.

Enattendant ce qu'il luy plaira d'en ordonner, ie croy que V.R. aura pour agreable que ie luy fasse part des sujets de consoation qui soulagerent vn petit mon ame au depart du pays, & que ie luy declare l'estat

uquel ie l'ay laissé.

Arrivant au pays, il y a douze ans, ie n'y encontray qu'vne seule famille Huronne Chrestienne; & deux ou trois qui compo-oient l'Eglise Algonquine, & Montagnese,

Relation de la Nouvelle France, & voila qu'au bout de ce temps sortant du pays, à peine y laissay-je aucune famille Huronne, Algonquine & Montagnese qui ne soit entierement Chrestienne, sans parler des Nations circonuoisnes qui abordent de toutes parts en ces contrées, & de celles que nous allons chercher dans leurs demeures qui n'en promettet pasmoins auec le temps.

Voire mesme ie ne puis ofter de mon esprit que le temps n'est pas loin que la porte s'ouurira derechef pour les Natios d'enhaut que nous auons quittées, & mon fondement est d'autant plus certain qu'il me semble appuyé sur l'Euangile, qui nous asseure que deuatle jour du Iugement il faut que toutes les Nations de la terre ayent cognoissance de leur Redempteur, & que ses Loix leur soient suffisamment publiées, & selon le sentiment de plusieurs Docteurs par elles approuuées, & acceptées, de plus, comme Dieu ne fait pas ordinairement des miracles sans necessité, il est croyable qu'il se seruira des personnes qui ont desia la connoissance & l'habitude auec ces peuples, & l'vsage & le commerce de leur langue, come autant d'instrumens proportionez à son ouurage: cela nous doit estre vne grade consolation, & vn grand renfort de patience pour attendre les temps & les momens ordonnez par la divine

175

sagesse, & par la diuine bonté.

Vn grand Sainct disoit autressois que l'esperance d'vne vie immortelle, estoit la vie d'vne vie mortelle, & ie puis dire ce me semble auec quelque raison, & à son imitation que l'esperance de donner vne vie immortelle, est la vie de la vie mortelle des pauures Missionnaires, qui ont gousté combien il est doux de voir sortir de cette vie des ames qui leur doiuent en quelque façon leur bonheur eternel.

rons n'a esté qu'vne petite commission de la part du Ciel pour la conuersion & pour le Baptesine de dix ou douze mille ames; laquelle acheuée on nous donne vn peu de relasche pour attendre auec quelque repos de nouueaux ordres.

La seconde chose qui m'a extrémement consolé, est la belle disposition dans laquelle ai'ay laissé nos Peres & nos Freres, & mesme nos domestiques qui ne m'ont demadé autre faueur pour tous les trauaux & pour les dangers du passé qu'vne permission & vne asseurance de retourner dans les mesmes emplois & dans les mesmes occasions, lors que Dieu en auroit rendu le chemin libre: l'aduouë que l'air & la generosité auec laquelle ils me l'ont demandée m'a touché, & m'a fait cou-

176 Relation de la Nouvelle France, ceuoir que Dieu auoit quelque dessein qui causoit ces belles dispositios qu'ils ont signalées & seellées de leur propre sang; qu'il en soit loué à iamais, & qu'il luy plaise auancer ces heureux momens qui feront des Martyrs & des Confesseurs nouveaux das l'Eglise de Dieu: les Peres que i'ay laissé pour les emplois des Missions & fonctions de Kebec, & de ses appartenances, sont au nombre de 19. ou 20. le reste a repassé en France par les premiers vaisseaux, & par ce dernier au nombre de huict, tous bien resolus de retourner au combat au premier signal de la trompette, n'y ayant pas pour le present de viures ny d'employ suffisant pour eux dans le pays.

La 3. est l'ouverture que Dieu nous a fait dés à present des Missions nouvelles d'icy bas: le P. Gabriel Druilletes apres auoir passé quatre Hyuers en diuerses missions auec les Sauuages, est allé passer le cinquième auec les Abnaquiois qui le sont venus querir auec beaucoup de témoignages d'affection enuers leur Patriarche (comme ils l'appellent) & enuers sa doctrine: Dieu peut-estre tirera plus de bien de ce voyage que nous ne pensons pas; nous auons receu lettres de luy depuis qu'il y est arriué qui nous donnent sujet d'en beaucoup esperer.

Le P. Charles Albanel semble vouloir aller

sur

és années 1649. CO 1650. 177

sur les pas & sur les vestiges, estant party deuant mon depart pour son premier hyuernementauec les Sauuages montagnets.

Les Atticamegues ou Poissons blancs qui font vne nation du Nord des plus considerables, ne cessent de presser qu'on les aille voir en leur pays, ce qui ne leur a pû estre accordé par le passé faute de monde, maintenant que nous en auons à suffisance, on ne manquera pas d'y aller au premier Printemps, si l'Hiroquois ne se jette à la trauerse.

Ceux du Saguené, autre nation du Nort, sont dans la mesme affection, on y adesia fait trois voyages; j'en espere beaucoup auec le temps, & ainsi voila dequoy nous occuper, attendant les temps & les momens de la diuine Majesté pour de nouvelles con-

questes.

Le quatriéme sujet de consolation que ie voyois dans ce pauure pays desolé est le courage, & la generosité de nos Religieuses, tant Hospitalieres qu'Vrsulines, qui jouyssant de nos débris par l'establissement de la Colonie Hurone proche de leurs Monasteres, qui leur seruent de Paroisse & de retraite, tant pour les malades que pour les sains, se trouuent heureuses de jouyr de la plus haute fonction & du plus precieux exercice de leur vocation: c'est vne des esperances que j'ay de la coseruation du pays, ne pouuant penser que Dieu abandonne des ames de cette nature sisaintes & si charitables: il me semble que tous les Anges du Paradis viendroient plustost à leur secours, si tant est, que les hommes de la terre manquassent de procurer leur conseruation en ce nouueau monde.

Le cinquéme sujet de consolation, est la bone disposition dans la quelle j'ay laissé M. d'Ailleboust, nôtre Gouuerneur, de faire son possible pour obuier aux maux qui nous enuironnent, & pour contribuer à l'auancemet de toutes ces belles esperances. Ie prie Dieu de benir le tout, & de faire en sorte que la France soit en estat de faire vn echo qui multiplie nos vœux & nos esperances au delà de toutes nos attentes.

Voila mon R. P. ce que j'auois à dire pour le present à vostre Reuerence; reste que ie la prie que nous ayant assissé jusques icy de ses saints sacrifices & de ses prieres & de celles de toute la Prouince, il lui plaise nous continuer ce bien, & céte faueur en laquelle consiste nôtre principale resource & le plus vis de nos esperances.

De V.R.

Seruiteur tres-humble & tres-obeissant en nostre Seigneur.

HIEROSME LALEMANT.

## EXTRAIT DV PRIVILEGE du Roy.

Ar grace & priuilege du Roy, il est permis à SEBASTIEN CRAMOISY; Marchand Libraire, Imprimeur ordinaire de sa Majesté, ancien Escheuin & Consul de la ville de Paris, d'imprimer ou faire imprimer: La Relation de ce qui s'est passé aux Hurons, pays de la Nounelle France depuis le premier de Ianuier 1649. iusques en l'année 1650. &c. Et cependant le temps & espace de dix ans consecutifs. Auec dessenses à tous Libraires, Imprimeurs, & autres personnes de quelque qualité & condition quelles soient, d'imprimer ou faire imprimer ladite Relation, &c. sous pretexte de déguisement ou changement que l'on y pourroit faire, à peine de confiscation & d'amende portée par ledit Privilege. Donné à Paris le 19. Decembre 1650. Signé, par le Roy en son Conseil.


CRAMOISY.


## PERMISSION DV REVEREND Pere Prouincial.

TOVS Claude Delingendes, Prouincial de la Compagnie de I E s v s en la Prouince de France, auons accordé au sieur SEBASTIEN CRAMOISY, Marchand Libraire, Imprimeur ordinaire du Roy & de la Reyne Regente, ancien Escheuin & Consul de cette ville, l'impression des Relations de la Nouvelle France. Fait à Blois ce huictième Decembre 1650.

CLAVDE DELINGENDES.

RELATION.





EA 651 R 145r



